

KHARARNAO BINGWUI SABBATH SCHOOL LESSON

**“Feed My Sheep”: 1 and 2 Peter  
( Iwui Yao bingli mizalu)**

By: Robert McIver

April, May, June  
2017



## Tuizan

---

1. Peterli samkaphang – *March 25 – 31*
2. Masāshiman kapaiya Yarmet – *April 1 – 7*
3. Pāngmon bingwui Wungram – *April 8 – 14*
4. Miyur Katei bingli ithumwui khangashik – *April 15 – 21*
5. Vare wuivang kharing – *April 22 – 28*
6. Christa wuivang kachot kachāng kaphung – *April 29 – May 5*
7. Otram ngathakhamiya Kathāna – *May 6 – 12*
8. Peterwui lairikli Jesu – *May 13 -19*
9. Shitkasang kala theikakhui athishurda kharing – *May 20 – 26*
10. Bible kala naodawui pongli hāngmarān khami – *May 27 – June 2*
11. Makhamashunga tamkachitheiya bing – *June 3 – 9*
12. Prohowui zimiksho – *June 10 – 16*
13. 1 & 2 Peterwui khamataiya tuipong – *June 17 – 23*

## Lesson 1

March 25 - 31

### Peterli samkaphang

#### Sabbath Ngazin – March 25

**Haptali pakhavai:** Luke 5: 1- 11; Matthew 16: 13 – 17; Matthew 14:22 – 33; Luke 22:31 -34, 54 – 62; Galatians 2: 9, 11 – 14.

**Ningphun: “Kha siphān kapang chi theida Peterna ngachee haowa. Kala tarali ngaphumki jihaoda āna vaoda hanga, “ Proho ili kakanmilu.” (Matthew 14: 30)**

1 Peter eina 2 Peter chithi khani hi Peterna kakapina. A hi Jishuwui sakhāngatha ngachaili hokhui khareli kazāngā akhana. Jishuli ngasoda otsakruma akhana. Kala sakhāngatha bingwui ngachaili Jishuwui chikhur vātheikhareli kazāngā akhana. Chiwui vang eina Peterna awui kathei kashā experience samkaphang athishurda Mangla Katharawui kasat khami manga eina awui chithi hi kapikashokna.

Gospelwui lairik khararchanli Peterwui pongli kachungkha samphāngā. Awui maikhayā samkaphang, maikashi, awui pangshap kala khangazan saikora chila khararchanli ithumna kathei-kashā samphāngā. Jishuna okathuili leilakha katei bingwui vangla ana Jishuli hangmi. Jishuna kathiwui eina ringshokhailaga kazingram kākahaiwui thili vareshi haokaphoka bingwui ngachaili khangachānna kathāna akha ngasai. Galatian eina Otsak lairikli Peterwui pongli kachungkha kapimihai.

Khayon khamāng kala pheokhami kaji hi khikhala kaji Peterna hangchithei. Kala khanim khangahui uklung eina shitsangda muikhavā kaji hila hangchithei. Peterna Varewui lukhamashan hi khikhala kaji theishing kakhui thada ithumna theikhui phalungra. Chiwui vang ajawui thotli Peterwui tui hi pangshap khaleiya akha ngasada leili.

## Sunday

March 26

### “ Iwui eina kazat thuimihaolu” ( Luke 5: 1-9)

Peter hi khipa kala New Testamentwui khare lairik kathum chili a hi khi ot sāsāya da hangkhala? Peterna Galilee wui ngaye pheili khaih kaphā mi akhana. ( Matthew 4: 18; Mark 1: 16; kala Luke 5: 1-11)

**Luke 5: 1-9 chi palu. Luke 5:8 chili Peter khipa khala kaji ana Jishuli kahang tui chieina kathada kathei samphang? Tui hiwui eina Peterwui manglarin condition kathada lei da theikhui?**

Peter hi Jishuwui leikashe akha ngasada leira. Kala Peter nala Jishuwui rin chi theida Awui thi shurkhangaiya akha ngasada leira. Khaih kaphā mibingwui khailen chi rakhavakwui tarali horsanglu da Jishuna kagaso chitharan Peterna khiwui vang kahangkhalā kaji matheisamana. Peter kala awui ngasotnao bing china ngaya pongda khaih phalaga khikhala masamphāngmana kaji theiya, chithalala nawui kagaso athishurda sara da Peterna khailen chi tara lungli horsanga.( v.5) Peterna Jishuwui kahang khangana hi A khipakhala kaji rida theikhui kahai thada kagaso chi nganāda sai. Mah! Hiwui otshot hi mashokranglakha Peterna Jishuli theihairasai.

Khaih kaphawui matakakha kahai otshot hi matheiranglakha Peterna khiwui vang Jishuli heng sada khuisanghao khala kaji Luke 5 :3 hina ithumli theikhui ngasaka. Jishuna Simon Peterwui marikhongli zangda, yerei akhavak makanda huivalu da kasoi kala Jishuna mibingli

tamchithei. Jishuwui tamkachithei chi Peterna shāhairasā haoda Jishuwui kagaso chi heng sada khuikasang ngasapai.

Jishuna matakakha kahai sakachithei hieina Peterna Jishu hi kathara akhana kaji theivai. Chieina Peterna awui khamakhao morei chi phaningkhuida mibingwui mangali khamashunga tui chi matui. Kala Prohowui mangali morei kaphunga akhana kaji khuisanga. Peterwui khangazan kala makathuk kayakha leilala Jishuna Awui thi kashura mi akha ngasangasaka. Peter hi manglarin kazata Jishu wuivang saikora horserhai kashapa sakhangatha akhana.

**Luke 5: 11 chi palu. Verse hili khamataiya ithumna pakakhui chi khikhala? Khaih kapha mibing china athumwui khailenli khaih kachungkha samkaphang chi theida athumwui khalei saikora chi horhaida Jishuli shurthuwa. Hiwui eina ithumna Jishuli khuisangchaoda Awui sakhangatha akha khangasawui otsak acham kathada tamkhui?**

**Monday**

**March 27**

**Jishu hi Christa lāka da Peterna hāngkaphat ( Matthew 16: 13 -17)**

**Matthew 16: 13 -17 chi palu. Verse hili hangda khalei chi khikhala? Peterna Jishuli hangda khaleiwui khamataiya tui chi khikhala?**

Peterna Jishuli shitkasang pongli malung zanlāk eina matui. Matthew 16:20 chili pākha Peterna Jishu hi Messiah da khuisangda shitsanga kaji kathei samphangra. Jishuwui vang ot kasali hi khamataiya akha ngasai. Hithada theishing kakhui hi Peter kala sakhangatha bing china tamkhui khavai ngasai.

“ Christana okathuili wungnao akha ngasada mungra kaji hi sakhangatha bing china phaningsai. Kha Christana Awui khangathuma kharin chi mahangshokmana. Kala Ana khangazanna thada kal mibingna khipakhala da makatheiya mangasalula khangachanna akha ngasahaora da sakhangatha bing china phaningsai. Ana Awui wungram semkakikaji chi masangleimara, kala pangmonbing eina ain kathema tamkachitheiya athum bingna Christali mayuirarlakmara da phananga. Kha Christali Awui miyur bing china mamayamara. kala Ali kakapikana da phenda rekkhareklaga cross tungli shaothatra kaji sakhangatha bing china matheivāsāmana.” The Desire of Ages, page, 415.

Sakhangatha bing china Jishu hi Messiahna kaji thei. Kha Jishuna Ali sashida yangkashe bingna rekkhareklaga shaothatra da tamkachithei chi Peterna makhuisangrarmana. ( Matthew 16: 21-23) Peterna Jishuli kaharda kahang chitharan, Jishuna “Iwui eina thuihaolu, he, makapha Satan da Peterli hangmi. Jishuna okathuili Awui ot kasa zingkum alungli hangda khalei tui hili langkhomei zakashi maleimana. Kha tui hi Peter wuivang phakhavai hangkhami ngasasai. Peterwui uklung ningkachang chili phakhavai vang tui hi kahang ngasasai. Hithada Jishuna awui mashungkhui khavai hangmachinmi. Jishuna hithada Satanli khararda hangkhami hi Peterna tamkhui khavai ngasai. Proholi otram khangatha hili chotchan samphang phalungra kaji Peterna tamkhui kaji 1 & 2 Peterli ana kakapi chithi chieina naoda theikhui.

**Varewui ningkachang eina ithumwui ningkachang hi kayakha ngatei ngarok khala? Hikathawui atamli nana kachikatha decision khui?**

**Tuesday**

**March 28**

**Tara tungli kazat ( Matthew 14: 22 -33)**

**Matthew 14: 22 -33 li kapikahai khararchan chi pāvālu. Khararchan hiwui khamataiya chi khikhala? Prohowui thi kashura bing ngasakhavai hina kathada ithumli ngachonmi khala?**

Jishuna mi thingphanga langdali mizai. Hi Awui sakhangatha bing china kathei samphanga. Hithada Jishuna matakakha kahai ot sakachithei wuivang Peterna Jishu hi sashapa Varena kaji mayai. Hi theida Peterna, nana jiakha ilila tara tungli zatshap khavai kasolu' da hanga. ( Matthew 16:28) Shitkasang kayākha khamataiya tamkhui kapai ngasākhala!

Peterwui shitkasang otsak chi Jishuna khuisangmi. Chieina Jishuna kasoda Peterna marikhongwui eina shokda tara tungli zata. Peterna marikhongwui eina pheikashok chila shitkasangwui pheikar akha ngasai. Kaja Peterna khangaphaowa yirei tungli zatkashap chi shitkasang theikapai azak akhana.

Siphan zingrot khara chitharan Jishuli shitsangda yangchinglu kaji ithumna khararchan hiwui eina tamkhui. Peterna Jishuli kayakha vashungda shitsang khala kaji Peterna Jishuli ili tara tungli zatngasaku kaji hinala shakhi akhana. Kala awui shitkasang manga eina Jishuna salu da kagaso chi Peterna sashapa. Kha ana Jishuwui eina mai ngareithuikahai chitharan shitkasang chi ngazanhaoda Peterna tarali ngaphumki jihaowa.

Peterna ngacheehaisalal Jishuna ali khisada mangaphum khavai masamithu? Hi mashunglaka, kha Peterna karankha eina tangda zatshap kala awui makathuk chi kachili tanghao khala kaji Jishuna Peterli theingasakngai. Peterna makathuk chitharan 'Proho ili kahumilu' da vaoshoka. ( Matt 14:30) Chitharan Jishuna awui khangakao chi khuisangmida heng sada Awui pang eina kankhuimi. Jishuna Peterwui pangli masingkhula ngaphongngasakhaipai. Kha Jishuna Awui pang eina tarawui eina Peterli kanmi. Awui makathuk chi theida Jishuli karankha eina tangda horsang phalungra khala kaji Peterna phaningkhui.

Ithumna Proholi shitkasang hi kashunglaka da phaninglapai. Kha kachikatha mirinwui kasak kala khangachee khangachām rāsamkaphang chitharan ithumwui shitkasangli ning khamaong rashunghaipai. Chitharan, ' he shitkasang kateowa, khisada ningmaong khala' kaji Peterli Jishuna kahang chi phaning unglu. ( Matthew 14: 31)

**Wednesday**

**March 29**

**Awui Proholi kahat ( Luke 22: 31 -34,54 -62)**

**Luke 22: 31- 34 chi palu. Peterwui makathuk –khangazanwui eina ithumna khi tamkhui kapai leikhala?**

KHamashung chi khikhala kaji theida Peterna chiwui thishurda ringngai. Sakhangatha katei bingli ana malung zangkhomei ngasai. Ana Jishuli rashoki kaji saikora chili ngasungkhavai kashurra akha ngasai. Kha Peter khipakhala kaji akhalatta machitheimana. Hina awui konglui khavai apong ngasai. Chiwui vang ana Jishuli kathum shitta mamayamana. Hi Jishuna rida Peterli hangmihairasai.

Khanguiyali shurthui kahaiwui kakhanang ningsuikata samkaphang hi Peterwui khararchan hieina ithumna tamkhui.

Vareshi bingwui kakhananga khararchan samkaphang hi khamashung chili vareshi bingna makhuisangla nāteng kahaiwui eina kharana kaji theingasakmi. Kala khamashung chili ning tongchaoda makashur wuivang kharana. Kha ithumna khamashung chili theikazakda pheikashok khavai ngatarlak eina nganing phalungra. ( Revelation 14: 12 chi payanglu)

Peterna Gethsemane wui eina pheikar ngwuiphokhaowa da EG Whitena hanga. Kaja ana seiha masala pithuihaowa. Hina awui phei ngaphok khavai ngasahaowa. Rakikaji wuivang manglawui ngarankahai chi maleithuwa. Peterna shitsangda seiha kasa rin ringsasije awui Proholi kahat kaho chi maleisamara.” The Desire of Ages. Page 714.

Peterna zakshilak eina kongluihaowa. Kha Prohowui leishat lukhamashan china hakmeikharda leisai. Morei kachungkha khalei chilila Varewui lukhamshan chungmeida lei. Chithada sada Peterli Varewui lukhamshan china awui khayon chi pheomihaida churchwui kathanna akha ngasangasaka. Ithumwui kongkhalui kayakha leilala ithumna shitkasang mangacheila zatda leiakha Prohowui lukhamashan pangshap chi ithumli tashungmi cingda lei kaja hieina tamkhui.

Peterna huikhamiwui paokapha chi awui mik eina kala khanā eina kathei kashā samphanghaoda pheokhami kaji hi khikhala kaji theikazaka. Peter hi kayākha khamakhaowa morei kaphunga mi khala kaji ana thei. Kha morei kaphunga bingwui vang Prohowui pheokhami hi kayākha hakmaha khala kajila theikhui.

**Peterna Jishuli kayakha hakda hathao khala kaji theitheilala Jishuna Peterli pheomi kaji hieina kachikatha mibingna ithumli makhamaya khalan kahai leilala kathada athumna pheomithei phalungra khala kaji kathada hili tamkhui ngasak?**

**Thursday**

**March 30**

**Peterna churchwui kathāna sāda( Galatians 1: 18,19)**

Peter hi Jishuwui sakhangatha ngachaili kathāna akha thada sai. Peter hi sakhangatha bingwui lungli tui kasinga phayet khamiya mi akhana. Matthewna Peterli sakhangatha bingwui ngachaili khare akha sada shankhui. Peter hi haophok kharewui church thānkhamakhoka kathanna akhana. A hi Jishuli yorkaza Judas Iscariot wui mahutli kapang kasanga mipa chiwui aming suggest sakhamiya akhala ngasai. ( Acts 1: 15 -25)

Varewui mibingli Pentecost zimiksholi Mangla Kathara heirorkhami apongli rākazip kahaiya yarui bingli hangkhamiya chila Peterna. ( Acts 2: 14 – 36) Kathiwui eina Jishuna ringshok ngasakikaji hangkhami wuivang Peterli tukkhui. Pangmon kharei eina Jehudi bingwui kathanna ain kathema bingli matuikhami chila Peterna. (Acts 4: 1-12) Jehudi makhaninga Jishuwui thikashura Cornelius kaho mipali rasamphang khangasaka chila Peterna. ( Acts 10: 1-48) Paulna Jishuli huikhamena da khuisang kahaiwui thili rasamkaphanga chi Peter lina. ( Gal 1: 18) Kala Paulna churchwui khamataiya kathāna kathumwui aming hangkashok chi, Peter, James kala sakhangatha John athumna.( Galatians 2: 9)

**Galatians 1: 18,19; Galatians 2: 9, 11-14 chi palu. Peter hi churchwui kathanna akhalaka. Kha verse hina Peterwui maramli kathada hangli?**

Vareshi haokaphoka atam chitharanlia vareshibing kaji hi Jehudi mang ngasasai. Athumna ain chi mayonkhavai panglak eina hotnai. ( Acts 21: 20) Chitharanwui atamwui Jehudi bing china Gentile bingli maphashak maphazārumsamana. Kaja Gentile bing hi makathara miyurna da khui. Jehudi vareshi bing kaikhala Jerusalemli khalei Jameswui eina Antiochli rai. Chitharan Peterna Gentile bingli ngasoda mazāngasakmana.

Paul wui vanga hi huikhami paokapha Jishuna tamkachtieili makhamayana da khui. Peterwui otsak chili Paulna mamayamana. Kaja vareshi bingwui shitkasang apong tamchithei khavai khamahai khuiira khamina da Paulna thei. Ithumli shitkasang manga eina huimira. (Galatians 2: 14 -16)

**Peter hi Varena hokhui kahaiya mi akhana jilala awui khayon mashungkhui khavai lei. Ithum khalattawui khayon maphaningkhui khalei chili kachikatha mi katei akhana hangkhami tharan ithumna kathada ngahankara?**

**Friday**

**March 31**

Ngarum kasanga: *The Desire of Ages, The Call by the Sea,* page 244 -251, “ *A night on the Lake,*” p. 377 – 382.

“ Peterna awui kongkhaluwui experience chi masamphang ranglakha a hi malung kazana kala hakkhangaiya mi akha ngasasai. Mibingli hangkachithei hi awui ningkachang ngasai. Khi matui akha phara kaji maphaninglakla matuishok kazāra mi akhana. Mibingwui khavat chili maphaningmila hangshokmi katheiya akhana. Kha Mangla Katharana Peterwui mirin ngacheimihawa. Khikha majukmajula matuiphapha kaje Peter kaho chi midhar onkahiya Peter ngasahaowa. Awui kachama sakasa otsak chi ningli phaningda khalei khamajuk saikora Christawui lukhamashan manga eina khangachei samphanghawa. A khipa khala kaji phaningkhuida langkaso mirin chi horhailaga khangahuiya khalatta khangarina mi akha ngasahaowa. Awui khangchei mirin kala khangahui uklung khaleiya mirin kharing chiwui vang ana Christawui yaobingli homkashapa mi akha ngasahaowa.” Testimonies to the Church, vol.5, page 334,335.

Ithum bingla Peter katha akha ngasaserda leili. Maningmala? Khipana shitkasang wuivang manganingshing kharar leila? Kala mirinli maikashi masamkaphang khipa leili?

**Ngapheirum khavai:**

- 1. Peterna Jishuwui eina mai ngareithuihailala vareshi bingwui shitkasang khangatara kathanna akhana. Hina Jishuwui lukhamshan theikhui khavai kathada hangmili? Peterna Vareli mai ngarei khaung hieina ithumna khi lesson tamkakhui samphang? Proholi khalan kahaiya mibingli kathada hangchitheipaitra kaji Peterwui khangachei mirin hina kathada tamchitheimi?**
- 2. Khamashung chili khalan kahaiwui kala kasha apongli class li ngapheirumlu. Ithumwui mirinli haitakashap kala mahaita kharara khani hiwui khangatei ithumna kathada theipaira? Churchwui thotchanli khamashungwui eina mai ngareithui kahai example khi samphang? Khamashungwui eina phei sanathui kahaiwui kalākashi khikhala? Hikathawui otshot eina ithumna tamkhui kapai khi lei?**
- 3. Peterna katha kongluihao kala ana chiwui vang kayakha khanang kachiwui eina ithumna kachikatha tamkhui kapai leikhala?**

## Lesson 2

April 1 – 7

### Masāshimān kapaiya Yarmet

#### Sabbath Ngazin – April 1

**Haptali pakhavai:** 1 Peter 1:1, 2; John 3:16; Ezekiel 33:11; 1 Peter 1: 3 -21; Leviticus 11: 44,45; 1 Peter 1: 22-25.

**Ningphun: “Ara mashun chili kahāng khangānā wuivang nathumwui uklung sāmāthāda tharchao hailaga navānao ngarā bingli leikashi chi uklung zangshungda ning tonglāk eina leishi ngaroklu.” (1 Peter 1:22)**

Bible pākakhui tharan ithumna ngahān phalungkikaji lei. Khare sada, kakapiya mipa hi khipa khala? Kapida khaleiya mipa hina hangda khalei hi khipāli or khipalongli kahang? Khiwui vang kapikahai? Kapida khaleiya mipa china hangkhangai chi khikhala?

Hiwui ngahānkaka chiva Peterna awui chithi hi kakapi tam chitharan kachikatha otshot rashokda leisa khala kaji theiphalungra. Ana hangda khalei chi khi kala khiwui vang kahang? Matailak eina ana kapida khalei chithi hiwui eina ithumna shupkhui khavai khamataiya chi khikhala?

Hi ngahānkāpaimei khavai azingli ngahānda khalei question hi yangsa. Peterna ithumli hangkhangai chi khi ngasada leili? Atam kasangkawui mamāngli Mangla Katharana kasatmida kapikahaiya chithina. Ana kapikahai verse khare bing chiwui eina theikhui khavai sasa. Peterna ithumli theingasak khangai kachungkha lei.

## Sunday

April 2

### Miwui ramli ngaphayāng zathui kahai bingli ( 1 Peter 1:1)

#### **1Peter 1: 1 chi palu. Hili hangda khalei verse hina ithumli khi hangli?**

Peterna awui aming Jishuwui ‘paokazata’ da kapihaida leili. Paulna kakapi thada Peter nala sai. ( Galatians 1:1; Romans 1:1; Ephesians 1:1) Peterna Jishu Christali khangashik hi chithi kakapi eina mibingli theingasaka. Kala Varena ali hokakhuiwui ponglila chitheimi. Proho Jishu Christana ali paokazata akha sada hokhui.

Asia minorli khaleiya Pontus, Galatia, Cappadocia, Asia kala Bithyniali khalei mibingli Peterna kakapia chithina. Apam bing hi aruihon Turkey ngaleiwui Bosphorus zingsho shong khalei apamna. Bosphorus hi Turkey ngaleiwui 18 miles kasānga tarawui apam akhana. Hi Black sea li langkasanga Marmarawui yireili khangasuna akhana.

Peterna kakapi hi khipali kakapi khala? Gentile li kakapika maning akha Jehudi miyurli kakapikhala? 1 Peter 1:1 li kahang thakha first century atamli Kathara Ngaleiwui eina mibingwui ramli chaiyang eina pakthui kahaiya Jehudi miyurli kakapina da thei. 1 Peter 1: 2 li ‘kapangkhuui kahaiya’ kala ‘kathara’ da kahang hi Jehudi maning akha vareshi bingli kahangna. Shitkasanga bingwui ahangli makazanga bing chili ‘Gentile’ bing da hoi. ( 1 Peter 2:12; 1 Peter 4:3) Hina chithei kaja Peter kapida khalei hi shitkasanga Jehudi binglina.

1 Peter 1:18 eina 1 Peter 4:3 li hangda khalei hiya Gentile bingli kahangna da Bible kathema kaikhana hanga. Kha Peterna khipalongli kakapi khala kaji ngararik kahai ithumna matheimana. Kha khipalongli khamatui khala kajina ithum wuivang khamataiya mangasamana. Kha hangda khalei tui china kathada hangli khala kajina mataikhameiya ngasai.



**Monday**

**April 3**

**Kapangkhuï kahai ( 1 Peter 1: 2)**

**1 Peter 1:2 chi palu. Peterna hangda khalei verse hili ithumli kathada hangli? Athumli ana kathada hokhala?**

Peterna khipali kakapi khala kaji horzakda matheilala Avava Varena ngaran kahai athishurda kapangkhuï kahaiya athumli kakapina da theikhui. ( 1 Peter 1:2) Kha hili hangda khalei hili ithumna mathalak eina theishingkhuï phalungra kaja Varena kaikhali hokhuï kala kaikhala khalanhao majimana. Khikhalajila mi akhana maphararanglakha rilak eina hokhuï kahai maningmana. Hi Biblewui tamkachithei maningmana.

**1 Timothy 2:4; 2 Peter 3:9; John 3:16 kala Ezekial 33:11 chi palu. Verse bing hi palaga Peterna kapangkhuï kahaiya kaji hi khipali kahangna da theikhui khala?**

Okathui masakhuiranglakha mikumona kahui samphang khavai Varena khangaran samihairasai. “ Okathui masemranglakha Christawui mi akha ngasākhavai ithumli kapangkhuï. ( Ephesians 1:4 ) Mi khipakha mashimanla kha saikorali huikhavai Varena khangaran samihaisai. Apong khangateivak hangsa jia kha mi kachivana katang makhavai kharing samphang khavai Ana ithumli kapangkhuï. Varena morei wuivang chigat khami hi mi kachivawui vangna.

Varena mibingwui kaphaning khamajuk rida theivasera. Ana mi saikorali kakapangwui ningkhan chi mihai chili ana khamashung chi force eina kapangkhuilu kaji khikha maleimana. Hiya mi avavawui kakapangli lei. Ithumna mathameida theikhavai yangsa. Avava china awui naowui ningkachang chikashima chocolate cakena kaji theida naoli nawui ningkachang chi hina da force eina chocolate chi mamishaimana. Chi takam eina Varena ithumwui ningkachang chili kapangkhuï khavai or makapangkhuï khavai namphu kasa khikha maleimana.

**Na kahui samphang khavai Varena kapangkhuï. Hina nali kachihan leikhavai kathada katomi?**

**Tuesday**

**April 4**

**Khamataiya tuipam ( 1 Peter 1: 3 -12)**

**1 Peter 1: 3 -12 chi palu. Verse hili Peterwui khamataiya hangda khalei tui chi khikhala?**

Peterna Avava kala Anao Mayarawui pongli kapi. Kala ana Mangla Katharawui ot kasawui ponglila kapiluishita. Hili langkhamamei tuipam khangatei apongilila hanga.

1 Peter 1:3 li Peterna vareshi akhawui pharaluishit kajiwui maramli hangmi. Chieina Jishuna athumli kathiwui eina kharing mirin chi khuirami. Kala mashiman kapaiya katang makhavaiya kazingram chi yarmihai. Chiwui vang eina Jishuna kathiwui eina ringkhalui hi vareshi bingwui makhangapata chihan kapai ngasai. Hiwui ngashit khami hi New Testamentwui lairikli ithumna kachungkha samphanga.

Hina vareshi bingwui vang ringkapha khamathan samphang kapai ngasai. 1 Peterli vareshi bing china chotchan samphangda khalei saikora chi shitkasangwui chang khayang ngasai. Hina athumwui shitkasang chi ngatarngasaka. Sina ākachanga rangkakhui kathāna. Peterwui chithi pakakhuiya athumna Jishuwui ot kasa saikora chi kathei masamphangrarsalala awui tui chi pakhuida athumna Jishuli leikashi eina Ali shitsangtita. Kala chiwui athei chiya kahui samkaphang hi ngasai. Makhangacheiya kala mashiman kapaiya yarkhami chi shimluikat sada samphang khavai Jishuna ithumli ngashitmihai. ( 1Peter 1:4)

Achalakha maran bingna ngashitmihai kasa 'lukhamashan tashungmiki kaji' chila Peterna hangmi. ( 1Peter 1: 10) Jishu Christana okathuili mararanglakha maran bing china lukhamashan huikhami chi makhunlak eina phai. Jishuli khalei huikhami chi athumna samphangai. ( 1Peter 1: 10)

Peterwui chithi pakakhuiya athumna khamashungwui chotchan samphanga. Athumwui shitkasang wuivang rekkhareka. Kha chili langkhomei kapha eina makaphawui rai khangarar leidalei kaji Peterna athumli theingasaka. Mirinwui kasak kayakha ralala khamashung shitkasang chili pheisintit khavai hangmachinmi.

**Kazingramli nawui vang ngaranmihaili kaji 1Peter 1:4 chili hanghaida leili. Hili hangda khalei khamashung tui hi nawui vang kayakha vashungda ngarankhami ngasakhala? Matakakha kahai ngashit khami tui chi nawui ngasala?**

**Wednesday**

**April 5**

**Huikhamiwui rin kharing ( 1 Peter 1: 13 -21)**

**1 Peter 1: 13 – 21 chi palu. Khiwui vang vareshi bingna kathara shitkasang mirin ringphalungra khala?**

1 Peter 1:13 chili Peterna 'chiwui vang eina' da haophoka. Khangacha eina hiwui tui shikachin hi hanghaikasa tui chili pharonkhuida khamataiya akha theingasak khangaiwui tui akhana. Aya Varewui lukhamashan pongli Peterna hanghaira. Kala vareshi bingna Jishu Christali khalei kachihan ponglila hanghaira.

Vareshi bingna shitkasangwui lukhamashan eina kachihan hi lei. Chiwui vang Peterna khalatta ngarinda " ningkharikda honpam khavai" kasatmi. ( 1 Peter 1: 13) Kaja huikhami hi Jishuwui eina samkaphangna. Vareshi bingna makhangacheiya shitkasang leiphalongra. ( 1 Peter 1: 13)

**1 Peter 1: 13 chi palu. Vverse hili Varena ngaranmi kahai lukhamashan kaji hi khili kahang khala?**

Vareshi bingwui kachihan hi Jishuwuili lei kaji hangmi. Kha huikhami samphang kahaiya bingna ngarinda okthui khavai tharlak eina hangmi. Vareshi bingna kathada kathara shitkasang mirin ringpai khala kajila hangmi.

Khare sada kathara kala makhangachei shitkasang leikhavai Kasa Akhava Vare khipakhala kaji theishingkhui phalongra. Kaja " Vare hi katharana" da Peterna Leviticus 11: 44,45 chili kapikahai chi hangmi. Chiwui vang eina Jishuwui thi kashura bingna tharda okthui phalongra. ( 1 Peter 1:15 -17)

Kakhane sada, khiwuivang eina vareshi bingna kathara mirin ringphalongra jiaakha, mi kachivali athumwui ot kasa athishurda bichar sara. Varena mashunwui bichar chi sara. Mi avavawui ot kasa athishurda ana saman khuiramira. ( 1 Peter 1: 17)

Kakathuma sada, vareshi bingli huimihaira kaji hi khamashunga tuina. Jishuli khuikasanga saikoralu Christawui aman kasaka ashee chieina lokhuhaira. ( 1Peter 1: 19) Morei kaphunga bing wuivang kahui samphang khavai ngatangkhumi apong hi rilak eina okathui masakhuiranglakha ngaranmi hairasai. ( 1 Peter 1:20)

**Na khiwui vang vareshi akha ngasahao khala? Mashitkasanga mi akhana na khiwui vang vareshi akha khangasa khala da ngahanshije, nana kathada ngahankara?**

Thursday

April 6

**Akha eina akha leikashi ( 1 Peter 1 :22 -25)**

**1 Peter 1:22 -25 chi palu. Vareshi kaji hi khina da Peterna hangli khala? Kathara kala makhangachei shitkasang or ning tongda shitkasang kaji hi khikhala?**

Khamashung chili khuisangda kahang khangana hina vareshi bingli tharkhamei mirin khuirai kaji Peterna 1 Peter 1:22 li hanga. Greekwui tuili “ *pure*” kaji hi “ *holy or holiness* kajiwui kakhalatli nganailak kahai kakhalatna. Hangda khalei tui khani hi 1 Peter 1: 15 li Peterna kahang chili ngaraichai. Vareshi bingna athumwui rin Jishuli khuisangda rahika. Chieina athum Varewui naongarana da theikhui. Hi khamashungli kahang khanganawui otsakna.

Hikatha khangacheiya mirin hina phakhamei rin rashung ngasaka. Chieina athumna shitkasang chi athumwui khamashita mibingli hangmaronmi. Peterna hiwui khangashik hi theikhui khavai shimkhurwui khangashikli pantam sai. Varewui naongara bingna chinao ngarawui leikashi chi leilu da Peterna hangmi. Akha eina akha leishi ngaroklu da Peterna 1 Peter 1: 22 lila hanga. Ana ‘*leikashi*’ li *philadelphia*’ da hoi. Hiwui kakhalatta chinao ngara bingwui leikashi kajina. Hikatha leikashi hi shimkhurwui alungli lei.

Greekwui tuili leikashi hi tui khangatei einala hanga. *isphilia* kaji hi ngasotnao khamashitli kahangna. *Iseros* kaji hina prei-gaharwui leikashi, kala *isagape* kaji hina uklungli khalei masākhamaowa mibingli kapha samikhangaiwui kashenga leikashi china. Peterna akha eina akha kakashunga uklungwui leikashi *agape* kajiwui tui hili kharinna. ( 1pter 1: 22) Hiwui kakhalata mibingli kapha samikhavai ningai khaleiwui leikashi kajina. Hi pharaluishit kahaiya miwui uklungli lei. ( 1Peter 1:23, 1Peter 1:3 hila palu) Biblena hangkahaiya chili khuisangda kharinga athum bing chna pharaluishit kaje mirin samphanga. Hiwui leikashi hi Varewui eina khara leikashina. Khalattawui vang kaphaninga athumwui uklungli hi maleimana. Chiwui vang hikatha kakashunga leikashi hi khamashung chili kahaoda kahang khangana bingli lei da Peterna panglak eina katom khami tuina.

**Ithumna kathada leishi khameiya rin ringkatheiya ngasapaira khala? Kakashunga uklungwui leikashi chi leikhavai ithumna kathada kapha chi kapangkhuira?**

Friday

April 7

Ngarum kasanga: Selected Messages, book 1 wui “ Perfect Obedience Through Christ” page. 373 -376, kala “ Christ the way of Life” page 365 -368 chi palu.

1Peterwui lairik chapter khare chi thuklak kahai akhana. Hili Peterna Varewui pongli kathuka hangkhangai mida leili. Avava, Anao Mayara kala Mangla Katharawui maramli kapiphoka. Avava Varena ithum wuivang Anao Mayara Jishu Christa chihorami. Jishu Christali zangda ithumna kathara mirin ringkhavai ithumli kapangkhu. Chiwui vang ithumna Awui leikashi chili zangda mathanda ringphai. Khiwui vang khala jiakha Ana thimida ringkhalui china mashimankapaiya ithumwui yarmet sada ngashitmi kahaina. Hi ithumna samphangkavai kazingramli ngaranmihaida leili. Ithumna chotchangda okthuilala Christali zangda kahui samkaphangwui ringkapha khamathan chi samphanglakra. Kakhanang sikafa mirin phungda okthuida khaleiya mibing saikorali Peterwui letter hina ithumli shitkasang ngatar khavai pangshap mida leili. Mirinli kasuiwui siphon kachungkha rada Vareli shitkasangli samphangpai. Kha Peterwui letter pakakhui mi kachivana khamashunga rin chi ringkhavai katom khamiwui chithina.” The Acts of Apostles, ( Leaders;Teachers) page 517.

Vareshi bingna kathara mirin ringphalungra. Khashunga mirin ringda leili kachi athumwui mirin otsak acham china chithei phalungra. Kala uklung katharawui leikashi kala lumashan kathei hi church mi kachivana sachithei phalungra.

**Ngapheirum khavai: 1. Wednesday thangwui akatanga question chi yangluishitlu. Ithum kathada vareshi akha ngasahao?**

**2. Jishuna kathiwui eina ringkashokwui pongli Peterna khani shita chapter khare chili kapisanga. ( 1 Peter 1:3,21) Jishuna kathiwui eina ringshokluishit kaji hi khiwui vang ithumwui shitkasangli matailak haokhala?**

**3. “Masashiman kapaiya yarmet” kajiwui pongli Peterna matui ( 1 Peter 1:4) Hiwui kakhalat khikhala? Okathuili leida khalei otyur saikora mik khayipkhawui lungli shimanhaora kala ngahuihaora kaji majukva yanglu. Chitha akha ithumli matakakhak kahaiya ngashitmi kahai yarmet chi phaningvalaga myakha khamahaiya ngasada leili khala?**

**4. Kakhanang kachot kaphunga mirin okthuilala ngashitmi kahai chi phaningungda kayakha shitkasang mataisang kapaiya ngasa khala?**

## Pāngmon bingwui wungram

## Sabbath Ngazin – April 8

**Haptali pakhavai:** 1 Peter 2: 1-3; Hebrews 4: 12; 1 Peter 2: 4 -8; Isaiah 28:16; Exodus 19: 3-6; 1 Peter 2:5,9,10.

**Ningphun:** “ Kha nathuma kapangkhui kahaiya miyurna, wungnao pāngmon-shārvana, kathara yurna Varewui mibingna, kaja nathumli tangkhamangwui eina matakkhak kahai kahorli thānshokmida Awui kahor chi mibingli hāshokmi khavai nathumli hokhui kahaina.” (1 Peter 2: 9)

Peter hi Jehudi bingwui zatkhana, dharmā kala ngashanli ngaphumlak kahaiya mi akhana kaji awui kakapi eina chithe. Ana Varewui mibingli “ kathara miyur” da hoi. (1 Peter 2:9) Achalakha Old Testament li Israel miyurli hokasa takam eina ana New Testamentlila ngaraikacha tui shichinna.

Jishuli shitkasanga Gentile bingla Jehudi shitkasanga bingli khokha sada ngarum kahaina. Khokha yangkha kasa kaji hi khikhala kaji Romanswui lairikli kapihaida khalei Bible tui china ithumli theikhui khavai ngachonmi. Shebshi tuili “ grafted” da kapihai hiwui kakhalatta “ āphang or ākhai khani khangasun or ākha khangasā kajina. Hithada sada kadhara shitkasanga miyur china Varewui miyur Jehudi bingli ākha khangasa –khangarum kajina. Old Testamentli Jehudi bingli ngashitmi kahai chi shitkasanga Gentile bingwui vangla khamahai chili ngarum kahaina. (Romans 11: 17, 18)

Peterna athum bing chi Varewui kapangkhui kahaiya miyurna kaji Peterwui lairikli kapikahai verse bing chili ajawui haptali kathei samphangra. Athumli kathara otngarut sakhavai hokakhuiwui pongli ana hangmi. Olivewui ārongli khangashika āphāng ngasahaira. Olivewui arong kaji hi Jishuli kahangna. New Testamentwui atamli kharewui shitkasanga bing chili chisin kahai otngarut chi achalakha Old Testamentli Israel mibingli chisinmihai kasa otngarut china. Chiwui otngarut chiya Jishuna ithumwui morei pheomida huimihaira kala Ana katang makhavai kharing chi ithumli mihaira kaji chanpao hi mibingli hangchitheimi khavai horsang khami hina.

## Sunday

## April 9

## Vareshi ākha thāda kharing ( 1 Peter 2 : 1-3)

1 Peter 2: 1 chi ‘ *chiwui vang eina* ’ kajiwui tui hieina haophoka . Hiwui tui hi khangacha eina kachikatha khamataiya tui rida hanghaikasa khalei wuivang shikachinna. 1 Peter wui lairikli kapisang kahai chi Jishu Christana ithum wuivang kathada samihaira kaji ithumli theingasak haira. Chiwui vang ithumna Awui huikhami yarkhami chili kathada kahang nganada zatpaira khala kaji tamchitheimi. Tamvakikaji chapter hili ithumna hiwui pongli mataimeida tamra.

**Ithumna kathada ringra khala kajiwui pongli Peterna 1 Peter 2: 1-3 chili kathada hangli khala?**

Varena Awui thikashura vareshi bingli apong khani eina ringngasakngai. Khare sada, ithumna horhai phalungkikaji ot. Kakhaneli, Vare wuivang kapha samida kharing kaji khani hina.

Kharena, Nawui otsak acham aram kala ningkachang china mibingli masaza kapaiya ngasa phalungra kaji Peterna vareshi bingli hangmi. Kala vareshi akhana kakapika tui mamatui phalungmara. Khamashung tui matuida kharinga ngasa phalungra. Kala mikpai kashi hi vareshi

ithum bingna maleiphalungmara. Kha ithumwui khalei chili ningyang ungda shapa kaji phaning katheiya ngasa phalungra. Chieina Varena ithumli maikhaya ngasangasakra. Kala vareshi bingna mi katei bingwui tungli morkasap tui matuida makapha tui mamatui phalungmara.

Kakhaneli, angangnao bingna na mangkhangai rakachang kathawui pongli hanglui. Vareshi bingna phakhameiya manglawui rink haring pongli hangmi. Vareshi kaji hi khalattawui makapha horkahai chimang majimana. Kaja Jishuwui thi kashura vareshi akhana khalattawui makapha chi horhaida juikhameiya rin kharing hi phakatheiya ngasa phalungra. Kaja hi makhalei tharan vareshi kajiwui aming hi arema kathana. Vareshi akhana manglawui kashak kaza thangkachida khuiphalungra. Angangnao bingna avavawui na mangkhangai rakachang thada vareshi bingna manglawui rakachang hi leiphalungra.

Manglawui kashak kaza samphang khavai apong chi Peterna hangchitheimi. ( Hebrews 4:12; Matthew 22:29; 2 Timothy 3: 15 – 17) Manglawui kashak kaza samphang khavai angayung chi kharinga Bible hina. Varewui tui khuikasang hina ithumwui mangla kashak kaza ngasai kala hina ithumwui vareshi rin mataisang ngasakmi. Kala hina manglarin reisang ngasakda kapha – kashi theishinghui ngasakmi. Bible hina Jishu Christawui rin tharza eina theikhui ngasaka. Kala Vare khipa khala kaji Jishuna ithumli theikhui khavai azak ngasami.

**Varewui tui ithumna thangkachidawui kashak kaza thada khuisang phalungra. Makapha ot horhaiphalungra kaji hi Peterna khiwui vang ithumli ngasharkhavai hangmida khalei khala?**

**Monday**

**April 10**

**Kharinga lunghar ( 1 Peter 2: 4 -8)**

**1 Peter 2: 4 -8 ( Isaiah 28:16; Psalm118: 22; Isaiah 8:14,15) hi pakhuilu. 1 Peter 2: 4-8 chili Peterna khamataiya khamashung hangda khalei chi khili rinda kahang khala?**

Mangla wuivang rakachang kathai hi leilu kaji Peterna hangda leili. Kala Peterna Jishu Christali rinda hanglui. Jishuna kharingawui lunggui china. Peterna lunggui hi Jerusalemwui temple chili chizada hanga. 1 Peter 2: 4-8 chili Peterna Old Testamentwui verse kathum shupkhuida hangmi. Jishuna Awui church semkakhavai akhoka ajathekwui lungguina da hangma.

Varena Jishu hi manglawui church semkakhavai akhoka lungguina da Peterna hanga. Vareshi bing hina Vareshim semkakali zangda khalei kharinga lunggui akai bing ngasai. Church hi Jishuna haophok khamiya shimna kala Ali kashura bing china semkakhavai machāk akai akha katha ngasai.

Vareshi akha khangasā kaji hi vareshi ahang akhawui church akai akhana. Chek akai kachungkhana shim semkaka thada vareshi naongara bingna shitkasanga bingwui church akai akhana. Chek bing china chaiyang kahai tharan masamkapaimana. Chithada sada ngakai khangarok chitharan Jishuwui thi kashura vareshi bing da mahopaimana. Varewui wungram semkakhavai vareshi naobingna khokha ningkha sada ot sakrumshon phalungra. Hithada makasa athum bing chili khamashunga vareshi da mahopaimana. Kaja Christawui mingli rahik kahaiya athum saikorana Awui church azingli lei.

Church lingkaka hi khiwui vang khala kaji Peterna hangmi. Church hi kathara pangmon bingna sakaka ngasada ‘manglawui hanphut kachigata’ bingna ngasalu da Peterna hanga. ( 1Peter 2:5) Hebrewwui Bibleli pangmon bing hina mibing eina Varewui alungli otram ngatha khamiya kathara otsin singkakhame ngasai. Peterna ‘ temple’ (khorum khavai shim) eina

'pangmon bing' kaji hi hanga. Church hina 'Varewui kharinga shimna' kala Awui mibingna ' pangmon bing' na kaji hina theingasaka. Old Testamentli chithei khami khamashunga khokharumwui otsak china aruihon ithum vareshi bingwui vang kathada Varena khuisang kapaiya kharing ngasada okthuipaira khala kaji Peterna hili theingasakmi.

**1 Peter 2:5 chi paluishitlu.manglawui khuisang kapaiya hanphut kachikat kaji hi khina da Peterna hang khala? Vareshi bingna hili kathada khuili khala?**

**Tuesday**

**April 11**

**Ngashitkahi miyur ( Genesis 17: 1-4)**

Peterna Old Testamentwui kapikahaili ning zanglak eina awui chithi hi kapi. Ana 'mayakhangarokwui tuingashit' ' covenant' kaji hi Old Testamentwui eina matailak eina khuida kapi.

" Covenant" kaji hi Hebrewwui tui 'berit' kaji tui eina kharana. Hiwui khalat kashok athishurda group khaniwui alungli maya khangarok khuikhara kajina. Hi mi khaniwui alungli mayakhangarok dala theikhui. ( Genesis 31:44) maning akha awunga khaniwui maya khangarok kajilila hangpai. ( 1Kings 5:12) Nlrv bible translation lia 'berit' kaji hi 'maya khangarok" da khalatshoka. Maning akha awunga eina awui mibing mayakhangarok kajilila theikhui. ( 2 Samuel 5:3)

Kha matailak eina hili Vare eina Awui miyur bing mayakhangarok tuingashit kajili hangda khaleina.

**Genesis 17: 1 -4; Exodus 2: 24 kala Exodus 24: 3-8 chi palu. Israel naobing eina Vare mayakhangarokwui tuingashit kasawui pongli hili kathada hangli khala?**

Varena Abrahamli kathada tuingashit sahaikhala kaji haokaphoka Bibleli hanghaida leili. ( Genesis 15: 9 -21; Genesis 17: 1 -27) Awui miyur Israel naobingna Egyptli rao sada leilakha Varena Awui tuingashit chi phaningunga.( Exodus 2:24) Chiwui thili Varena Awui ningkhami Thara khami chili latluishitda mi. Kala khangatei ain bingla Israel miyurli Varena mi. (Exodus 19: 1-24:8; Exodus 24: 3 -8)

Varena tuingashit sakahai samphangkapai apong mihai. Kaja Varena Awui mibingli ngashit kahai chi unghung khavai mibingna Ali makhangapata shitkasang ningkatong leiphalongra. Athumna Awui ningkhami mayon phalongra. Chithada kasa tharan Ana athumwui shimkhur bingli somida athumna kasasa saikora maikhaya ngasa ngasakra.. Testimonies for the Church, Vol. 2, page 574.

Varena Awui mibingli somira da ngashitmihai. Kha chi athumna khuisangda Awui ain khamayon chitharan unghung ngasakra da ngashitmihai. Kala chimang maningla Varewui ngashitkahi ningkhami chili kahang makhangana bing chili kashiman rashungra dala ngashithai.

**Vareshi khamaya tuingashit kasa kaji hi nawui vang khina da khuikhala? Hili nawui sakhangayi saran khi leikhala?**

**Wednesday**

**April 12**

**Pangmon bingwui wungram ( 1 Peter 2: 5,9,10)**

Exodus 19: 3-6 chili Prohona Mosesli hanga. " Jacobwui shimkhur iwui miyur bingli Ina Egyptli sami kahai nathumna theikahai chi hanglu. Ina nathumli khalangwui angachangli khuiphungda khuishok khami chi yanglu. Ara Ina ngashitkahi tui chili khuisangchaoda chiwui kahang nganalu. Nathumna chithada sāakha miyur bingwui ngachaili nathum lwui kapangkhui

kahaiya kasaka lan ngasara. Okathui saikora hi lwuina. Kala nathum wungnao bingwui sharva ngasara. Nathum lwui kathara miyurna. Hi Israel wui mibingli hanglu.”

Hili ithum wuivang paokapha mihaida leili. Ngashit kahai hi Jishuna crossli mathimirang lakha zingcum thingthingwui mamāngli mihaikasana. Varena Awui mibingli huimi. Moreiwui raopam eina ngatanghuimi. Chieina Ana Ali leishida Awui kahang nganakkhavai kasohai. Kaja athum Awui ngakheikhang kahaiya miyur ngasada okathuili Awui shakhi mikhavai miyur ngasai.

**1 Peter 2: 5,9,10 kala Exodus 19: 6 chi palu. “Kathara yur” kala “wungnao bingwui sharva pangmon” da Peterna kahangwui kakhalat khikhala?**

“Kathara yur” “wungnao sharva, pangmon” kala Varewui mibing” kaji tui bing hi khaya kakawui tuina. Abrahamwui naotun bingli Varena khangashik khaleiwui pongli Biblena chithei khamina. Peterna Jishu kala crosswui pongli kahang tharan hiwui tuili ngaraichada hanga. Ana hi churchwui mibingli hangda khaleina. Jehudi Israel naobingli ngashitmikahaiya tuingashit chi Jehudi makhaninga Jishuli khuisangda shitkasanga Gentile binglila ngashitmi kahina. Jishuwui manga eina Gentile miyur bingla Abrahamwui naotun sera. “ Christali kazanga saikora chi Abrahamwui atheisera. Chiwui vang eina nathumla Varena ngashitmi kahai chi samphangra.” ( Galatians 3: 29) Christali kazanga kajivana “wungnaowui sharva,pangmon” ngasara. Athumna Jehudi miyur khaon makhaon china maningmana.

**Church akhawui lungli ithumli Kathara yur kala wungnaowui sharva-pangmon bing kaji mingpho khami hina ithumli kachikatha rin ringngasak? Ithumli hiyakha juida khaya khami hieina ithumna kathada juikhameiya rin ringpaira khala?**

**Thursday**

**April 13**

**Vareli sokachikat ( 1 Peter 2 : 10)**

New Testament eina Old Testament hi apong kachungkhali ngaraichai. Khanini hili church hi huikhamiwui khamashung chi samphanga. Kala church hi Varena kapangkhuida hoshok kahaina da hanga. Khiwui vang or khisakhavai vang hoshok kahai kala kapangkhui kahai khala kaji Peterna hangmi.

Varena Awui khangaran apong khalei chiwui vang church eina Varewui khangashik hi leikhangasakna kaji Peterna hangchithei. Vareshi bingna Vareli masot mikhavai hokakhuina. Varena athumli tangkhamangwui eina matakakha kahai kahor chili thanshokmi. ( 1 Peter 2:9) Achalakha Old Testamentwui tamli Israel naobingli Varewui ot sakhavai hokhui. Athumna okathuili Varewui shakhi akha ngasakhavai hokakhuina. Okathui saikoralisomida huikhavai kasa hi Varewui ningkachang kala khangaranna kaji theingasak khavai Awui miyur Israelnao bingli hokakhuina.

**Deuteronomy 4:6; Deuteronomy 26: 18,19; Isaiah 60: 1-3; Zechariah 8:23 chi palu. Verse bing hiwui ngaraikacha khi leikhala?**

Israel hi Varena ngashit kahai miyurna. Okathuili ngatang khamiwui pao kapha hakashok hi athumwui otngarut ngasai. Chi takam eina aruihon vareshi ithumlila chikatha ngatangkhamiwui pao achikun peida ngayao khavai hokakhuina. Kala Christana okathui morei kaphunga bingwui vang kathada samihaira kaji okathui peida ngayao khavai hokhuikahaina.

**1 Peter 2: 10 chi palu. Vareshiwui otngarut sakhangayi verse hina kathada hangmili?**

Okathui hi moreina pemkahai, kathi kala kashimanwui chotchan na shirenda khalei okathuina. Kha shimankapai okathui hiwui eina ngatangkhui khavai Jishuna Awui mirin chigatmi. Israel miyurli khayakaka mihaikasa chi Jishuwui manga eina arui vareshi ithumli



mihaira. Chiwui vang ithumla ara wungnao sharva-pangmon bingna, kala kathara miyurna. Israel miyurli khayakakawui mingpho khami mang majila mi katei bingli Jishuwui ngalemli khuikhara hi athumwui otngarut ngasai. Chikatha khaya kakamang majila ngaraikacha otngarut chi ithumlila mihaira.

1 Peter 2: 10 chili Peterna hanga, Nathumli rida Varewui miyurna da mashansamana. Kala lukhamashan samphang khavai apong maleisaman. Kha ara nathumli Varewui naongara hohaoda lukhamashan samphangpaihairs. (Hosea 1,2) kathara da Bible hangkahaiwui kakhalatta Vareli masot chigat khavai kala khorum khavai miyur kajina. Chiwui vang eina vareshi bingna kathara miyur akha ngasada hokhuihaoda Vareli khokharuma miyur ngasahaowa. Kala Vareli khokharuma miyur akhawui kharing kharak chi mibingna tamkhui kapaiya rink haring ngasāphalungra. Athumna tangkhamangli horkhamiya thaomei thada kala meina lumkhangasak thada mibingli vareshi bingwui mirin kharing china katei miyur bingwui kahui samphang khavai apong ngasā phalungra.

## Friday

April 14

**Ngarum kasanga:** “Varewui miktali church hi aman kasaka lanna. Churchwui lan khalei wuivang, pangshap khalei wuivang kala aming kazat wuivang maningla kha okathuiwui eina ngateihang kahai kathar khalei chiwui vangna. Ot khanili Varena aman kasaka lanna da khui. khare sada, Churchwui member bingna Christawui awor otsak acham matai kasang. Kakhane sada churchwui manglarin kayakha mataisangda leili khala kaji khani hili mtailak eina khui.

“Varewui luipam da theikhui church hili khalattawui vang maphaningla kathara rin kharingwui athei samkaphang hi Christawui ningkachangna. Churchwui member bingna leikashi eina kapha samikhangarok hi awui ningkachangna. Christawui mahut sada khaleiya Awui thikashura bingna lukhamashanwui otsak kapha sakhami hili langkhamei kapha maleimana. Shitkasanga bingwui mirin lukhamashan leikashina kuinammi. Chieina Mangla Kathara china athumwui ning-uklungli ot sakrumma. Chieina athumna “mirinwui nganamkapha thao” kathā ngasai. Mangla Katharawui yarkhami lukhamashan chiwui manga eina Varena ithumli ot sacrum chingda lei. Hithada Awui ot ungshung khavai somi.” Christ’s Object Lessons, Page 298.

## Ngapheirum khavai:

1. Tangkhamangwui eina kahorli thanshok khami kaji hi khili kahang khala? ( 1 Peter 2:9) Kachikatha Jishuli makhuikasang mili nana kathada hiwui pongli hangchitheimi paira? Tangkhamang kala kahor kaji hi khikhala? Peterna tangkhamang kala kahor da hangda khalei hi khiwui kakhalat khala? Khani hiwui khangatei chi khikhala?
2. Deuteronomy 4: 5 -8 chi palu. Seventh day Adventist ithumli hina kathada hangli? Ana ithumli kayakha samikahai wuivang Varena ithumli ot chi sakhavai hokakhuiwui pongli verse hina kathada theikhui ngasakli?
3. 1 Peter 2: 3 chila palu. Peterna “... ara Proho hi kayakha kapha Vare khala kaji nathumna mazapyang haira” da kahang hiwui kakhalat khikhala? Proho hi kapha Prohona kaji nana kathada theikhui?
4. Seventh-day Adventist makhaninga mibingna Adventistwui shitkasanga member bingli kachikatha mibingna da theili khala?

Lesson 4

April 15 - 21

**Miyur katei bingli ithumwui khangashik**

**Sabbath Ngazin – April 15**

**Haptali pakhavai:** 1 Peter 2: 13 -23; 1Peter 3: 1-7; 1 Corinthians 7: 12 – 16; Galatians 3: 27,28; Acts 5: 27 -32; Leviticus 19: 18.

**Ningphun: “ Kala ākha eina ākha leishi khangarok hina mataimeikapa kaje khayon kasā saikora chi leikashina pheomida farormi.” 1 Peter 4:8)**

Peterwui chithi khare chili atam chitharanwui societywui lungli kasak samphangda khalei chili kathad sapaira khala kaji pongli hangmi. Example sada, sakashiya kala makapha government rampān alungli vareshi bingna kathda ringpai khala? Peterna athumli kathada hangmi? Kala ana hangda khalei chi aruihon ithumwui thotli kayakha eina tangda chi sapaira?

Vareshi raonao bingna sakashiya lukhamashan makhaleiya akhavawui azingli kathada ot sapaira? Aruihon governmentli kala privately ot sada khalei bingwui khangashik eina achalakha Peterwui atamli arao bing eina akhava bingwui khangashik hi ngatei. Kha kachikathāna mashunglak eina makasā, michang mikhai khanaiya ākhavāwui azingli sada khalei athumbing chiwui vanga Peterna hangda khalei tui hi mashunglak kahaiya kakhalat khaleiya tuina. Peterna kathada Jishuli chizamida hanglikhala kaji theikhuisa. Vareshi ithumli zakshilak eina kasā mibingli kathada ithumna ngasungra khala kaji Jishuna ithum wuivang chitheimihaira. ( 1 Peter 2: 21 -24)

Prei-gahar akha eina akha kachikatha otsakrin ringphalungra? Aniwui ngachaili mamaya khangarok khalei chitharan kathada sapaira?

Naomeithuida vareshi bingna governmentli kathada ngashikpaira? Vareshi bingli khamunga government china makhamashunga otsak kasa tharan kachikatha acham eina ngasungra?

**Sunday**

**April 16**

**Church eina Government ( 1 Peter 2: 13 -17)**

Bible hi achalakha kapikahaiya tuina jilala vareshi bing eina khamunga government hi kathada khangashik leikhala kajiwui pongli kapisangmihaida khalei chi aruihon ithumli khamataiya tamkhui khavai akha ngasai.

**1 Peter 2: 13 -17 chi palu. Verse hina kathada vareshi bing eina government khangashik khaleiwui maramli ithumli hangmili?**

Achalakha Romena munglakhawui atamli zakshilak eina sakasa chi theiser kahaina. Atam chitharan sakashiya Romewui mibingna munghaoda athumli makhamaya mibingli zakshilak eina rekkhareka kala kachungkhali sathata. Athumwui yangkashe bingli chotchanglak eina rekkharekda kaikhali cross tungli shaothata. Rome wui government hi michang mikhai salak kaje government akhala ngasasai.

Chiwui vang Peterna Rome wui government chi kayakha zakshi khala kaji thei. Kha mungda khalei wungrei pangshap (government) chili Romewui ramungli okthuida khalei varesahi saikorana Varewui mai yangda hamsangda okthui khavai katommi. ( 1 Peter 2: 13,14)

Khamunga awunga eina pangshap kasinga governor bingna khayon kasa bingli tandi mi, kala khamashunga kasa bingli masot mi Chithada yaruipanli athumna khamataiya sada yangsanga.

Romewui wungpanli makhamashunga khangwui kachungkha lei. Kha khamunga yangsangkhame akha ngasada yarui bingna chiham khavaila ngasai. Kaja Romewui government china yangkashe bingwui rai rakata chiwui eina makarmi, apam saikorali shongfa ngarui khavaila semi, kala mibingwui kharing kharak apongli mathakhavaila phaningda kashang kacham saikora wuivang yangsang khame ngasai. Ramwui ain chi sashilak kahai ain ngasalala ramwui shiyon chikanli mathakhavaila ngasami. Chiwui vang Peterna hi theida khamunga governmentli khayashida kapha ruichumnao akha ngasakhavai tamlu da kasoi. Kashap eina tangda ngalei khamungawui ain chili kahang nganalu da hanga. Government china makashunglala vareshi bingna khamunga chili kahang nganada zatphalungra.

**Government china makashunglala kala zakshilala vareshi bingna khiwui vang kashap eina tangda kapha ruichumnao akha ngasa palungkikaji khala? Kapha government ngasa khavai nana kathada sapairakhala?**

**Monday**

**April 17**

**Akhava bing eina Rao bing ( 1 Peter 2: 18 -23)**

**1 Peter 2: 18 – 23 chi palu. Verse hina hangda khalei hili nana kathada theikhui khala?**

Akhavana shimwui arao kahaiwui otsakli mamayamana kaji ithumna munlak eina verse hi kappa tharan kathei samphanga. Kha kasaka chotchana samphangda khalei athum bingli mangla rinwui katom khami kasatkasang chi mi.

1 Peter 2:18 chili *isoiketes* kaji hi 'rao' da khalatshoka. Romewui akhavana shimli ot samikhavai arao kahai chili kahangna. Atam chitharan Rome wui ngaleili khalei miyur bing chi kateo kahak ngatei ngateida khaikhangarok hi leisai. Rao bing hi akhavawui shimli otram ngathami khavai thongthang sada shikachina nemmeikap kaje mibingna. Chiwui vang mathada salala or zakshida sasalala athumna ākhavāwui ningkachang kasa saikora chili mangakaishirarmana.

Athummwui ningkhan hi lokhui kapiaya ngasai. Kachikatha akhawui leihman chi runmihaida ningkhan khami hili "*ngatang kakhui*" da theikhui. Paokazata Paulna ithum morei kaphunga bing wuivang kathada Jishuna runmihaira khala kaji hiwui eina theikhui ngasakmi. ( Ephesians 1:7; Romans 3: 24; Colosians 1:14)

Achalakha haokaphoka vareshi bing chi arao sakasa mibingna kaji ithumna mamalaipaimana. Chiwui vang athumwui mataika khavai thak chi athum khalattana masakhuipaimana. Aaro kaikhava sakashiya akhavawui pangla zangda kachot kachungkha phunga. Aaro kaikhana kapha akhavawui pangli pamda otram ngaya jisalala rao akhawui kasak kachungkha phungpama.

Peterna vareshi arao bingli apong kachungkha eina machinmi. Akhava bingli khayashida Christana kasak chotchana khara tharan hashiharimda kachang thada Awui mai yangda kashap eina tangda khangtheilu kaji tui hieina Peterna katommi. ( 1 Peter 2: 18 -20) Jishuna sachithei kahai acham chi tamlu da hanga. Khayon kasawui masot samphang khavai apong maleimana. Kha khayon makhaleiyana chotchana sipsat phungkahai chili Christawui manglana zangmida lei kaji mibingli tamkhui khavai theikhui ngasaka. Hikatha atamli makapha kasa wuivang makapha otsak mangaror khavai. Kala tui kasha matuilala makapha tui mashomkā

khavai, rekkhareklala mamachitla kha Jishuwui pheichon yunda mashun eina bichar sakhame Vareli horsang theilu da kasatmi. ( 1 Peter 2:23)

**Peterwui advice hieina ithumna khitamkhui kapai leili? Ithumwui mashun wuivang ithum manganingkapai phalung mala?**

**Tuesday**

**April 18**

**Preiva eina Gahara ( 1 Peter 3: 1-7)**

**1 Peter 3: 1-7 chi palu. Peterna verse hili hangda khalei chi khikhala? Aruihon preigahar khangashangli hi kathada khamataiya tui ngasahao?**

Peterna hangda khalei hili khamataiya tui theikhavai verse hili zangda leili. 1 Peter 3:1 chili Varewui tui makhuikasanga gaharawui pongli hanga. Chiwui vang vareshi preiva akhana Vareli makhui kasanga gaharali khangakumwui maramli Peterna kahang ithumna thei.

Vareli shitkasanga shanao akhana Vareli makatheiya akhali ngashang kapamwui kachot samphangra. Kachikatha kasak kala kachot samphangra da khui? Shanao pāva chi gahara chili panghaorala? Paulna hangkahai thada Peterna la vareshi preiva china gahara chili pangkhavai makatom mana. ( 1Corinthians 7: 12 -16) kha leishilak eina okthuida mibingna kapha acham chi shakhuikhavai kala tamkhui khavai sachithei phalungra.

Rome ngaleiwui shanao bingna shimwui thongthang lan khuikhavai mashun lei. Kala athumwui mashun wuivang bichar samikhavai ain lei. Kha 1<sup>st</sup> century atamli society kaikhalia preinao bing hi politicsli, governmentli kala churchli kathanna masapaimana kaji lei. Chiwui vang kachikatha pongli kala maphamli leilala khayakashiwui lungli okthuilu kaji hi Peterna shanao bingli kasatmi. Vareli khaya kasha eina kathar rink haring chi leikhavai hangmi. Kala samhak mathasek eina, sina phorsangda, shanvai chonvaili ayarwui tekkhamatei makahaola Varewui miktali aman kasaka uklungwui khamatha acham sari chi salu da Peterna hangmi. Apong khangateili hangsa jia kha gahara ngarali vareshiwui acham sachitheida khuisang kapaiya ngasalu kajina.

Peterna hangda khalei hi gahara ngarana preiva ngara bingli zakshida salu kajiwui shong kahang maningmana. Kha khanim khangahui eina preiva ngarali phaningmi katheiya ngasada lumtir eina ngasopamlu kajina. ( 1Peter 3:7)

Peterna mavareshi bingli khangakumwui pongli hanga jilala kakashunga mibingna shakhui kapaiya vareshiwui acham eina preigahar ngashangpam katheiya ngasalu da hangkhamchinwui tuina. Kaja akha eina akha katom ngarokda okthui phalungra. Athumna Vareli khayakashi khami chithangkachidawui otsak acham aram eina mibingli theikhui ngasaklu. Hina Vareli khokharumwui kharing otsak akhana.

**Wednesday**

**April 19**

**Mibingli khangashik ( Romans 13: 1-7)**

**Romans 13: 1 -7; Ephesians 5: 22 -33; 1 Corinthians 7: 12 – 16 kala Galatians 3:27, 28 chili Paulna khi hangli? Paul eina Peterna hangda khaleiwui khangatei kala ngaraikacha khi lei?**

1 Peter 2: 11 – 3: 7 chili hangda khalei chi Paulna kahang chieina ngaraichai. Khamunga bingli khayashida kahang nganalu da hangda khalei tui hi ngaraichai. Kaja khamunga mibing chili Varena kapang kakana. Athumna khayon kasa mibingli tandi mi. Chiwui vang

vareshi bingna mikharan kala mikhangayi chi mithei phalungra. Khashina mikhavai leiakha milu. Government li mikhangayi saikora chi mida ain chili khaya shilu. ( Romans 13: 7)

Mashitkasanga gahara chili preiva china leishitheida kathara mirin ringlu, chithada kasa tharan nawui kapha chi theikhuida nawui gahara china Varewui churchli ngarum paira. ( 1 Corinthians 7: 12 – 16) Kakashunga prei-gahar shimpan hi khikhala kaji Paulna hangmi. Hi akha eina akhawui kaphaning theingarokda ningkachang akhawui lungli okathui hina. Christana churchli leikashi chithada gaharana preivali leishithe phalungra. ( Ephesians 5: 25) Kala rao bing nala akhavawui kahang ngana phalungra da Paulna hangmi. ( Ephesians 6:5)

Societyli leida khalei zatkhana ain chiwui athishurda zatkhavai Paulna kasatmi. Chi takam eina Jishuna ramna zatkhana ngashan chili mayai. Ana yaruiwui ngashan zatkhana chi sashiman khavai masamana. Kala Paul eina Peter nala sashiman khavai masamana, kha kakashunga vareshi rin ringchitheida mibingna khuisang khavai otsakrin ringchithe. Hikatha mirin hi theida mibingwui mirin khangachei samhangpai.

**Galatians 3: 27: -29 chi palu. Vareshi bingna Jishuwui pheichon yunda kathada mi katei bingli Jishuwui rin chi theikhui khavai ringchithe paira.?**

**Thursday**

**April 20**

**Vareshi bing kala ainli kahang khangana ( Acts 5: 27 -32)**

Governmentla kala churchwui organizational makakashung khangazan lei, kashungchao kahai maleimana kaji Paul eina Peterna thei. Kaja ani khaninina theikahaina. Kha chithailala vareshi bingna khamunga governmentwui kahang nganalu, khashinala miphalungra kala kashap eina tangda kapha ruichumnao akha ngasalu da hangchithe. ( 1Peter 2: 13 -17; Romans 13: 1-10)

**Acts 5: 27 -32 chi payanglu. Peter nava khamunga pangshap chili kahang nganalu da hanga. ( 1 Peter 2: 13 -17) Kha paokazatta bing china Acts 5: 27 -32li kathada sa? “ mibingwui kahang khangapaliya Varewui kahang nganathura” da Peter kala pao kazatta bingna kahang chi khiwui kakhalat ngasa khala? Khiwui vang Vareli kahang khangana hina rimeithui kaje khamataiya ngasahao?**

Vareshi haokaphoka atamli manga kachungkha khava chi theida Peter eina Johnli tukkhuihaowa. ( Acts 4:1 -4) Anili dharmawui kathanna bing, khamunga bing, kala ain kathemma mibingwui mangali khuirada paokapha chi mahashoklui khavai hanghaowa. Chiwui thili anina athumwui kahang chi makhuisangla Varewui pao hashokzatshon haoda tukkhuihaowa. ( Acts 5:28) Peterna athumli ngahankai “ mibingwui kahang khangapaliya Varewui kahang nganathura” da Peterna ngahankai.

**Ithum wuivang paokazata Peterwui tui chi kayakha khamataiya khuisang kapai tui ngasakhala? ( Acts 5:29)**

Peter hi sakakhaninga mi maningmana. Sakakhaninga kaji hiya khamorli hangkhaninglaga otsak eina makasa kajili kahangna. Ithumna mibingwui tui nganakikaji palia Varewui kahang nganathura. Chiwui thili ngaleiwui khamunga governmentwui ain chi zatphalungra.

**Leviticus 19:18 kala Matthew 22: 39 chi paakha, nakhalatta leikashi thada nawui khongnainao li leishilu da kapihaida lei. Nawui khongnainao bingli leishida nawui society chi kathada mathakhameiya khuirapai khala?**

**Friday**

**April 21**

Ngarum kasanga: The Great Controversy ( War between Christ and Satan) kajiwui lairikli “ The impending conflict, page, 582 -592; “The scriptures a Safegaurd, page 593 -602; kala “ The time of Trouble, page 613 -634 chi pavalu.

Ellen Whitewui atamli yamthui kahaiya raobing chi akhavawuili hanung phalungra. Kha hiwui ainli EG Whitena mamayamana. Kaja okathuiwui ain chili Biblewui athishurda Varewui ain china mataime. Okathuiwui tuilia Varewui Bible tuina mataime. Okathuiwui aina raobing akhava bingli hanung phalungra kaji leisalal hikatha ain chili mamayapaiman. Kachikatha rashoklala Varewui ningkachanga ain chiwui athishurda zatthura. Raobing hi okathui mi kachikathawui property maningmana. Saikorawui akhava chiya Vare manga. Chiwui vang kachikatha mina awui azingli rao sada maleipaimana.” “ Testimonies for the Church, Vol.1, page 201, 202.

**Ngapheirum khavai:**

- 1. Vareshinao bingna athumwui mashun chiwui vang nganingtit kaji hi khangwuilā? Nawui mashun bing chi khimamei khala kaji majuklu.**
- 2. Mibingna theikhui kapaiya nawui societyli Kaphā khuirakhami otsakwui pongli vareshi bingwui khamataiya otsak chi khimamei ngasali?**
- 3. 1 Peter 2: 17 “ khamunga li khayashilu” da hanga. Hili hangda khalei khamunga kaji hi chitharanwui awunga sashimeikap kaje Nero li kahangna. Hili hangda khalei hina ithumli khi tamkhui kapai mili? Haokaphokwui verse chili Peterna kathada hangkhala kaji pāvālu. “ mi kajivali khayashilu.” Peterna hangda khalei hiwui verse hi palaga ngaleiwui khamunga bingli kathada khayashilu kaji khala? Hina ithumli kathada mathameida theikhui ngasakli?**
- 4. 1Peter 2: 21 -25 chi classli parumlu. Verse hina paokapha chi kathada hangmili? Hina ithumli kachihan khami chi khikhala? Ithumli kathada saluda hangli khala?**

## Vare wuivang kharing

## Sabbath Ngazin – April 22

**Haptali pakhavai:** 1 Peter 3: 8 -12; Galatians2: 20; 1 Peter 4: 1,2; Romans 6: 1- 11; 1 Peter 4: 3 – 11; 2 Samuel 11:4.

**Ningphun: “ Kaja mashun kasa athumli Prohona yangmi. Kala athumwui seiha kasā Ana khuisangmi. Kha makaphā kasā athumli Prohona mayangngai mana.” ( 1 Peter 3: 12)**

Morei hi kayakha zakshikhala kaji Bible kakapiya bingna thei. Okathuili moreiwui zakashi hiyakha leilaga athumna khisada matheira. Athum khalattala kayakha morei kaphunga mi ngasakhala kajila thei. Hangkhavai makhalei zakashiya morei hi kathada shimanpaira khala kaji phaningva yanglu. Jishu Christana khrushli chiyakha chotchangda thikhami hina moreiwui zakshat kayakha vashung khala kaji theingasaka. Ithumwui mirin ngacheingasak kashap kala kadhara mi akha ngasa khangasakwui pangshap hi Christa manga kaji hi kharinga Bible kakapiya bingna tharlak eina thei.

Vareshi bingna Christali khuisangda rakahik eina kadhara mi khangasawui pongli Peterna kapi. Hithada midhar khaon chitharan mibingna kathei samphangra. Phasawui ningkachang saikorawui kachot chili ngasungda khangararwui pongli Peterna hanga. ( 1 Peter 4:1) Ithumli ngashitmikahai khayuiya chi samphang khavai ithumwui phasawui chotchan phungphalungra.

Jishuli shitkasanga bingna leiphalongki kaje Bibleli hangkahi leikashi otsak saikora chi Peterna hangchithe. Leikashina khayon pheomida morei saikora khuithuingasaka. ( 1 Peter 4:8) Jishuna sachithe kahai kala sangasak khangai otsak chi ithum akha eina akha leishi ngarokda pheomikathei hina mibingwui mangali phongshoka.

## Sunday

## April 23

## Akha eina akha mayākhengarok/ning khangarum ( 1 Peter 3: 8 -12)

**1 Peter 3: 8 -12 chi palu. Vareshi bingna kathada ringpaira khala kajiwui pongli Peterna hili kathada hangli? 1 Peter 2: 20,21 hangkahi chi ana latluida kathada hangkhala?**

1Peter 3: 8 chili Peterna nathum akha eina akha mayangarokda leikashi eina ningkha salu da hanga. Hiwui kakhalatta nathum akha eina akha mayangarokda ning khangarumwui lungli khokha salu kajina. Greekwui tuili “ *one mind*” kaji hi “ *homophrones* da hoi. Hiwui kakhalatta kaphaning khangarum kajina. Peterna hili hangda khalei hiya mi saikorawui ning kaphaning ngaraichada kasa kajili kahang maningmana. Hiwui kakhalat hi ithumna mathameida theikhui khavai 1 Corinthians 12: 1-26 li hanghaida leili. Verse hili ithumwui phasa hi akai kachungkha eina sakakana da Paulna hanga. Chi takam eina churchla shitkasanga bingli yarmet ngateiteida khalei chieina sakakana. Athum bing china khokha kasa khangaruma church akha lingkai.

Hikatha khokha kasa hi pailak eina marashokmana. Chiwui vang Peterna shitkasanga vareshi bingli mangakai ngarok khavai hangmathinmi kahaiwui tuina. Chieina ngasoda ana kathada kapha vareshi akha ngasapai khala kajila hangmi.

Vareshi akhana mi katei bingwui kachot chili lumashan katheiya ngasa phalungra. (1 Peter 3:9) English tuili “sympathy” kajiwui kakhalatva kachikatha mi akhawui kachot kala

kakhanang chili phaninvamida awui kachot kala kakhanang chili phung khangarum kajina. Hi khokha sakapaiwui shongza apong akhana. Peterna hanglui, “nathum akha eina akha thuklak eina leishi ngaroklu” ( 1Peter 3:8) Malung nimkhameiya mi ngasalu. Kala akha eina akhawui kachot kala kasak saikora chili phaningmi katheiya ngasada lumashanmi katheiya ngasalu. ( 1Peter 3:8)

“Khalattawui ningai ningphum chi horhaida nali mi kateina phameiya da phaning theilu. Chithada kasa tharan Christawui lungli nathum khokha yangkha sapaira. Chieina okathuiwui mangali kala apug-apagvawui miyur saikorawui mangalila Varewui naongarana kaji nathumna shakhi mipaira. Hieina nathumna Varewui ming tekmatei ngasakshapra.” Testimonies for the Church, Vol.9, page 188.

**Nathum lumashan katheiya mi ngasalu. Malangso alu. Makapha wuivang makapha eina mangasunghai alu. Da Peterna hanga. ( 1Peter 3:8,9) Hi sashap khavai ithum khalatta kaji hi khiwui vang horhai phalungra khala? Kathada hikatha khalatta thikahai/ ningkachang horhaikashap kaji hi ngasapaira khala?**

**Monday**

**April 24**

**Phasawui chotchan ( 1 Peter 3: 18, 21)**

Jishuna ithumwui morei vang thimida ithumwui kahui samphang khavai kachihan ngasami. Hi Awui kathara mirin china ithumli khaluimida ithum kathara akha ngasa ngasaka. Chieina ithum Varewui mangali kathara mi akha ngasahaowa. Kala Jishuwui manga eina ithum Varewui mangali morei makhavaiya mi akha thada Ana ithum khuisangmi.” Steps to Christ, page 62.

Kha Varewui leikashi lukhamashan hi ithumwui morei pheokhami mang majila ithumna moreili yuikashapwui pangshap chila ithumli mi.

**1 Peter 3:18, 21 ; 1 Peter 4:1,2 kala Romans 6: 1 -11; hibing hi palu. Moreili yuikakhui eina kachot kachang kajiwui khangasun verse hili kathada hangli?**

1 Peter 3: 18 chili Jishuna thikhami hi kayakha hakkhamaha ngasakhala kaji hili kateikha kapisangmihaida lei. Greekwui tuili “hapax” da kapisanghai, hiwui kakhalatta “saikora wuivang akha shita” kajina. Hiwui kakhalat chiya Jishuna mi saikora wuivang akha shita thimi kajina.

Peterna 1 Peter 3: 18 -22 chi 1 Peter 4: 1,2 chili “so” kaja “chiwui vang eina” kaji tui hieina ngasun ngasakda khamatiya tui hangmi. Christana ithum morei wuivang thimi , chiwui vang ithumna Varewui zangpai, chieina ithum nala rahikda kahui samphangpai da Peterna hangmi.

Chiwui vang rakahik hina Jishuna chotchan pgungkahaiwui otsak khangarum sada ithum phasawui chotchan phungda moreili yuishap haira da Peterna kahang chi ithumli theingasakmi. China Vareshi bingli kanthui kahaiya phasawui khangamar ningkachang moreiwui mirin chi nothahaida phakhameiya Varena ningkachanga rin chi ringasaka. ( 1 Peter 4:2) Ithumna ithumwui thangkachidawui mirinli khalattawui phasarin tongkorda Proholi horsangkahai chitharan Varewui ningyang khaunga rin chi ringshapra. ( Galatians 5:24)

**Moreili yuikhui khavai nana chotchan samphang kahai chi katharan khala? Nawui vareshi mirinli hina nali kathada hangchithei khala?**



**Tuesday**

**April 25**

**Pharāluishit kaji ( 1 Peter 4: 3 -6)**

Pharaluishit kaje mi akha ngasada ithumna Jishuli zangda kadhara mirin shongza haophok ngasakmi. Kadhara mirin khangasa kaji hiwui kakhalatta thuikahaiya mirinli sakahai otsak acham saikora chi horserhaida ngakheikhang kahaiya rink haring kajina. Vareli makhuikasanga mi ngasasalaga Ali khuisang kahaiwui thili kakashunga ngacheichang ngacheikahaiya mi masamphanglak khala? Jishuwui huikhami pangshap chiwui manga eina khangachei samkaphangna.

Jishuli zangda ithum Ali thikharum kala kadhara mirin kharingwui pongli Peterna hanga. Christawui kathili ngarumda rakahik kala khangacheiya kathara mirin kharingwui maramli ana hangmi.

**1 Peter 4: 3 -6 chi palu. Vareli khuikasanga bingwui mirin chi kathakhala? Kala athumwui mirin chili mi katei bingna khi theikakhui samphang?**

Khamalipwui aponglima Peterna hanga. Khamalipwui atam mirin chi kanthuihaira da Peterna hanga. Ana kahang athishurda khangacheiya vareshi mirin leiphalongra. Hikatha khangachei mirin kathei samkaphang hieina mibingna matakkhak kahai samphangra. Chiwui vang eina mibingwui mangali pao matamchitheizatlala Vareli khuisangda nawui mirin khangachei samphang kahaiwui kharing acham china okathui mibingli mataikhameiya shakhi ngasada lei.

**1 Peter 4:3 -6 chili Peterna bicharwui pongli kathada hangli khala?**

Ithumwui phasawui ningkachang otsak kasa saikora chiwui vang bichar pamli kanganingra kaji Peterna hanga ( John 5:29; 2 Corinthians 5:10; Hebrews 9:27; 1Peter 4:2) Thikahaiya bingli pao tamkachitheiwiu ponglila Peterna hanga. ( 1 Peter 4:6) Thikahaiya mibinglila huikhamiwui paokapha hi athumna ringda leilakha theikhavai khamahai atam miser kahaina. Chiwui vang mashun bichar sakhamiya Varena bichar kasa chi mashun eina ngaraichada bichar sara.

**Nana Vareli makhuisangrang lakhawui eina arui khuisang kahaiwui thili nawui mirinli khangatei khi kathei samphang? Jishuli nana khuisangda Ana nali ngacheikhangasak chi khikhala?**

**Wednesday**

**April 26**

**Phasawui morei bing ( 1 Peter 4: 3)**

Kanthui kahai mirinli mibingna sakahai morei bing chi Peterna kapitai. Kha athumna Jishuli khuisang kahaiwui thili athumna sakasa morei chi masaluimana. Phasa khamathang khamarangwui moreiwui ponglila Peterna hanga.

**1 Peter 4:3 chi palu. Peterna hangda khaleibing chi khikhala?**

Phasawui shuikhangashaiwui maramli verse hina hangda lei. Amali khokharum mirin kala makapha kasali ningkachangwui maramlila hanga. Greekwui tuili 'aselgia' kaji hi 'phasawui khamathang' li kahangna. Kala 'epithumia' kaji hina 'makapha khamathang khamarangli ningkachang' kajina.

Kha vareshina khamathang eina preigaharwui pha khangarum hiwui apongli ngwuida khuihaowa. Prei-gaharwui khangasoli Biblena makhamaya maningmana. Hiya Varena mikumoli yarmikahai semhaikasa masakhamakhaowa kathara sokhami akai akhana. Hi Eden yamguili haokaphok eina leihaikasa otna. Hina prei-gahar mirin peida khangashangwui otsak akhana.

Naongara nganaokhui khavai angayungna. Kala hieina prei-gaharwui mapak kapai khangashik leikashi sada Varena leingasakngai. ( Jeremiah 3; Ezekiel 16; kala Hosea 1-3 chi palu)

Kathara shakzat khuida preiva eina gaharawui mirin rasali yarmikahai ringkapha apong akhana. Kha chi maningla khamathang khamarang eina phasawui ningkachangli mayuirarla shanao kala mayarao khangaso hi okathuwui khamatha saikora chi sashiman kapaiya pangshap otsak ngasai. Hiwui alungli ngaphumda morei kasawui khonshat hi mahang kharara akha ngasai. Prei-gahar mangli sokhami hi ngwuida shichin kahai chitharan mirinli kayakha khonkazar, kakhanang samphangda leikhala?

**2 Samuel 11:4, 1 Corinthians 5:1; Genesis 19:5; kala 1 Corinthians 10:8 chi palu. Verse bing hina ithumli kathada tamchitheili?**

Hiwui morei khonshat kakhanang kachot hi Bibleli kathada hangchitheili khala kaji theiserda khaleina. Ithumna ning ngasharphalungra. Mibingli hina kachungkha rotmaratda zakshingasak da leili kaji hi khamashungna. Morei chi morei shonna. Kha morei chili farormishap khavai Jishuna thimi. Kha Jishuna thikhami chi morei chi saching khavai thikhami maningmana. Kha ning khangatei morei saikora chi huimi. Kala ithumnala mi katei bingna morei sada khalei chili bichar masakhavaila ning ngashar phalungra. ( Luke 6: 42)

**Thursday**

**April 27**

**Leikashina saikora fārormi ( 1Peter 4: 7 -11)**

Jishuna thaklak eina latraluishitda okathui hi ngachangsanghaora kaji Peterwui atamli okthui kasa mibing chila shitsanga. 1Peter 4:7 chili hangda lei. "Saikorawui khangachanga atam chi rarali. Chiwui vang eina ningkharikda honpamda khalatta ngarinda okthui khavai seiha salu. Khangatei apong eina hangsa jiakha khangachanga zimiksho chiwui vang ngaran khariklu kajina. Ithumwui kathi hina apong akhalia mirin khangachanga ngasai. Ithumna thikahai tharan mik pivahaida zingkum kasangkha pipamlapai or zimiksho kashakha pivahailapai kha Jishuna latrathanghon okathui saikora ngachanghaora.

**Ot saikorawui khangachang chi nganaihaira da Peterna hanga. Chithakha vareshi bingna kathada okthui ngayikhala? 1 Peter 4:7 -11 chi palu.**

Vareshi bingna ning kharikda seiha sada honpam katheiya ngasaphalungra. Kala akha eina akha uklungwui kathuka leikashi chi leiphalongra. Leikashina morei saikora farormi shapa. ( 1 Peter 4:8)

Hiwui kakhalat khikhala? Leikashina kathada morei farormi khala? Hi mathameida theikhavai Proverbs 10: 12 chili payanglu, chili chitheimida leili. Kachikatha mili yangkakharing hina khangang khangazai shokngasaka. Kha leikashina ithumli khayon sakahaiya athum lila pheomi ngasaka. Ithummwui leikashi hina mi kateili pheomi khavai apongna. Ithumwui uklungli leikashi yuikahai chitharan mibingli pheomikida kasak khikha maleimana. Pheomishap sera.

Jishu eina Paulna kahang takam eina Peter nala hanga. Ithumwui uklung, ning yang tongda Vareli leishikahai tharan kala khongnainali ithum khalatta leishi kahai tharan katei ainwui tui katonga chi khani hiwui alungli zangser kahaina. (Matthew 22: 34 -39; Romans 13: 8 - 10)

Khamimāli otram ngathami katheiya kala ngahan katheiya ngasalu da Peterna hanga. Mi katei bingli vareshi bingna khangashik kala ngashik kathei hila khamataiyana. Khanaowa sada

vareshi bing Varewui tuili nathumna saklak eina khuida mibingli manglawui khamashunga tui chi nathumwuili leingasaklu. Hi khamataiya otna.

**Leikashina morei saikora pheomida khuithui ngasaka. Nali makhamaya morei kasa chi khipa khala? Nana ali kathada leikashi sachitheipaira khala? Hina nali kathada sashap khavai ngachonmi?**

**Friday**

**April 28**

**Ngarum kasanga:** “Leikashina lumashanmi kala khangmithei. Leikashina kateo kahak makhaila pheomi. Leikashina mibingwui khangazanli morsāpta mamatuimana. Morei kaphunga bingli lumashan khami kala phaning khami hi leilu da Biblena ithumli tamchitheimi. Moreili konglui kahaiya mibingli khamashunga shongfali khuiungmi phalungra. Chieina uklung khamarara bing china Christali zangpaira. Jishuwui leikashina morei saikora chi shiman ngasaka. Awui lumashan khami kala pheokhami china mibingwui khayon khalang saikora chi fakhhammi. “ Counsels to Parents, Teachers, and Students, page 267.

Jishuna morei kaphunga bingli kathada sami? John 8: 1-11li hangkahai Jishu eina shanao pavawui khararchan chi phaninglu. Phokapha shanao chili tukkhuilaga dharmawui kathanna bing china Jishuwui ngalemlu khuirai. Jishuna ngalei tung chili ‘kathanna bing chiwui morei chi kapitai’ ( The Desire of Ages, page 461) Khiwui vang Jishuna ngalei tungli athumwui morei chi kapita khala? Ana kapida khalei tui chi mik khayipkhawui lungli shimanhaora. Dharmawui kathanna bing chi ayarwui zak eina alungwui āzak khangateiya makaphā mibingna kaji Jishuna thei. Chithailala Jishuna athumwui khayon morei chi mibingli mahangchitheimana. Hikathawui otsak acham eina Jishuna morei kaphunga mibingli phenkatheiya kathanna bing chili hangchitheimi. Morei kaphunga bingli ithumna kathada saphalungra khala kaji tharza eina Jishuna hili hangchitheimida leili.

**Ngapheirum khavai:**

- 1. Shitkasanga bingna church khokha yangkha sada ot sakrumching khavai majukrum khangayi kala saikorana ngaraichada theikhui kharan leida leila? Churchwui lungli problem kasak leida khalei bing chi khikhala? Hiwui pongli kathada ningkha khokha sada majukrumpaira khala?**
- 2. Morei masalui khavai Phasali kachot khami kaji hi nawui experience athishurda khili kahang khala?**
- 3. Zamkhor khamangwui mahangkharar zakkashi athei samphangda khalei chi yangvalu. Hikatha khamalipwui otsak kasawui kalākashi chi ithumwui churchna mibingli kathada theikhui ngasak paira?**

Lesson 6

April 29 – May 5

**Christa wuivang kachot kachāng kaphung**

**Sabbath Ngazin – April 29**

**Haptali pakhavai:** 1 Peter 1:6; 1 Peter 3: 13 -22; 2 Timothy 3:12; 1 Peter 4:12 -14; Revelation 12:17; 1 Peter 4: 17 -19.

**Ningphun: “ Hithada sākavai Varena nathumli hokakhuina kaja Christana ithum wuivang chotchān phungmihaida nathumna Awui pheichon kazun khavai sākachitheina.” ( 1 Peter 2: 21)**

Haokaphoka vareshiwui churchli zingcum shakha eina haophokda zingcum shakathum shakhawui alungli vareshi bingli rekkakharekwui khararchan chi ithumna theiser kahaina. Kala Varewui churchli kachikatha rekkakharek rarakhala kaji Biblena chitheimiserhaira. Actswui lairikli kapikahai chi tharlak eina theihaira. Peterna vareshi bingli hangda khalei rekkakharek hina kachangkhat kakhanang kachot khuirara.

Rekkakharek wuivang shitkasanga bingna kachot samphangda khalei chi Peterna awui kapikahai chapter khare chili hangda leili. “Nana kachot kachang kala kakhanang samphangda khalei china nawui shitkasang chi kayakha kashungda leikhala kajiwui prove ngasai. Kaja nawui shitkasang chi sina lila aman sakmeiya. Vareshi bingna chotchān samphangda khalei pongli awui khanaowa salam chieina chitheimi. ( 1 Peter 1:6,7; 5: 10)

Peterwui chithi pakakhuiya bingna Christa wuivang chotchān phungda khalei maramli ngatei ngateidawui verse kathumli kapimihaida leili ( 1 Peter 2: 18 -25; 1 Peter 3: 13 -21; 1 Peter 4: 12 -19) Peterwui letter khare hi rekkakharek wuivang shitkasanga bingna kachot kachang kaphungwui pongli khamataiya sada hangmi.

**Sunday**

**April 30**

**Haokaphoka vareshi bingli rekkakharek ( 1 Peter 1:6)**

**1Peter 1: 6 eina 1Peter 5: 10 chi palu. Verse bing hili Peterna khi hangda leilikhala? Athumna ngasungda khalei panshap chili kathada salu da Peterna hangda leili khala?**

Haokaphoka vareshiwui atam chili vareshi akha khangasa kaji hi mahang kharar kachot samphangda kathi kaho hila rashunga. **Pliny** kaho mipa hina Romewui Emperor **Trajan** li letter khami chiena ithumna thei kaja chitharan vareshi ākha khangasa hi chotlak kahai kathina ngaraipamda katharan sathatnikhala da ngaraipamda khalei mirin ngasai. Pliny na letter hi Pontus eina Bithynia wui governor sada leilakha kakapina.(AD. 111 -113) Vareshi bing hili kathada saulu kaji khala da Pliny na Emperor Trajanli ngahanunga. I vareshi akhana kaji mibing chili ina sathatserhaira. Kha vareshi sasai kha ara vareshi masaluimara kaji mibing liya Trajanwui āmali nganamkapha rikta ngasaklaga meoma bingli khorum ngasaka kahaiwui thili masathatla chihohaowa. Chithada makasa vareshi bing chili sathathaowa.

Haokaphoka atamwui vareshi bing chi kalāshilak kahaiya mibing ngasada leisai. Emperor Nerowui atam (AD. 54 -68) eina Domitian (AD. 81 -96) wui atamli.

1 Peterli hangkahai rekkakharek chi ngatei. Peterna hili example sada hangda khalei hi makhamashunga ot kasa bingna da phenlaga rekkhareka. ( 1 Peter 2:12) Vareshi makhaninga mibing china vareshi bingli ngwuida phenlaga athumli chipatta rekkhareka. Maning akha

athumwui shitkasang chiwui vang manashida yarui mangali rekkhareka. Vareshi bing chi mibingwui ningkakachaiya ngasasai.( 1Peter 3:9; 1 Peter 4:14)

Vareshi bing china chotmeikap kaji changkhayang samphanga. Kha atam chitharan changliya phatop shimli shitkasanga katongali tuksangkahai kala shaothetser kahai marashoksamana. Kha shitkasanga vareshi bing chiwui vanga yaruiwui mangali ngarokha kahai atam kachungkha samphanga. Vareshi akha sada athumwui shitkasang chiwui vang kachot kachang kachungkha samphanga. Chiwui vang Peterna awui chithi kapikhare chili hiwui pongli saklak eina kapi.

**Monday**

**May1**

**Chotchan kala Christana sachithe i kahai ( 1 Peter 3: 13 -22)**

**1 Peter 3: 13 -22 chi pavalu. Shitkasang wuivang vareshi bingli rekkakharek chitharan kathada vareshi bingna ngasungpaira khala? Jishuna kachot kachang samkaphang eina vareshi bingna kachot kachang samkaphangwui experience ngaraikacha khi leikhala?**

Khamashung ot kasa wuivang rekkakharek samphang kahaiya athum chi sokhamiya mibingna da Peterna Matthew wui lairikli Jishuna hangkahai chi horzakda hangmi. ( 1Peter 3:14, Matthew 5:10) Vareshi bingna athumli rekkakharek rashungki kajiwui vang mangachee alu kha nathumwui uklungli Proho Christa chili khayashilu da Peterna katommi. Chithada Jishuli athumna khayashida kahang khangana otsak kasa tharan athumwui uklungli khamashung chiwui vang khangachee maleilakla nganingshapra.

Vareshi bingwui kachihan chi hangchitheishap khavai saphalungra da Peterna kasatmi. Kha athumna khanim kala khangahui uklung eina mibingna khuisang kapaiya kala khaya shikapaiwui otsakli saphalungra. ( 1Peter 3: 15,16) Makapha acham aram kala otsak masalakla phenkhavai makhaleiya mibing ngasa khavai Peterna vareshi bing chili ngasharngasaka. Khayon khamang masakhavai kala khangwui ot masakhavai ningkathar kala uklung kathar leikhavai hangmachinmi. Kathara masakhamakhaowa acham –aram khalei hi khamataiya vareshiwui otngarutna. Chithada kasa tharan phenkhavai makhaleiya vareshi akhana da mibingna theikhui paira. ( 1 Peter 3:16)

Khayon khamang kasa athumli khaya-kakhavai kala masot mikhavai apong maleimana. Kapha khamashung kasa wuivang kachot kachang samkaphang hiya khamataiya ngateihang kahaiya otsak akhana. ( 1 Peter 3:17)

Jishuna sachithe i kahai chithada Peter nala sai. Christana Awui kathar mirin kala makhangapatta kakashunga shitkasang chiwui vang kachot kachang phunga. Awui kathar mirin kharing acham chiwui vang makhapha makhaya mibing china yangkharinga. Jishuna khamashung wuivang chotchangmi kahai chithada okathuiwui mi khipakhana machotmana.

Kha Jishuwui kachot sairandra kata china ithumwui kahui samphang khavai apong ngasami. Morei kaphunga bingwui mahut sada Ana thimi. Makhamashunga morei kaphunga bingwui vang morei makhavaiya khamashunga Ana chotchangda thimihaira. Chiwui vang Jishuna thikhami chili shitkasanga kachivana ngashitmikahai katang makhavai kharing mirin chi samphangra.

**Khamashung wuivang nana kachot kachang phungyang kahai leihairala? Vareshi akha khangasa kaji hieina nana kathada tamkhui? Nana Jishu Christawui kathara rink haring kaji hi khili kahang khala?**

**Tuesday**

**May 2**

**Ningchot sipsāt eina tamkhayang ( 1 Peter 4: 12 -14)**

**1 Peter 4: 12 -14 chi palu. Kachot kachang khara wuivang vareshi bingna matakkhak kahai masa alu da Peterna verse hili khisada kahang khala? 2 Timothy 3:12 eina John 15:18 chila palu.**

Shitkasang wuivang vareshi bingna rekkakharek samkaphang tharan matakkhak kahai masa kaji Peterna hanghaida leili. Paul nala chi takam eina hanghai. Jishu Christawui rin kahaoda khamashung eina okathuiya athumli minamda zakshilak eina sara. ( 2 Timothy 3:12) Varewui thikashura vareshi bingna kakhanang kachot kala rekkakharek samphangki kajiwui pongli Jishu nala hangmathinmi haisai. Nathumli shaothat khavai yangkashe bingwui pangli horsangmira. Iwui vang eina nathumli mibingna yangkharingra. Chitharan mi kachungkhana khamashung chiwui eina mai ngareithuihaora. Akha eina akha yangshi ngarokra. Kala athumna mamaya ngarokla yansaida yangkashe bingwui pangli misangra. ( Matthew 24: 9,10)

EG White na hanghai, “ Jishuwui pheichon yunda kazatta mashun kasa athumli khangwui phenlaga rekkharekra. Atam atamwui athishurda rekkharekra. Abelwui thot eina thuilaga Prohowui kapangkhuu kahaiya mibingli sakathatta makhamashunga mangla bingwui ningrin kala ningphanin otsak china nathumli kachot kachang mida rekkharekra.” The Acts of Apostles, page 576.

**Revelation 12:17 chi palu. Khanaowa āngachanglam atamli vareshi bingli kathada rashokra da verse hina hanghaili khala?**

Khamashunga shitkasang khaleiya athumli rekkakharek hiya rashokchingda leili. Chiwui vang eina mahang kharar kachot kachang sipsat tamkhayang rashokki kajiwui pongli Peterna hang maranmihai. ( 1 Peter 4:12)

Mei hi sashiman kapaiya ot akhana da ithumna theikhui. Kha mei hi khamakhao saikora chuitada samatha khavai akhala ngasai. Kathada kala kali chuikhala kajili lei. Chansam sada shim meina chuita kahai ngavai, kha sina kachang chila mei eina rangkhui. Hiwui eina vareshi bingli Varena kapha onngasaka. Zakshilak kahai kachot kala sipsat ralala kakhanang masa alu da Peterna hangmi. Khamashung wuivang rekkakharek hiya raphalungra, chiwui vang ning suikata masa alu kha lungsanmeida shitkasang eina muivalu da Peterna katommi.

**Shitkasang wuivang kachot kachang phungda khaleiya athumli ithumna kathada katommi paira kala ngachonmi paira?**

**Wednesday**

**May 3**

**Bichar kala Varewui miyur bing ( 1 Peter 4: 17 -19)**

**1 Peter 4: 17 -19 chi palu. Kala Isaiah 10:11,12 eina Malachi 3: 1 -6 chila palu. Bicharwui pongli verse bing hina kathada tamchitheili khala?**

Varewui mibingli bichar kasa eina haophokra. Kachot kachang hi Varewui bicharna dala Peterna hanga. Vareshi bingna kakhanang kachot samphangda khalei hi Varewui bicharla ngasapai da Peterna hanga. Varewui ngarankahai athishurda vareshi shitkasanga bingli samathara. Chieina athumna athumwui Kasa Akhava chili shitsangtitta kapha otsakrin chi ringpaira. ( 1 Peter 4:19)

**Luke 18: 1-8 chi palu. Varewui bichar kaji theikhui khavai hiwui khararchan hina ithumli kathada ngachonmi?**

Achalakhawui tamli bichar kasa hi mibingwui ningkachangna. Kachāma rameipava china bichar kasali kathada khuikhala kaji hili hangchitheimida leili. Rameiva pāwui mashun phayet khome china awui vang hangmida khayui samphangra da ana thei. Ana yaruiwui alungli kachama mi akha ngasahaoda kala khangazana akha ngasahaoda awui vang phayet khamiya phakhui khavai apong maleisamana. Kha hangshon kahai wuivang bichar sakhamiya mipa china naolak eina mayamihaowa. Mashun bichar sami khavai ngashun ngaya mateilakla Varena kapangkui kahaiya Awui miyur bingli mamashungmi marala? Athumwui kapo chi khalan haorala? ( Luke 18:7)

Okathui hi moreina zakshi ngasakhaira. Haokaphok thotrinchan chiwui eina thuida Awui mibingna mashun bichar samikhavai ngaraipamda leili. “Khipana Namingli kayashida matekmatei ngasakra? Kathara chi Namanga. Okathui yur saikorana rada nali khorumra. Kala athumna nawui mashun bichar chi theihaira.” (Revelation 15:4)

**Okathuiwui makapha bing saikora chili tandi makhami nana theida khalei chili phaninyanglu. Kala aruila makapha mibingna mataisangda khalei chila yanglu. Varewui kathara mashun bichar sakhami kaji hi arui ithumwui vareshi rinli kayakha khamataiya ngasa khala? Mashun bichar samira kaji hili nana kathada kachihan samphangpai?**

**Thursday**

**May 4**

**Kasaka atamli shitkasang makhangachei ( 1 Peter 5: 8)**

Shitkasang wuivang kachot kachang samphangda khaleiya athumli Peterna hangda khalei hi ithumna theihaira. Vareshi bingwui thotchan lairikli shitkasang bingli zakshilak eina rekkakharek samphang chinga. Peterwui chithi hi pakhuilaga aja vareshi kachungkhana ning khalum samphanga.

Kha khiwui vang vareshi bingna kachot kachang samphanghao khala kaji hi achalakhawui eina ngahanrashunda khalei khangahan ngasai. Jobwui lairik hi Bibleli rimeithuida kapi kahaiya lairikna. Kala hiwui lairikli kakhanang kachot sipsat hina khamataiya tuipong ngasai. Okathuili Jishu maningla mikumowui lungli khamashung wuivang kachot kachang phungkahaiya mi kaji hi Job manga. Okathuili ning kathara mashun kasa mi Job katha maleimana da Varena Chipee chili hanga. ( Job 1:8) Jobna kayakha chotchangda sisap phungkhala. Awui mashun rin kharing wuivang chotchan sipsat phunga.

**1Peter 5: 8; Revelation 12:9 kala Revelation 2:10 chi palu. Khiwui vang ithumna kachot kachang phungda khalei khala kaji verse hina kathada theikhui ngasak khala?**

Christa eina Chipeewui rai kasa hiwui lungli ithumna okthui haoda kachot kachang samphangda khaleina. Hiwui rai hi ithumwui uklung mangli kasa maningmana kha hi kapha eina makaphawui rai kasa chili mikumo ithumla zangda khaleina.

**1 Peter 4:19 chi palu. Ithumna ngararda khalei rai chi kathada verse hina mathameida theingasak?**

Kachot kachang samphangda khalei saikora hi ithumwui morei wuivang samkaphang maningsermana. Jobna ngahanda khalei chi ithumna ngahan chingda leili. Khiwui vang! Khiwui vang! Da ithumna ngahanchingda khaleiwui answer hi masamphangrarma. Kha chotchan samphanglala Vareli shitsangda ithumwui mangla Awui makali pharihaimi khavai Ali horsanglu da Peterna katommida lei.

**Vareshi akha sada Varewui kaphā-khayā kala leikashi theitit kakhui hi khiwui vang khamataiya ngasa khala? Hikathawui chotchan samphangkahi eina Vareli theikakhui**

**samphang kahaiya china kachot kachang phungda khalei athumli khangatara vareshi ngasakhavai kathada ngachonmipai? Varewui leukashi hi hakmahalaka kaji ithumna hiwui eina kathada theipaira?**

**Friday**

**May 5**

**Ngarum kasanga:** Vareshi bingna rekkakharek samphangda khaleiwui maramli Sunday thangwui chili ngapheirumhaira. Hili rekkakharekwui pongli awungali letter kakapi maramli chungmeida kapihaida lei. "... Vareshina da kahanga athum bingli ina hikatha method eina sai: ina na vareshilakla da khani shida ngahanna, vareshi akhana jiaakha shaothathaora da kasirlaga ngahanluishita. Athumna mah! Vareshina da ngahankashon akha chikatha bing chili shaothat khavai ina order/ khak tami.

" Ithumma vareshi maningmana da kahanga bing chili kameowui varebing chili ili ngarumda seiha sai. Chieina thumna nganamkapha thao eina zam mangda meoma bing chili masot chigata.... Athumbing china naolak eina Christali khonshi. Kakashunga vareshi bing chili hithada tandi eina khorum khangasak chi masararmana kaji wuivang. Chithada khokharumwui otsak sakahaiwui thili athumbing hi vareshi maningmana kaji theikahaiwui thili chihohaowa.." Pliny Letters, book 10:96 ( Vol.2, page 401 -403)

**Ngapheirum khavai:**

**1. Atungli hangda khalei awungali letter kakapi chili yanglaga, Kachikatha kachot kachang vareshi bingna samphangsa khala? Revelation 14: 9 -12 li kazingrao kathumwui paoli kapikahai athishurda khanaowa zimiksho khara tharan vareshi bingna kachikatha kachot kachang samphangra da hangli khala? Christa eina Chipeewui rai khangararli kathada ithumna hiwui eina thukmeida theivapaira khala?**

**2. " Okathuili kakhanang kachot samphangda khalei hi Varewui ain khamayonna bingwui vang eina kharana da phenna. Kakhanang hangkhavai makhalei otshok rashokda khalei hi athumwui eina kharana da phenra. Okathuili ngapa khangapā, mi shaokathat,kala ashi kata saikora hiwui vang vareshi bingli phenra. Hikathawui otshot hi theida makapha mibingwui malung khavat hangkhavai maleimara. Kazingrao kathumwui pao khuisang kahaiya athumli malung vatshunhaora. Chitharan Satanna vareshi bingli yangkakharing mataisang ngasakda rekkakharekla mataisang ngasakhaora." The Great Controversy, page 614, 6Atam chi katharan nikhala kaji ngarakzak kahai matheimana. Kala kachikatha rekkakharek rashungsanikhala dala matheiranga. Kha hikatha rekkakharek rashungkahai chitharan ithumwui shitkasang pheii mangaphok khavai ithumna kathada khangaran sapaira khala?**



## Lesson 7

May 6 – 12

### Otram ngathakhamiya Kathāna

#### Sabbath Ngazin – May 6

**Haptali pakhavai:** 1 Peter 5: 1-10; Acts 6: 1-6; Jeremiah 10: 21; Matthew 20:24 – 28; Proverbs 3:34; Revelations 12: 7 -9.

**Ningphun: “ Nathumwui ningchot malung kharing saikora chi Ali horsanglu, Ana nathumwui vang phungmira.” (1 Peter 5: 7)**

Churchwui reikasangli kaphā churchwui kathāna akha khangasā kaji hi kayakha khamataiya khala kaji ithumna kathei samphanga. Kaphā kathanna china kharinga Bible kala Vareli pheisin sai. Manglawui yarmet chi singda paokapha chi unghung vashungda kupsang khavai kathanna china churchwui member bingli katommi.

Churchwui kathanna khangasa kaji hi pailak kahai maningmana. Churchwui kathanna hi kachikatha ngalang kazara mibingwui pangli horsangmida athumna church yangsanga. Kala churchwui kathanna akhana khangatei kasak samphangda khalei chiya, members bingna maning kachanga ot chi kasa chitharan kala athumwui kaphaning maung kashung tharan kathanna chiwui vang kasaka ngasai. Churchli kachikatha kasaka atam khara chitharan churchwui kathanna chili makhamaya khara hi samphangchinga. Kha hikathali ngasungshap khavai kathanna china Manglali sakakhuiya rin kharing hi leiphalungra. Chithada kasa eina kakashunga kathanna kaji theipaira.

1 Peter 5: 1-10 chili Peterna local churchwui kathannawui maramli kapihaida leili. Kakashunga kathannawui pongli ana hanga. Church memberwui alungli hikatha kakashunga kathanna leiphalungra. Achalakhawui mibingli Peterna hangkahai hi aruihon ithumwui vareshi bingwui vangla kakhalat khaleiya akha ngasada leili.

## Sunday

May 7

### Vareshi Church haophok kharewui Elder bing ( Acts 6:1 -6)

**Acts 6: 1-6; Acts 14:23; Acts 15:6; 1 Timothy 5:17; 1 Peter 5:2 hibing hi pavalu.**

#### **Achalakhawui vareshi bingna kachikatha khangasung samphangsa khala? Churchwui kathanna bing china hikatha atamli kathada sakhala?**

Shitkasanga bing mataisangda vareshi mi kachungkha ngasahaowa. Kayakha hakkhamaha Varewui sokhami ngasa khala! Kha thaklak eina mayakasanga vareshi bing chi kasak kachungkha samphang khavai apong ngasahaowa.

Acts 1-5 chili Mangla Kathara china kathada mibingli sazamida mi kachungkha vareshi ngasathuihao khala kaji hangmihaida leili. Vareshi mi kachungkha chiwui vang kathanna bing china kasak kachungkha samphang haowa da Acts 6:1 -6 chili samphanga. Chiwui vang kathanna bing china churchwui thangthang manga chili yangsang khavai ot sai.

Church kathada organize sarakhala kajiwui pongli athumna kasak samphanga. Hi churchli Greekwui tui khamatuiya kanglup akhana. Hiwui alungli rameinao bingli mathada mayangsang khamiwui complaint sahaowa. Chiwui vang hiwui problem yangsangmi khavai sakhangatha ngachon khamiya paokazata bing 12 kapangshoka. Athum bing chili deacon da phokkhui.

Mangla Katharana church haophok khavai thankhamiya ngasai kaji hi khamashunga akhana. Chithailala apong kathongali khari khanao kakhai darkar sai. Kaja Elder hina churchwui thankhamiya ngasai. Church kachida elder hi kapangsangmi. Chiwui vang Paul eina Barnabas li vareshi bingwui kathanna sakhavai elder kapangsanga. Apam ngatei ngateida athumna khava chili elder kapangsangmi. ( Acts 14: 23)

Elder bingli otngarut ngateiteida kachungkha chiphunna. Athumna local churchwui kathanna akhala ngasai. Athumna marak marakli hangchithei khamiya, chishut khamiyala ngasai. Midhar khuikasanga vareshi binglila athumna tamchithei. Athumna churchwui otbing thongthang saikora kazip khame ngasai, kala mibingwui phakhavai majuk khamiya ngasami. ( Acts 15: 6; 1 Timothy 5:17; 1 Peter 5:2)

**Nawui mamaya khangai leilala nawui churchli nana kathada mathameida yangsang khamiya ngasapaira khala?**

**Monday**

**May 8**

**Elder bing ( 1 Peter 5:1 -4)**

**1 Peter 5: 1-4 chi palu. Churchwui manga wuivang kathanna bing china kathada churchwui manga phaningmida ot sapaira khala? Verse bing hi palaga ithumna kathada churchwui vang mathakhameiya otram ngatha khame bing ngasapaira?**

1Peter 5: 1-4 chili Peterna Elder bingli hangchithei. Ana apong khanili hithada hanga. (1) Peterna churchwui kathanna akha sada a hi Christawui kachot kachang shakhi khamiya akha ngasai. (2) Awui tekhamatei chi ithum eina Christana latrathang chitheimi khavai ithumli leingasakngai Hi rimeithuida elder bingli leingasakngai. Hi Christana sachithei kahaiya ithumwui vang phungmi kahai kala ithumwui chihan khavai theikhui kapai ngasami.

Elder bingwui otngarut hi yao kahoma bingwui otngarutli ngaraichai da Peterna hanga. Yao kahoma china yaobingli yangsang khamiya ngasami. Chi takam eina elder bing nala Varewui yaonao bingli homkhamiya ngasa phalungra. Yao bingna marak khalia ahangwui eina pakthui kahai thada churchwui yaonao bingla pakthui kahai lei. Chiwui vang eina pakthui kahaiya yaonao bingli churchwui ahang alungli thanungmi khavai elder/ yao kahoma bingna thanungmi phalungra. Elder bingna churchwui member bingli khokha kasawui acham tamchitheida ngachamthan okthui phalungra. Churchwui kathanna elder bingna khayaning khaninga langkaso mi mangasa phalungmara. Vareshi akhana saphalungkikaji khanim khangahui mirin leiphalungra.

**Jeremiah 10: 21; Ezekiel 34: 8 -10 kala Zechariah 11: 17 chila palu. Verse bing hina Yao kahoma bingli hangmathin khami chi khikhala?**

Vareshiwui kathanna bing china churchwui lungli khangkathei kala jakathei acham hi leiphalungra. Yao kahomana yaobingli yangkhami thada leiphalungra. Hiwui ot hi khamataiya akhana. Elder bingna khokharumli thankhamiya ngasa phalungra kala mibingli Jishuwui huikhami pao khanim eina hashokmida katei bingli huikhami samphang khavai apong ngaran khamiya ngasa phalungra.

Churchwui vang otram ngatha ngaireo kahaiya elder ngasaphalungra. Churchli kathanna kapang kasang hi pailak kahaiya ot mangasamana da Peterna hanga. Kha Varewui ot ungsung khavai churchwui kathanna mi chipuisang phalungra. Churchwui kathanna masa khangaiwui maram leikapa. Kaja hiwui otngarut singkaki kaji hiwui ngalang kazar kachungkha lei. Athum khalattawui ot kachungkha khalei chili otphun hi ramataisanga. Kaikhana elderwui

otsin singkida khangaran masamana. Kha ithumli kathana akhawui otsin chiphunda khalei chili Prohowui mingli mayātheilu da Peterna hanga.

**Tuesday**

**May 9**

**Otram ngathakhamiya kathāna ( 1 Peter 5:3)**

**1 Peter 5:3 eina Matthew 20: 24 -28 chi palu. Vareshiwui kathana akha ngasakhavai khamatha acham chi khina da verse hina hangli khala?**

1 Peter 5:3 chili mataimeithuida hangda khalei chi “ngaleiwui khamunga” kaji tui hina. Greekwui tuili ‘*katakuriuontes*’ da hoi. Matthew 20:25 lila samphanga. Hiwui kakhalatta kachikathawui ‘*tungli khamung*’ or ‘khangamma mi’. 1 Peter 5:3 li Peterna hangda khalei china kachikatha nawui azingli leida khaleiya mili ngamchipālāk eina masā alu da machin khamina.

Matthew 20:20 -23 china 20: 24 -28 chi mathameida theikhui khavai kapikhamina. James eina Johnwui avavāna Jishuli rasamphangda awui naobing na Awui wungramli kazang tharan katei bingwui tungli kajuiya ngasangasakmilu da poi. Akhana Awui yashong kala akhana Awui wuishong kachipam miluda poi.

“ James eina Johnli Jishuna leishilaka. Jishuna ani khalattawui kaphaning sakhangai khayon kasa chiwui vang makaharmimana. Anina khare sakhavai ningkachang chiwui vangla malung mavatmimana. Kaja Ana aniwui uklung thei. Anina kayakha Jishuli leishi khala kaji Ana thei. Anina mi katei bingli langmeida Proholi leishi. Konglui kahaiya mikumo akha sada anina Jishuli leikashi chi makashungsalapai. Kha aniwui kathuka leikashi chi Jishuwui leikashi uraok chiwui eina longkashoka leikashi china. Chiwui vang aniwui khayon kala makakashung chiwui vang makaharmihaila leikashi chi kakashunga kala uklung kathara leikashi ngasa ngasakmi.” The Desire of Ages, page 548.

Jishuwui yashong kala wuishong pamkhangasaka chi Awui ot maningmana da Jishuna hangmi. Vare mangna yarmikashapna. Chiwui thili Jishuna okathuiwui wungram eina kazingram Awui wungramwui khangateiwui ponglila hangmi. Jishuna awunga sada pamkikaji kazing wungram chili kachikathana khare ngasaka jiakha Jishuna sachithei kahai thada saikorawui rao ngasa phalungra. “ Miwui Nao Mayarana Ali otram ngathami khavai khara maningla Ana mibingli otram ngathami khavai kharana. Kala mi kachungkhana moreiwui eina ningkhan samphang khavai amangla chigatmi khavai kharana.” (Matthew 20:28)

Peterna churchwui kathanna bingli Jishuwui acham leikhavai salu da hangmi. Khalattawui ningai ningphum horhaida nathumwui khangli Jishuwui zak theingasaklu da Peterna churchwui kathanna sada khalei bingli hanga.

**Philippians 2: 4-8 eina 1 Peter 5:3 chi palu. Paulwui tui eina Peterwui tui kathada ngaraicha khala? Ithumli salu da hangkahai chi kathada sapaira khala?**

**Wednesday**

**May 10**

**Khanim khangahui uklungna sārī sāda ( 1 Peter 5: 5-7)**

Peterna okthui kasa atamwui society chi kateo kahak khailaga ngatei ngarokser kaja yur ngasasai. Athumwui ngachaili kajuiya mibing chi pangshap kasinga ngasasai. Athumwui ngachaili kateowa yur, mina nemlak eina kakhuiya mibingla zanga. Athumbing chili rao wui mishanli shansanga. Jehudi eina vareshi bingwui miyurli makazanga khangazanna athum bing chili raobing da theikhui. Athum bing chi yaruiwui ahangli ‘khikha masakhavaiya’ khangazana

kala 'kachama' mibingna. Societywui alungli athum bingli mishanli mazangsamana. Chiwui vang athumna kajuiya thakli kazanga mibing chili khaya shida okthui.

1 Peter 5: 5-7 chi palu. Peterna okthui kasa thotwui mibing chili phaningva yanglu. Hangda khalei hi majuklaga Peterwui letter eina hangda khalei hi kayakha khamataiya ngasada leili khala?

Biblewui athishurda khanim khangahui kaji hi aman kasaka acham otsakna. Kha Peterwui atamli leida khalei ngashan zatkhana athishurda khanim khangahui kaji hiya ngateihang eina theikhui. Langkaso mibingli Varena kathada phaning khala kaji Proverbs 3:34 li hangkhai chi Peterna chitheimi. Old Testament lairik khararchanli langkaso mibingli maishi ngasakra kaji hanghaida lei. ( Isaiah 13:11; Isaiah 23:9; Job 40:11)

Vare hi khipana da ithumna khuiphalungra khala? Vare hi juikhamataiya sashapa khayāla masotla khuikhangayiyana kaji hi theiphalungra. ( 1Peter 5:6) Ithum hi morei kaphunga khangazanna serra chieina Varewui lukhamashan manga eina huimira kaji theitit phalungra. Chithakha morei kaphunga saikora hi ngaraicha serra khangatei maleimana. Varena ithumwui Kasa Akhava na jihaoda ithum ngahuimei phalungra. Kaja ithumwui atungli pangshap leikhameiya, kashung khameiya chili ithumna khayashi. Kha ithumli nemkhameiya, khangazanna mibingli khayakashi chitharan kakashunga khangahuiya mirin otsak kala acham chi chithei.

Khanim khangahuiya vareshi kaji hi mina theingasak phalungra. Khanima kala khangahuiya uklung hi Vare manga mangli machihaila mibingwui manga lila nawui sari sada ngavai phalungra. Mi saikorali kashang kacham, kharei-kateo makhailakla khanim khangahui otsak acham eina saphalungra. Hina ithumwui mahaita kapaiya sari thada ngavailu da Peterna hangmihaira.

**Cross china ithumli kathada khangahuiya rin ringngasak paihao khala?**

**Thursday**

**May 11**

**Kazingkha thāda nirlaga ( 1 Peter 5: 8 -10)**

Rekkakharekwui tamli Peterwui chithi kapi. Christa eina Satanwui rai ngararda khalei chi awui chithi pakakhuiya mibingna kathei samphanga. Ithumna arui theikakhuili langmeida athumna theikhui.

**1 Peter 5: 8 -10 eina Revelation 12: 7 -9 hi palu. Makapha chi kathada haophok kala Satanna okathuili kathada ot sali kaji verse bing hina kathada hangmi?**

Kapha eina makaphawui manglawui rai khangarar alungli mikumo ithumla sharuk khuida leili kaji Revelationwui Biblena chitheimi. Kaphawui rai khangarar chili Jishuna thanda lei. Jishu hi Varewui tui china. Ana Awunga bingwui awunga, kala Proho bingwui Prohona. ( Revelation 19: 13,16) Satanli makapha makhayawui kathanna da hoi. Ali dragon dala theikhui. ( Revelation 12: 7-9; Revelation 20:7,8) Okathuiwui mibingna Satan kaho hi maleimana da hanga. Kha Satan kaho hi okathui makaphawui pangshap khaleiyana. Ana ithumli shiman khavai sada leili. Kha khanaowa atamli makapha Satan chili Varena sashiman ngasakra kaji hi ithumwui vang pao kapha akhana. ( Revelation 20:9,10)

Satan hi makapha makhaya sashiman khangasaka china da Peterna hanga. Khipali shaisikhala da rimta rimshang zatta khaleiya khaleiya chi ana. ( 1 Peter 5:8) Jishuwui thikashura vareshi bingna kachot kachang samphangda khalei hina Satan kahowui pangshap chi

theishingkhui ngasakda leili. Kha awui atam masangmara kaji thei. Kaja Jishuwui katang makhavai tekkhamatei zimikshora thanghon kachot kachang saikora chi shimanser haora.

**1 Peter 5:10 chi palu. Peterna hili kathada hangli khala?**

Peterwui letter pada khaleiya bingna kachikatha tamkhyang samphangda leikhala kaji matheimana. Kha ithumwui chihan kapai khalei Peterna chitheimi. Makapha Satan hi leiphalinga kala china kapha chili ngasungda rai sada khalei china mibingli kachot kachang samphang ngasakda khalei hila kachangkhat shokda khaleina. Kha lukhamashan leikashi kala pheomikatheiya Varena makapha chili yuimi haira. Chiwui vang ithumna atam kashakha chotsalala kathi eina tangda shitsangtitta Jishuli zangda khayui samkaphang chi ithumwui ngasalakra da chihanda ngaraisa.

**Ithumna makhangacheiya shitkasang kathada leipaira? Khanao eina tangda nganingtitlaga kharārā saikorali kathada ngasungda ngararpaira khala?**

**Friday**

**May 12**

**Ngarum kasanga:** Khanaowa Jishuwui phakachizat thanghon Jishuna sakachithei otsak chi otram ngathakhamiya akhava akhana sakharan otsakrin ngasai. Chitharan Jishu hi Varewui Nao Mayarana kaji Ana mathalak eina thei. Zakhui kahaiwui thili sakhangatha bingwui pheii Ana pheomi. ( John 13: 14,15) Jishuna sakachithei chi athumna shakhuida samaronna. Jishuwui wungramli kathanna akha ngasakikaji hi rao akhana akhavali otram ngathakhami kathana da athumna phaningunga. Jishuna khangahui acham sachithei kahai chi Peterna phaning chingda churchwui kathanna china mibingwui tungli kahaka sada maleikhavai vareshi bingli hangkhamachinna.

“ Christana morei kaphunga bing wuivang okathuili mikumo akha ngasada raokathui hi kazingram hupvāna matakkhakhai. Christana mikumo akha mangasaranglakha Vare ngasada leisai. Kha Ana khangazanna mikumo ithum katha akha ngasada rami. Hiwui kakhalat hi khikhala kaji ithumna theikazakkhui phalungra. Ana Awui khayakaka wungpamkhong chihohaida phasa khavaiya mikumo akha sada ithum wuivang raokthui. Ana rakhami hi mikumona moreili yuikhuishap khavai pangshap hi khuirami. Kala mi kachiva Varewui naongara khangasa hi Awui ningkachangna..” –*Sons and Daughters of God, page 81.*

**Ngapheirum khavai:**

- 1. Jishuna okathuili Varewui vang ot haokaphokli makapha chipee chili ngasunga. Zimiksho 40 thang khumkapamwui thili phasana thaida vankahai chitharan atamli chipee china raksuili ngasungshapa. ( Matt 4: 1-11; Mark 1: 12,13; Luke 4:1 013) Ithumna makapha chipeewui kasui khara tharan ngasungshap khavai hina ithumli kathada ngachonmi?**
- 2. Mibingna theikhui kapaiya khangahui uklung khaleiwui example hanglu. Hiwui eina nana tamkhuikapai khi lei?**
- 3. Vareshi bingwui kakashunga kathanna kaji hi khi? Okathuiwui politicalwui kathanna eina vareshi bingwui kathanna khani hiwui khangatei khikhala?**
- 4. Satan kaho hi maleimana kala hiya mibingwui lungli makapha khalei chili kahangna da hangda khaleiya mibing chili nana kathada theikhui ngasakpairo?**

## Lesson 8

May 13 – 19

### Peterwui lairikli Jesu

#### Sabbath Ngazin – May 13

**Haptali pakhavai:** 1 Peter 1:18,19; Colosians 1: 13,14; Isaiah 53: 1-12; John 11:25; 2 Peter 1:1.

**Ningphun: “ Christa A khalattana Awui phasa krush tungli hammida ithumwui morei kashong runmihaira, chieina ara ithumna khamashung khangaronga rin ringpaihaowa.” 1 Peter 2: 24.**

1 Peterwui lairik hi tamkhai hiwui eina ithumna theikhui kaja Peterna hangda khalei katonga hi Jishuwui pongli kahangna. Peterna hangda khalei katonga hi Jishuli kharinsera.

Jishu Christana chihokhara sakhangatha paokazattana da Peterwui haokaphoka chithili kapi. Kala naomeikapta khanaowa kupkasanga chithi chili “Christali shitkasanga nathum saikorali Varewui chingri kahai chi tashungmiranu” da Peterna ngachangsanga. ( 1 Peter 5: 14) Chiwui vang ithumna thei kaja Peterwui chithi haokaphokali Jishuli pheisin sada haophoklaga Jishuli rinlaga ngachangsanga.

Jishuna ithum wuivang samikahai saikora chiwui pongli hangmi. Kala Ana ithum wuivang Awui mangla chigat khamiwui maramlila hangchithe. Jishuna chotchan phungkhai chi ithum wuivang sachithe kahaina. Jishuna thihailaga ringkhaluwui maramli Peterna hangmi. Jishu hi Varena “thao neomikahaiya” “kapangkhu kahaiya” na kajila Hanga. 1 Peterwui chili ithumna khayang tharan Jishu hi Varena da theingasakmi. Ana mikumo phasa khavaiya akha sada raokthui kala morei kaphunga bingwui thihailaga kathili yuikhuida katang makhavaiya kharing pangshap chi yarmihai.

Jishuwui apongli kathada hangmihaida leili khala kaji munlak eina theikhuipai khavai ithumna ajawui haptali 1 Peter hi yangvaluishitsa.

## Sunday

May 14

### Ithum wuivang chigat khamiya Jishu ( Colosians 1: 13, 14)

Kharinga Biblewui haokaphoka eina thuilaga Katanga eina tangdali Varena morei kaphunga bingli huikhui khavai ngarankhami hina khamataiya tuipong ngasai. Genesisli Adam eina Evena konglui kahai wui khararchan eina haophoklaga Revelationwui lairikli Babylon kongkhalui eina tangda huikhamiwui pongli kahangna. Hiwui kakhalatta Varena haokaphok eina thuilaga shiman kahaiya bingli huikhui khavai ot sami. Hiwui pongli Peterwui chithili kapihaida leili.

**1 Peter 1: 18,19 eina Colossians 13,14 chi palu. Moreiwui eina ningkhan khangasak kaji hi khikhala? Ashee hieina kathada ithumli huikhui paihao?**

1 Peter 1: 18,19 chili Jishuna thikhamiwui kakhalat matailak eina kapisanghaida leili. Verse hili ithumli matailak kahai khani chitheimi. Khare sada, ashee eina ithumli lokhuida moreiwui eina ningkhan ngasak khami. Kakhane sada, yaonao chigat khami. kachikatha lokhuiluishitda ningkhan khami kajiwui kakhalatta ngatangkhui khami kajina. Ngatangkhui kaji hi apong ngateiteida theikhui. Chamhaoda horhaikasa ot chi latluida lokhuiluishitkaji hilila theikhui. ( Leviticus 25:25,26) Kala rao akhali aman eina lokhuida raopam eina ningkhan khangasak kaji hi khamataiya akhana. (Leviticus 25: 47 -49) Okathuiwui shiman kapaiya sina lupa eina maningla kha Christawui aman kasak ashee chieina ngatangkhui kahaina da Peterna hanga. ( 1Peter 1:18,19)

Hithada yaonao chigat khami hi Christawui mangla chigat khamina da Peterna theingasaka. Achalakra Old Testament atamli achuk kāpeichao kahaiya yaonao chi morei pheokhavai morei kaphungana Vareli khorum khavai shimli khurai. ( Lev 4:32,33) Yaonao chi taitathailaga hanphut pamli ashee chi neomi. Kala katai ashee chi hanphut pamwui azing chili heirorra. Chithada sada sayur kachigat hina moreiwui aman runkhami ngasai. Jishu li achuk kapeiya khangakhai makhaleiya yaonao da theikhui. Jishuna ithumwui mahut sada thimihaira kaji Peterna hanga. Ithum moreiwui leihman Ana runmihaida ithumli ngatangkuimihaira. Chieina ithumna thikajiwui eina ningkhan ngasakmihaira.

**Ithum huikhami samphang khavai kachihan hi ithumwui mahut sada thimikahaiya Jishu manga. Hina ithumli kathada Vareli horsangchao kahaiya rin ringkhavai tamchitheimili khala?**

**Monday**

**May 15**

**Christawui kakhanang- kachot ( Isaiah 53: 1-12)**

Vareshina Christawui kakhanang kachot kaphungwui pongli kachungkha matui. Greekwui tuili 'passion' kajiwui kakhalatta 'kakhanang kachot' da theikhui. Chieina 'the passion of Christ' kaji hi Jishuna Awui mirin chotchlanglak eina chigat khami kajili kahangna. Hiwui kachot hi Jishuna Jerusalemli awunga akha sada ungkazangwui eina haophok haowa. Christana ithum wuivang chotchan phungkhamiwui pongli matailak eina Peterna hangmi.

**1Peter 2: 21 -25 kala Isaiah 53: 1-12 chi palu. Jishuna ithum wuivang chotchang phungkhamiwui maramli verse bing hina kathada hangli khala?**

Jishuna Awui phasa cross tungli chotchlanglak eina shaoshanmi haida ithumwui morei kashong phungmihaira kaji hina matailak kahaiya ngasai. Morei kasa wuivang ithum thiphalungra kha Awui thikhami china ithumli kharing mirin chi mi kala ithumli kathara mirin chi okathui khavai apongla mi. Morei kaphungana thiphalungki kajiwui eina mathila kharing samphang khavai ithumwui mahut sada Jishuna thimihaira. Ana ngatangkhui khavai ngaranmihai kasa chi ithumwui vang ngasa ngasakhaira.

**Isaiah 53: 1-12 chi paluilu. Ithumwui vang ngaranmi haikasa chi unghung khvai Jishuna chotchan phungkhamiwui pongli verse hina kathada hangli? Hieina Vare hi kachikatha Vare khala kaji ithumli kathada theikhui ngasak khala?**

Satanna Jishuli zakshilak eina konglui khavai sui. Huikhamena chikhurli chizanhailaga khayuiya akha thada ringshokra kaji maphaningvararmana. Avavana Awui phasa mangla chigat khami chi khuisanghaira da maphaningvararmana. Moreiwui zakshak hangkhavai makhalei china A eina Avavali ngapak ngasakhaora da ngacheehaowa. Morei kaphunga mikumona moreiwui vang mahang kharar kachot kachang phungkikaji chi Christana theivai. Moreiwui kharit china Jishuli chiyakha kakha drakhatheira chi mang ngasaka. Drakhatheiwui tengkot chiya Jishuna crossli chotchan sipsat kaphungwui āmahā kachitheina. Moreiwui khonshat china Avava Varewui Nao Mayara Jishuli phungkhavai othun ngasangasaka. Moreina Avava Vareli ngapak ngasak haolapai kaji Jishuna phaningsai. Hiwui ningchot hina Varewui Nao Mayara Jishuwui uklung kaingasaka." The Desire of Ages, page 753.

**Jishu Christana ithumwui vang chiyakha chotchan phungmi kahaiwui aman ithumna kathada runkhavai ngahanka paira? 1 Peter 2::21 li hangkahai thada Awui pheichon shomkhavai chi ithumna kathada yunpaira khala?**

Tuesday

May 16

**Jishuna kathiwi eina ringkhalui ( John 11: 25)**

**1Peter 1:3,4, 21; 1 Peter 3:21; John 11:25; Philipians 3:10,11 kala Revelation 20: 6 chi palu. Hili kachikatha kahaka kachihan mili kala hina ithumli kachikatha kachihan leingasak?**

Kakhanang kachot kaphunga bingli Peterna katom khami letter kakapi chi ithumna theihaira. Athumna Jishuli shitkasang wuivang kaphungna. Chiwui vang athum wuivang ngaranmi kahaiya chili chihanda ngaraipamlu da Peterna hangmi. Vareshi bingna ngaraipamda khalei chiya kharinga kachihan china da Peterna hanga. Khiwui vang khala kaja Jishuna thihailaga ringluishit haira. Ana ringkhalui kaji hi thihailaga chikhurwui eina ngakarhuida ringshokluishit kaji hili theikhui. Jishuna ringkhalui hina vareshi bingwui hakmeikap kaje chihan khavai ngasai. Hina ithumli yarmikahai kazingram chili katang makhavai kharing samphangluira kaji ngashanvā ngasaka. Mashiman kapaiya yarmikahai kazingram chi ithumwui ngasara ( 1 Peter 1:4)Ithumna arui okathui hili chotchan sipsat phungda okthuisāi chilala kakhanang, sikafa kachot sairana, kala chara mataluilakki kaji kazingram chili phaningvada chihantitta ngaraipam salu.

Jishuwui ringkhalui hina ithum thihaisalal ringluishitra kaji kachihan leingasaka. ( 1 Corinthians 15: 20,21) Christana kathiwi eina maringshoksashije nathumwui shitkasang chi aremana. Kha Jishuna kathili yuikhui haida ringshokluishit haira. Chiwui vang vareshi bingwui kachihan chi hili ningshailu. Jishuna ringkashok hi kachangkhat eina okathuiwui thotchanli sachithei kahaiya otshotna. Awui ringkhalui hina vareshi ithumwui shitsang kapai angayungna. Hi ithumli ngashitmihai kasa saikora chiwui juimeikap kaje Jishuna ngashitmi kahai yarkhami otna. Hiwui ngashit khami hi maleisikaje vareshi ithumwui chihan kapai apong khikha maleilakmana.

“Vareshi bingwui vanga kathi kaho hiya atam kashawui vang tankhamanga ngayali pivakahai kathana. Kathiya chi Christawui lungli kashanakha thummi kahai mirin kathāna. Jishuna kazingramwui tekkhamateili ngasoda khara tharan kathiya bing china ringshokluishitta Christawui mai kathei samphangra kala ithumna Awui tekhamatei chili ngarumhaora. (Colosians 3:4; John 8:51,52 chila payanglu) ....Jishuna latra thanghon shitsangda thikahaiya kachivana Awui khon shāda chikhur pamwui eina ngakarhuida tekhamatei katang makhavai kharing chi samphangra.” The Desire of Ages, page 787.

**Khanaowa kathi chi kayakha sakashiya ngasara khala kaji phaningvalu. Ringkhalui ngashitmi kahai hina ithumwui shitkasangli kathada khamataiya ngasahao? Khiwui vang ithumna chihanda kala shitsangda khalei hi khamataiya ngasahao?**

Wednesday

May 17

**Jishu hi Messiahna (Daniel 9:25)**

Jishuna okathuili khamataiya ot kasawui maramli ithumna tamhaira. “ I khipana da nathumna hangra khala?’ da Jishuna sakhangatha bing chili khangahan hieinala kathei samphanga. Simon Peterna ngahankai ‘ Na kharinga Vawewui Nao Mayara Christa china’ da ngahankai. (Matthew 16:15,16) Messiah eina Christa kaji kakhalat ngaraichai. *Christ*’ kaji tui hi Greekwui tui ‘*Christos*’ kajina hiwui kakhalatta ‘*kapangkhui kahaiya*’ or ‘*thao neomikahaiya*’ or ‘*Messiah*’ kajina. Hebrew tuilia ‘*Christ*’ kaji hi ‘*mashiyach*’ kajina. Hiwui kakhalatta ‘*kapangkhui kahaiya*’ kajili kahangna. Old Testamentli tui hi kachungkhali shichinna. Tuikhur hi Persiawui



awunga Cyrus lila chiza. Cyrus hi Vareli katheiya mi mangasasamana. Chiwui vang eina Peterna Jishuli kapangkhuhi kahaiya, thao neomikahaiya, Christana kajiwui kakhalat theihaira. Old Testamentli shichin kasa kala leikasa tui chi Peterna hangshoka.

**Psalm 2:2; Psalm 18:50; Daniel 9:25; 1 Samuel 24: 6; kala Isiah 45:1 hi palu. Verse bing hili *Messiah* or *kapangkhuhi kahaiya* kaji zangkapta leili. Kapangkhuhi kahaiya *Messiah* kaji verse bing hili kapisanghaida khalei hi nana kathada theikhui khala? Peter na tui hi khina da Jishuli kaho ngasasara khala?**

Varena Peterli kasatmida tui hi hangshok khangasakna. ( Matthew 16:16,17) Kha *Messiah* chi khipalak khala kala ana sakikaji otngarut chi khikhala da matheisamana. Kala *Messiahna* kathamameida savara khala kajila matheimana.

Peterna *Messiahwui* maramli mathalak eina matheikakhui thada Israelli *Messiahwui* pongli mi kachungkhanala matheimana. *Messiah* da atungwui verse bingli kapisangmihaida khalei hilila kakhalat hilaka da mahangmihaimana. Kha *Messiah* chi khipa ngasara khala kajiwui pongli hangmi.

John 7: 42 li *Messiah* chi Bethlehem ngaleiwui eina Davidwui shangli rapharasangra da hanghai. ( Isiah 11: 1-16; Micah 5:2) Kha Jehudi bingwui ninglia *Messiah* china David awungana kasa thada athum wuivang rasamira da phaningsai. Ana Jehudi bingwui yangkashe bingli yuikhuimira da phaningsai. Athumwui ngachaili *Messiah* chili Romanwui shipai bingna crossli shaothatra kaji matheivasamana.

Peterna awui chithi kakapi atam chitharan *Messiah* hi khipakhala da mathameikharda theikhui. Kala Christana konglui kahaiya mikumoli kayakha phaningmida ngatang khamiwui ot sarakhala kaji Peterna mathameida thei.

**Thursday**

**May 18 Jishu Jishu hi**

**Messiah Proho Vare china ( John 20:28)**

Jishu hi *Messiah* chilaka kala A hi Proho Varena kaji Peterna thei. Peterna awui chithi kakapi atam chitharan Jishu hi *Messiahna* kala *Messiah* hi Vare lāka kaji thei. Proho kaji hi hili hangda khalei athishurda Vare chili kahangna. 1 Peter 1:3 eina 2 Peter 1:8,14,16 chili kahang athishurda Jishu hi *Messiah* china, Christana, kala Prohona da Peterna hanghaida leili. Jishuli Peterna Vare da hoi.

New Testamentwui lairikli khangatei kakapiya bingna kahang thada Peter nala ngarakzakda Jishuwui pongli hanga. Jishu eina Varewui khangashik hili Peterna Avava eina Anao Mayarawui khangashik da chitheimi. Jishuli khaluma Nao da hangmi. (2 Peter 1:17) Kazingramli Jishuwui pam hi avava Vareli khangshik china khangana theikhui ngasaka.

**2Peter 1:1; John 1:1 kala John 20:28 chili palu. Jishu hi Varena kaji verse bing hina kathada hangli?**

2 Peter 1:1 chili hithada hanga, “ Ithumwui Huikhamiya Vare Jishu Christa” da hanga. Greekwui tuili ‘the’ kaji hi Vare eina Huikhamiya chili rinda tui hi shichina. Kaja tui hina “Vare’ eina “*Huikhamiya*” hi Jishuna da theingasaka. Chiwui vang eina New Testamentwui lairik ngachaili 2 Peter 1:1 chili Jishu hi Vare phalunga kaji tharlak eina chitheimi.

Jishu hi khipalak khala kaji haokaphoka vareshi bing china matheirsamana. Kha athumna teomameida theikhui mamana. Avava, Anao Mayara kala Mangla Kathara hi ngateiserkaja Vare akhana. 1 Peter 1:3 eina 2 Peter 1:17 chili Avava eina Anao Mayara khani khangatei hangmihaida lei. Kala 1Peter 1:12 eina 2 Peter 1:21chili Mangla Katharawui pongli

kapisanglui. Hiwui ngaraikacha khangatei New Testamentli kapisangmihai. Jishu kala Mangla Kathara hi Vare papama kaji New Testamentwui lairik eina kathei samphanga. Ashi kathum hi Vare akhana kaji churchna mathang mathang kathei samphanga. Vare kathum na Vare akha khangasa kajiwui tamkachithei hi Seventh day Adventistwui doctrineli tamkachitheiya akhana. Chiwui vang Jishu hi Messiahna kala Vare na kaji Peter nala mathalak eina chitheimi.

**Jishuna Vare akha ngasada Awui mirin kharing kala kathi chi phaning yanglu. Ithumna khorumda khaleiya Vare chi kachikatha Vare khala kaji hina kathada hangmili khala? Khiwui vang ithumna Ali leishida shitsang phalungra khala?**

**Friday**

**May 19**

**Ngarum kasanga:** “ Greekwui tuili ‘Messiah’ kaji hi ‘*Christos*’ kajina. ‘*Christos*’ kaji wui kakhalatta “ *kapangkhuhi kahaiya*” kajina. Hebrew wui tuilia Messiah kaji hi Jehudi bingli ningkhanmida thanshok khamiya kajina. Varewui miyur bingli Varena chihorakhamiya ngachonkhamiya china. Hebrew eina Greekwui tuili hiwui angayung phashok akha Messiah kaji hi “ thao neokhami or kapangkakhuiya” kajina. Chiwui vang eina New Testament atamli Jishuli Vare wuivang khamataiya ot sakhavai kapangkhuhi kahaiya da theikhui.

“ Messiah’ kaji hi Jishu a khalattana mayai. Kha Jehudi bingna Messiah kajiwui kakhalat hi okathuiwui shong eina khuithuihaoda Ali Messiah da kaho hi Jishuwui ningkachang mangasamana. Kaja Awui manga eina Romewui pangshap chi sashiman khavai kasa hi athumwui ningkachang ngasahaowa. Yaruiwui mangali Messiah da kaho hi Jishuna maningchangmana. Kal Awui ot kasalila chipapama. Chithailala Peterna kala Samariawui shanao pa china Jishuli Messiah da kaho tharan makhararmihaimana. ( Matt 16:16,17; John 4:25,26) Jishu hi Messiahna kaji A khalattana thei. Markna Jishuwui pongli hangkhami chinala proof sai. ( Mark 9:41)” The SDA Bible Commentary vol. 12, page 165.

**Ngapheirum khavai:**

- 1. Isaiah 53: 1-12 chi palu. Hili kapikahai athishurda Jishuna ithum wuivang khi samihaira? Jishuna ithumwui mahut akha ngasamiya kaji hieina kathada ithumli theingasak? Khiwui vang Ana ithumwui mahut ngasapai?**
- 2. Mibingli Biblena ngashitmikahai tui eina ningkhalem ngasakmi. Kaja Jishuna latra thanghon ngashitmikahai chili yangtit ngasaka. Kha mibingna hili mashitsangrarma. Hithada Biblewui ngashit kahai tuili matheikhui kharara bingli nana kathada theikhui ngasakpaira khala?**
- 3. Christa hi Varena kaji hina ithumli Varewui pongli kathada bhap tangasakmi? Khiwui vang hi ithum wuivang khamataiya chānpao ngasahao?**

**Shitkasang kala theikakhui athishurda kharing****Sabbath Ngazin – May 20**

**Haptali pakhavai:** 2 Peter 1: 1-15; Ephesians 2:8; Romans 5: 3-5; Hebrews 10:38; Romans 6: 11; 1 Corinthians 15: 12 – 57.

**Ningphun:** “ Hiwui vang eina ot saikoral themmeida sada, shitkasangli khamathā, khamathāli awor, aworli khalatta khangarin, khalatta khangarinli ningzing hāringda khāngkathei, ningzing hāringda khāngkatheili Varewui acham-aram rin kharing, Varewui acham-aram rin kharingli chinao ngarāwui khamashit kala chinao ngarāwui khamashitli leikashi ngarumsanglu.” 2 Peter 1: 5 -7.

Ajawui haptali tamkikaji hi 2 Peter 1: 1 -14 hi vashungda tamra. Verse bing hili shitkasang manga eina kathara rin kharingwui pongli Peterna tamchitheida leili. Jishuli mirin horsangchao kahaiya bingwui mirinli Varena kayakha pangshap chisnimihai khala kajila hangmi. Matakkhak kahai Varewui ngashitkhami wuivang okathuiwui khamathang otsak kala makaphawui acham saikorawui eina tharhaolu kajiwui ponglila hangmi.

Vareshi bingna kathada kapha khaya otsak sada ringpaira khala kaji Peterna hangmi. Ana hangda khalei kapha saikora hi sokapaiya khamatha acham chili kahangna. Kaphali phakhameiya mathang mathang mathakhameiya kashung khameiya rin ringda kapeichao kahaiya leikashi leikhavai Peterna hangmi.

Kachama moreiwui otsak acham horhailaga Christali kazanga rin kharingwui maram lila Peterna kapisangmi. ( 2 Peter 1:9) Chimang majila Christali zangda Awui huikhami chiwui manga eina Prohowui wungram chili katang makhavai mirin samphangkikaji ngashitkhami ponglila Peterna hanga. ( 2 Peter 1:11)

Kala naomeithuida hili Peterna kathi kaho hi khikhala kajiwui ponglila hanga. Verse 14 mang hili kayakha khamatha kathuka khamashungwui tui hangmihaili khala!

**Sunday****May 21****Aman kasaka shitkasang (2 Peter 1: 1-4)**

**2 Peter 1: 1-4 chi palu. Jishu Christawui manga eina ithumli Varewui lukhamashan pheokhami chi mihaira da Peterna kahangwui kakhalat chi khi?**

Peterna awui chithi kakhane chi ithumwui āman kasaka shitkasang kaji eina haophoka. “ valuable” eina “precious” kaji tui kakhalat ngaraichai. Hiwui kakhalatta aman kasaka kajina. Aman kasaka shitkasang chi ithumna samphanghaira da Peterna hanga. Hi ithumna sakakhui kala ithumna samphangran maningmana. Kha Varena khalem eina khami yarmetna. Nana Christali shitkasang wuivang Varewui lukhamashan china nathumli huimi haira. Huikhami hi nana pheikakhui aman maningmana. Hiya Varewui yarkhamina. ( Ephesians 2:8) Shitkasang hi aman saklaka , khiwui vang khala kaja shitkasang eina maningla Vareli ningyang maung ngasakrarmana. (Hebrews 11:6) Kala shitkasang hina Varewui tuingashit chi unghung ngasaka.

Jishuna ithumli kharing mirin kala kathar rin ringkhavai mi kaji Peterna hanga. ( 2Peter 1:3) Varewui pangshap manga eina ithumna kharing samkaphangna. Ithumli kapang kakhuiya chili ithumna kathei wuivang ithumli pangshap chi khamina.

Vareli leishi khavai ithumli hoda leili. Kha ithumwui mik eina makatheiya chili ithumna kathada leishipaira khala? Jishuli katheiwui manga eina Biblewui manga eina kala okathuili semhaida khalei otbingwui eina ithumna Vareli kathei samphanga. Shitkasangwui mirin kharing kala Awui kahang khangana manga eina ithumna Vare khipa khala kaji kathei samphanga. Chimang machila Ana ithumwui vang kayakha samihaira kaji hinala Vare hi khipakhala kaji theikhavai shakhina. Awui lukhamashan ithumli tashungkhami china Vare hi khipakhala kaji theishingkhui ngasaka.

Varena ithumli aman kasaka ngashitmikahai chila lei da Peterna hanga. Ithumli Varena Awui zak ngamanda sakhui kahai hi moreina zakshingasakda sashiman haira. Chiwui vang ithumna pharaluishit kaja mi ngasaphalungra. Chitharan ithumna Jishuli zangda kadhara mirin ringpaira. Moreili matazangrang lakhawui khamatha chi latluishitta hankhuiluishit khavai Jishuna ithum wuivang ot samida leili.

**Na hi shitkasang makhaleiya ngasashikaje nawui mirin chi khi ngasara? Hi theida nawui shitkasang hi kayakha aman sakkhala kaji nana kathada phaningkhui?**

**Monday**

**May 22**

**Vareshiwui mataimeikap kaje ātāzan chi leikashina ( 2 Peter 1: 5 -7)**

**2 Peter 1: 5 -7; Romans 5: 3-5; James 1: 3,4 kala Galatians 5:22,23 chi palu. Verse bing hiwui ngaraikacha khamataiya tuipong chi khikhala?**

Achalakhawui kathema bing china okathuili sokapaiya otbing chi khimamei khala da list sashoka. Mi akhawuili khamatha sokapaiya otsakbing hi New Testament lairikli kachungkha kapimihai. Peterwui chithi kapabing china hi kathei samphanga. Peterna khamatha acham bing chi mathang mathang hangta mamanlaga khanaowa sada khamataiya sokhangayi acham chiya leikashina da hangmi. Peterna 2 Peter 1:5-7 li kapisangmi kahai chi kakhalat leilak kahaiya tuina.

Shitkasang: Jishuli kahui samkaphang hi shitkasang manga eina kharana. ( Galatians 3:11 & Hebrews 10:38)

Kapha: Greekwui tuili ot saikorawui kapha chili *arête* da hoi. Achalakhawui kathema bingna hiwui pongli kachungkha hanga. Shitkasang hi matailaka kha shitkasang hina khangachei mirin khaira phalungra. Chieina kapha khangaronga otsak chi sashok phalungra.

Awor: Awor hi Jishu Christali ithumna kazang chitharan samphanga.

Khalattali singkashap: Kakashunga vareshi china khalattawui kaphaning khamajuk kala otsak saikoralisingshapa. Hili masingkhui akha makapha ot chi sashokhaowa.

Ning khangatar: Kachot kachang kala kachikatha kasak ralala khamashung chiwui vang nganingtit kashapwui pangshap khalei.

Varewui acham kharing: Romanwui tuili “godliness” kaji hi khamashung chiwui athishurda kasa da theikhui. Hiwui acham otsak hi Vareli kazang tharan sashapa. 1 Timothy 2:2 wui athishurda hiwui kakhalatta khamashunga Vareli shitkasang manga eina kapha acham sakashap da theikhui.

Lumashanthei khangarok: Vareshi ithum hi shimkhur akha kathana. Vareli kathei hina ithum chinao ngarawui alungli lumashan kathei hi rashok ngasaka. China shimkhur mangli majila katei binglila vashungshapa.

Leikashi: 1 Corinthians 13:13 li Paulna kahang thada Peter nala saikorawui tungli leikashi hina khamataiya sada hanga.

**Sokapaiya kapha acham chi leikhavai panglak eina hotnalua da Peterna hangmi. Hiwui kakhalat khikhala? Mikumo morei kaphungana hi sakashpwui pangshap khi lei?**

**Tuesday**

**May 23**

**Shitkasang kala theikakhui athishurda kharing ( 2 Peter 1: 8 -11)**

Vareshi akhana leiphalongkikaji kapha acham otsak chili khare sada Peterna hanga. Chiwui thili hi leikahaiwa athei chi khikhala kaji hangmi.

**2 Peter 1: 8 -11 chi palu. Peterna apong khanili matuimi. Chiya (1) vareshi bingwui vang samikahaiya (2) kala vareshi akhana kathada ringphalungra. Khani hiwui khangashik khi lei?**

Jishuli zangda khamshung chiwui athishurda ringlu kaji Peterna katommi. Shitkasang, kapha, awor, khalatta singkashap, ning kathar, Varewui acham kharing, lumashan kathei, leikashi hi mataimeida theilu. Hi khalei chitharan nathumna Proho Jishu Christa khipakhala kaji mathameida kathei samphangra. ( 2Peter 1:8)

Vareshi mi kachungkhana hili hangda khalei sokapaiya acham bing hi maleimana. Athumwui kanthui kahai mirinli makapha morei sakahai saikora chi pheomihaira kaji malaikhok haowa. Kha Christana athumli pheomihaida Awui kathar kala kakashunga rin chi mi. Chiwui vang vareshi bingna panglak eina hotnalua da kahangna kaja hi huikhami samphang kahaiya vareshi bingli Varewui sangasak khangai otngarut china. Kachama mirin acham chi maringpaimana. Kharewui morei mirin acham eina kharinga athum chili bichar sara.

“ Shitkasangwui pongli ithumna kachungkha kasha samphanghairs. Kha shakhui kahai athishurda ithumwui otsak eina ngasoda saphalungra. Khalattali mi kachungkhana chipatpamda leili. Khiwui vang khala kaje athumna mirinli pailak eina khui. Kala ringkapha mangli kahaopama. Athumwui mirinli chotchhan mirin chi khikhala da matheila pailatlak kahaiya mirin okthui.” Faith and Works, page 50.

**Romans 6: 11 chi palu. 2 Peter 1: 8 -11 li Peterna kahang thada Paulna kathada hangkhala?**

Nawui shitkasang theikakhui chiwui athishurda ringlu kaji hanga. Khiwui vang jilaga ithum ara Christali zangda midhar ngasahairs. Ithumwui morei saikora chi pheomiserhairs chieina Awui kathar rin chi ithumli mikahai chiwui athishurda ringlu da kasohai. Chithada kasa tharan ithumna Christali khangamana mirin chi ringpairs. Christali ngamanda kharing kaji hi vareshiwui otngarutna.

**Nana kayakha eina tangda Christali ngamanda okthuili khala? Nana kathada Ali ngaman khameiya rin ringpairs khala?**

**Wednesday**

**May 24**

**Mirin khuithuimi kahai ( 2 Peter 1: 13,14)**

1956 kumli Oscar Cullman kaho mipa hina "Immortality of Soul" (mathi kapaiya mangla)kaji lairik kapishoka. Chili Mangla hi kathi or katang mavaimana kaji hiya khangwuina da ana hanga. Hiya ringkhaluiwui pongli hangkahai chili makhamaya akhana da hanga. New Testamentli kathiya bingna ringshok luishitra da hanga kaji Cullman kaho mipa hina hanga. Ina kapikahai khangatei li ringphalak kahai kala zakshilak kahai mazangmana da ana hanga.

**1 Corinthians 15: 12 -57 chi palu. Paulna kathiwui maramli kathada hangmi?**

New Testamentli kathi eina ringkhaluiwui apongli tamkhui kahaiya athum nala Cullman na hangda khalei chili mayara. New Testamentwui khararchan lairikli kathiya china ringshok luishitra da tamchithe. 1Thessalonians 4:16 -18 li leikashiya bingna thihaisalala ringkhalui ngathorli ringshok luishitra da Paulna shitkasanga bingli ringpha ngasaka. Jishuna latra thanghon kathiya bing chikhurwui eina ringshokra. 1 Corinthians 15: 12 -57 chili ringkhaluiwui apongli meisa eina hangmihaida lei. Vareshi bingwui shitkasang ning khangnung hi Jishuna ringkashok chili pheisin sai. Jishuna thihailaga chikhurwui eina maringshoksashije ithumna Ali shitkasang hi arema ngasara. Kha Christana kathili yuikhuida chikhurwui eina kachangkhat ringshok haira da Paulna hanga. Kathiwui eina ringshok khare hi Jishuna. Chiwui vang hina Ali shitkasanga saikora mashoila ringshok luishitra kaji shakhina.

1 Corinthians 15: 35 -50 chili ringshok thanghon thikapaiya kala shuikapaiya phasa chi mathiluilakikaji katang makhavai phasa onhaora da Paulna hangmi. Chiwui vang eina kathi eina ringkhalui hi mangapak kapaiyana da tharlak eina New Testamentwui lairik hina tamchithe. Kha mangla hi mashiman kapaiya kala mathi kapaiyana da New Testamentwui Bibleli hangkahai maleilakmana. 2 Peter 1: 12 -14 chi pakakhui tharan ringkhaluiwui khamashung khararchan theikakhui hi khamataiya ngasai.

**Thursday**

**May 25**

**Shitkasang wuivang kathili makhangachee ( 2 Peter 1: 12 -15)**

**2 Peter 1: 12 -15 chi palu. Peterwui phasa thaklak eina khuithuimi haora (thihaora) da Peterna kahangwui kakhalat chi khikhala?**

2 Peter 1: 12 -14 chili khiwui vang Peterna tui hi kahang khala kaji ithumli hangmida leili. Church wuivang hina Peterwui khanaowa chānpao ngasai. 2 Peter 1: 13,14 chili palu, Peterna thakda thihaora da phananga. Awui phasa khuithuimi haora kajiwui kakhalatta thihaora kajina. Iwui phasa thaklak eina khuithuimi haora kaji hi Peterna thakda thihaora kajili kahangna. Peterwui tui chi palaga mangla hi kathi mavaimana kaji kahang khikha maleimana. Kaja Peterna kahang athishurda awui phasa khuithuimi kahai kaji hi okathui rin kharing saikora hi ngachangsang kahaina. Phasana thihailaga mangla ngateida maokthuimana.

2 Peter 1:12 -15 chi palushitlu. Peterna awui kathili kathada phaning khala? Kala awui kaphaning shitkasang china ithumwui shitkasangli kathada tamchitheimi khala?

2 Peter 1: 12 -15 chili Peterwui mirin thakda khuithuimi haora kaji Peterna kapikahai ithumna theihaira. Kha ana kathili khangachee khikha maleilakmana. Kha ana haiphungda thuihaokikaji Vareli shitkasanga athum bing wuivcang khananga. Athumwui shitkasang chi masanungla ngatarda khamashung chili nganingshap khavai katommi. Peterna athum bing

wuivang phaningvami kaja ana vareshi bing chili ngasopamlaga otsakrum akha athumna makongluimara da phananga.

Peterna Proholi kayakha thukda ngashik khala kaji ithumna kathei samphanga. Ana thkda thihaora da kathili manganglakla hangmi. Kala awui athit chila ringphalak eina thihaokikaji mangasamana. Chithailala ana awui vang maphaningla shitkasanga katei bingwui vang phaningvami. Peter hi khalattawui vang makaphananga shitkasang eina mibingli ringkachitheiya mi akhana da shankhui. ( Acts of Apostles ,page 537,538 chi pavalu.)

**Ithumwui shitkasang hina kathada kathili ngasungshap khala? Jishuna sachitheimi kahai china ithumli kachikatha chihan khavai mikhala? Ithumna thihaisalala hina kathada ithumli tekkhamatei kachihan chi leingasak khala?**

**Friday**

**May 26**

**Ngarum kasanga:** Peterna thihaora kaji ana thei, kaja Jishuna Peterli kathiwui pongli hangmihaisai. ( John 21: 18)

Peterna kathada thi? “ Peter hi ayar ngaleiwui Jihudi akhana. Ali shaomilaga crossli shaothatta. Peterna awui kathili ngasung khavai ngaranping haisai. Ali tamkhayang tharan Jishuli khalan kahai morei kasa chi phaningunga. Peterna crossli thikikaji hi makhuisangrarsā mana. Kha paokapha vashungkhavai awui kathili mathānthawa. Awui Proholi mamayala ngareithui kahai chi phaningchinga. Chiwui vang awui akhavana awui kathi thada thikahai chi phaningvalaga awui vanga khayakakā ngasahaowa. Ana Jishuli makhamaya otsak chiwui vang khananga. Kala Christana ali chiwui vang pheomi. Christana Peterwui morei khayon chi pheomihaira kachi theingasakda Peter lwui yaobingli homlu da kasoi.Kha Peterna awui sakahai morei chiwui vang phaningvalaga ning makatunna akhana da phaningkhui. Chieina ana ali shaothatikaji mipa chili ili mashoda kangyuilaga shaothatmilu da poi. Awui kapo chi khuisangmida ali mashoda cross tungli shaothathaowa.” The Acts of the Apostles, page 537,538. Chithada sada kathina Peterwui mangali nganinghailala awui yaonao bingwui mangla rin shong phaningvami.

**Ngapheirum khavai:**

- 1. Vareshi bingna kathara rin ringkhavai Peterna kapimihaida khalei saikora chi majukvalu. Hi theitheilaga Khiwui vang eina ithumna shitkasang hi atam kachida ngapatshonhao khala?**
- 2. 2 Peter 1: 5 -7 chi classli chitheilu. Kathada ithumna hikatha sokapaiya khamatha otsak hi mibingli mathameida sachitheipaira? Kala hi sakhavai mibingli ithumna kathada ngachonmipaira?**
- 3. Peterna Jishuli khalanhaisalal Peterwui chithili kapikahai bing china chithei kaja Peterna Christawui vang pangshap khaleiya mi akha ngasami. Peterwui mirin acham hina ithumli khi tamkhui ngasak?**
- 4. 2 Peter 1:12 li “khamashungli angayung satit kakhui” wui maramli Peterna kapi. Peterwui atamli khamashung chi khi ngasā, kala aruihon thotwui khamashung chi khi?**

## Lesson 10

May 27 – June 2

### Bible kala naodawui pongli hāngmarān khami

#### Sabbath Ngazin – May 27

**Haptali pakhavai:** Isaiah 53: 1-12; Daniel 7: 13,14; 2 Peter 1: 16 -20; Matthew 17: 1-6; 2 Timothy 3: 15-17.

**Ningphun:** “ Marān khami tui chi makahat marada shitsang chaolu. Hiwui pao hi kazing mathangrang lakha kala zingthanwo mashokrang lakha tangkhamang pamli horkhangasaka thaomei kathāna.” 2 Peter 1:19.

Peterwui chithi hi tamrashumlaga ithumna theikhangayi khalei chiya ana shitkasangda khalei chi kayakha mashung kaji hina. Peterna shitsangda khalei shitkasang kachihan chi kayakha kashungkhala kaji ajawui haptawui verse bing chili kathei samphangra. Ana khiwui vang hiyakha kashungda shitsanghao khala kaji hangmida leili. Mibingwui kathem eina phorkakhuiya khararchan chili mashitsangmana da Peterna hanga. ( 2 Peter 1:16) Hikatha khararchan hi meomali khakharuma mibingwui dharmawui khararchanna. Peterna shitsangda khalei hi maram khani wuivangna.

Khare sada, “ ithumwui Proho Christa” li Peterwui mik eina theichao kahaina. ( 2 Peter 1:16) Kakhane maram hina mateimeilui, Peterwui mik eina theikahai thada mi kachungana athumwui mik eina Jishuli matheiranga. Kakhane maram sada Peterna “maran bingwui pao” chili mashungphalunga da awui shitkasang chi chili pheisintit khuiya. Peterna Bibleli yangungluishita. Jishu hi khipakhala kaji maran bingna phongmi kahai chieina theishingkhui. Phongmaran khami tui hi Varena Awui miyur bingli theingasak khangai hangkhamiwui paona. Hi naoda rashokki kajiwui hangmarān khami tuina. Peterna hangda khalei phongkhami tuibing hi Jishuna Awui maramli phongmihai kasa chi shupkakuina. Peter eina Jishuna kharinga Bible tuili saklak eina kakuithada ithumna nala khuiphalungra.

## Sunday

May 28

### Old Testament atamli Jishu ( Psalm 22)

Peterna hangda khalei chi makhangapata tuina kaji awui chithi chieina theingasaka. Ana Jishuli theikakhui samphangaoda Jishuwui apongli hangda khalei saikora chi khamashunga tui ngasai. Jishuwui apongli Old Testamentwui maran bingna phongmi haikasa ungakshung chi Peterna thei. Bibleli kapikahai tui saikora hi Varewui Tuina kaji Peterna thei. Kala Old Testament li phongmihaikasa tui china phasa khavaiya mikumo akha sada rai kaji hi Peterna theishingkhui. ( John 1:14)

1 Peter 1: 10-12 chili Hebrewwui Bible li Jishuwui maramli maran bing china tamchitheimi kahai chili ana chizamida hangchithei. Jishuwui pongli Old Testament lairikna khamataiya maram khani hangda khalei chi Mangla Katharana theingasak haira da Peterna hanga. Chiya ‘Messiah na kachot kachang phungda thimira’ kala ‘ tekkhamatei khayui’ chi samphangra kaji hina. ( 1Peter 1:11)



**Psalm 22; Isaiah 53: 1-12; Zechariah 12: 10; Zechariah 13:7; Jeremiah 33: 14,15 kala Daniel 7:13,14 hibing hi pavalu. Old Testamentwui lairik bing hili kathada Jishuwui pongli hangmaranli khala?**

Huikhamiwui khararchan tui hi Peterwui chithi pakakhuiya athumli theingasak khavai Peterna 1 Peter 1:10 -12 chilila hangmi. Achalakra maran bingna matheikasa chungkhamei chila theingasakhaira. Maran bing china athumwui atamwui apong mangli hangmisai. Kha Jishuna rada khamataiya ot sakhami chi athumna matheisamana.

Peterwui atamli rashokda khalei otshot bing chi achalakra maran bingna hangmaran khami tuina. Athumna Mangla Katharana kasatmida khamashung tui hi shada theikakhui chi tamkachithei samphanga. ( 1 Peter 1:12) Chiwui vang achalakhawui maran bingna tharlak eina matheikhui kharar saikora chi mathingrik eina theikhui ngasakda Christana chotchan phungda cross tungli thikhami huikhami khararchan hi ithumna mibingli tamchithei. Peterwui atamli okthui kasa shitkasanga bing china ithumli ngasada tekkhamateiya zimiksho chiwui vang ngaraisara. Phongmaranmi haikasa akai khare chi ungshunghaoda khanaowa rarada khalei chi mangapatla ungsunglakra da ithumna theikhui. Jishuna morei kaphunga bingwui vang rathimi kala Ana katang makhavai ngaranmi kahai chili ngarum khavai rahokhui luishira kaji hi makhangapata tuina kajina.

**Bibleli ngashitmi kahai rashok kahai nana kathei khimamei leikhala? Nana kachipali ngaraipam leili khala? Kasaka mirin chotchan samphanglala nana kathada hili yangda nganingtit paira khala?**

**Monday**

**May 29**

**Hakkhamahā khangam kharei mik eina kathei ( 2 Peter 1: 16 -18)**

**2 Peter 1: 16 -18 chi palu. Peterna Jishuli shitsang khavai apong katei khalei chi khikhala?**

Old Testament li Biblena maranmi haikasa chieina Peterwui shitkasang pheisin sangasakmi. Chimang majila Peterwui mik eina theikhui kahaiya kachungkha khalei chiwui vang ana mibingli shakhi mida tamchithei. Vareshi bingna shitsangda khalei hi kathema mibingna phorkhuilaga hangda khalei chili shitkasang mangasamana. Kha kachangkhat eina mikna shakhi sada theikahaiya rashok kahaiya thotchan otshot chili angayung phonkhuida chili pheisin salaga vareshiwui shitkasang tamkachithei hi khaleina. New Testamentwui paokapha lairik mati chili Peterna experience samphang kahai chi ithumna pakakhui samphang haira. Peter kaho mipa hina Jishuli nganailak eina ot sakruma akha ngasada Jishuwui matailak kahaiya mirin otsak saikora chi kathei kasha samphanga. Jishuna tamkachithei kala matakakha kahai samikahai saikora chi Peterna kathei kala kasha samphangsera. Luke 5: 4-6 li Jishuna matakakha kahai sachitheimi kahai chi Peterna thei. Kala Jishuna katiwui eina ringshok kahaiwui thili Galilee wui apam chili Peterna kathei samphanga. ( John 21:15)

**2Peter 1:17,18 chili Peterwui mikna theikahaiya matailak kahai chitheimi. Chiwui khamataiya otshot chi khikhala?**

Matailak kahaiya Peterwui mikna kathei samphang kahaiya chiya Jishuwui zak khaon china. Chitharan Jishuna Peter, James kala Johnli seiha sakhavai kaphung tungli khuikai. ( Luke 9:28) Chitharan athumwui miktali Jishuwui zak chi horchamri kahaiya zak onlaga Jishuna Moses

eina Elijahli ngasosai. Chiwui thili akhon akha vaorada hanga, ‘ hi lwui khaluma Nao Mayarana. Ina Ali ningyang unglaka.” ( Matthew 17:5)

Peterna awui mirinli Jishuli ngasoda Awui pongli kachungkha kathei samphanga. Atungli hangkahiya hina chithei kaja Jishu hi Varewui Nao Mayara laka. Avava Varewui khangaran unghung khavai Ana okathuili rai. Jishu hi Varena.

**Nawui manglarinli matailak eina katom khami chi khi ngasakhala kaji phaninglu. China nawui manglarinli kathada mathuk ngasak kala china kayakha mangla rin shongfali khamataiya ngasami khala?**

**Tuesday**

**May 30**

**Ithumwui uklungli zingthanwo ( 2 Peter 1:19)**

**2 Peter 1:19 chi munlak eina payanglu. Peterna hangda khalei tui hi ithum wuivang kathada matailak kahai ngasahao khala?**

Verse hili kahor eina tangkhamangwui khangatei Peterna chitheimida lei. Khani hiwui khangatei Bibleli ithumna kachungkha samphanga. ( Genesis 1:4; John 1:5; Isaiah 5:20; Ephesians 5:8) Bible hina tangkhamangli horkhangasaka kahorna da Peterna hanga. Bible translation kaikhalia ‘dark’ kaji hi ‘dirty’ da shichina. Hiwui kakhalata *khamakhaowa* kajina. CHiwui vang eina ithumna Jishuna malatraranglakha eina tangda kharinga Bible hi singphalungra kaji Peterna hanga. Ithum hi moreili konglui kahaiya okathuili okthuida khaleiya morei kaphunga mina. Ithumna tangkhamangwui eina kahor chili thanshokmi khavai Varewui pangshap chi darkar sai. Jishuna ithumwui kahorna.

Peterna ithumwui atazan chili chizada hanga. Hi mathameida theikhavai New King James version chili hangkahi chi yangsa. “ kazing mathangrang lakha” or “ ngathor shongwui zingthanwo mashokrang lakha” da kapihai. Hiwui kakhalatta Jishuna malatrarang lakha kajina da kaikhana hanga. China ithumwui atazan ngasara. Ngathorshongwui zingthanwo ithumwui uklungli khaleina da hangpai. “Ngathor shongwui zingthanwo” kaji hi Jishuli kahangna. ( Revelation 2:28; Revelation 22:16) Ngathor shongwui zingthanwo ithumwui uklungli khalei kaji hi theikapaiya akhana. Hi Jishuli ithumna shitsangtitta khalei kajiwui ideali theikhui. Ithumna Ali horsangda shurtit kahai tharan Jishu Christana ithumwui mirinli kayakha thukda zangpam mili khala kaji theikhui. Ithumna Jishuwui pongli tamkachithei mang majihaila kha ithumwui mirin kharing otsak lungli Jishuwui rin ringphalungra. Ana ithumwui shitkasang shāphai khavai kachihan ngasaphalungra. Ana ithumwui shitsang khavai angayung ngasami. Chiwui vang eina Peterna Bible tui katam eina Jishuli zangda kharing hi leikhavai hangchithei khamina. Ngathorshongwui zingthanwo Jishuna ithumwui chihan khavaina, Ali zangda ringlu.

Kahor chi ithumwuili leingasak phalungra. Chieina mibingna ithumwui kahor chi kathei samphangra. Okathui apug-apaga hi Varewui khamashung tekhamatei chieina horngasak phalungra. Kala kahor hina miyur saikoral hormi phalungra. Pao hi shakahaiya mi kachivana kahor hi theingasak phalungra. Jishuna ithumwui kahorna Ana ithumli horngasakda leili. Chiwui vang eina tangkhamang apam kachivali ithumna horngasak phalungra.” Christian experience and Teachings of EG White, page 220.

**Bible kapa eina nana Jishuwui pongli kathada mathameida theikhui samphang?**

Wednesday

May 31

**Makhangapata phongmaran khami tui ( 2 Peter 1: 19 -21)**

**2 Peter 1: 19 -21 chi palu. Maran khami apongli Peterna kathada hangli? Maran khami tui bing hi miwui ningli rakazangzang matuikashok maningmana kajiwui maramli Peterna hangda khaleiwui kakhalat khikhala?**

Vareshiwui shitkasang hi thangkhomei mibingna semkhuilaga hangda khalei chili shitkasang maningmana da Peterna tharlak eina hangmi. Hi khamashungana kaji Peterna prove hithada sai. Khare, Jishuli Varena khaya kala tekhamatei khami chi mibingwui mikna kathei samphanga ( 2Peter 1:16 -18) Kakhane, Jishuna kharawui pongli Biblena hang maranmihairasai. ( 2 Peter 1:19 -21)

Phongkhami Bible tui bing hi maran bingwui theikakhui ningli rakazang chi hangmi phapha kaji maningmana. ( 2 Peter 1:20) Kharinga Bible tui hi mibingna makhonlak eina paphalungra. Hi ichamchamlak eina miwui ningli kakapi maningmana kaji Peterna hangmi. Hi achalaxha Mangla Katharana kasatmilaga kapishok kahaiya tuina. Chiwui vang hi ningsanglak eina kakhalat theikhui khavai phalu da Peterna hangmi. ( 1 Peter 1:10)

New Testament atamli khalei churchwui mibing china kharinga tui tamngarumma kajiwui kakhalat khikhala? MVareshi bing hi asa akhamanga. Vareshi bingna khamashung kahor chili khalanpaishina da Peterna hangmathinmi. Ot sakkharum eina ngasoda khokha sada Varewui church haksang reisang ngasak phalungra. Mangla Katharana zangmida khokha kasa hina churchwui reikasang khuirai. Chiwui vang hithada katom khangarok kala kasat khangarok eina mibingwui theikakhui mataisang ngasaka kala thuk khameiya manglarin leingasaka. Mi akhana ngathum kahaiya Biblewui tui saikora chi theiser majimana, chiwui vang akha eina akhawui kathei kasha chi kasat ngarokda juikhameiya rin ringda phongkhami tui matheiva kharar ot chila theikakhui samphanga.

Verse hili Peterna maram chalak eina vareshi bingwui ngachaili makhamashunga maran kala minama tamkachitheiya oja bingwui ponglila kapimihaida leili. ( 2 Peter 2:1) Biblewui tui chi mathameida theikhui khavai churchwui lungli ngasanrum khavai Peterna hangmida lei. Churchwui alungli Manglana chithei khami chili makhuisang khangaiya mi kachungkhana khamashungwui eina mathuihaira. Athum chi kalakashiya bingna. Hili ngashar khavai ithumlila chitheimida leili.

**Khiwui vang churchwui hangmachin khami kala kasat khami hi khamataiya akha ngasa khala? Kala ithumna mibingwui theikakhuili kayakha eina tangda mayapai khala?**

Thursday

June 1

**Ithumwui mirinli kharinga Bible ( 2 Timothy 3: 15 -17)**

Bible hi khamataiyana kaji Peterna ithumli theingasak haira. Vareshi wuivang Bible hina khamataiya ngasai kaji 2 Peter 1: 19 -21 chilila chitheimi haira. Kharinga Bible tui hi Varewui pangshap eina kashokna kaji hieina hangmi. 2Peter 1:21 chili tharlak eina chithei. Bible hi mibingwui ningli rakazang zang katonga chi kapikashok maningmana. Hiya Mangla Kathara china kasatmilaga kapishok khangasakna.

**2 Timothy 3: 15 -17 chi palu. Bible hi ithum wuivang kaykha khamataiya khala kaji hina kathada ngachonmi? 2Peter 1: 19 -21 chili hina kathada katomda leili?**

Churchwui alungli ngwui kapai kala kalakashi rashokki kaji maramli Timothyli Paulna hangmi. 2 Timothy 3:16 chili Biblewui kankhana kala kayakha mataikhala kaji Paulna chitheimi.

Biblewui kankhana apong kathum eina Paulna chithei.

*Doctrine tamkachitheili:* Doctrine hi churchwui tamkachitheina. Kala doctrine tamkachithe saikora hi Christali chizada Awui rin chili ngasunkhui phalungra. Varena ringngasak khangai chiwui athishurda tamkachithe ngasa phalungra. "Awui khangaran kaphaning hi kakashunga kapha china." Romans 12:2)

*Khayon khamang kasa chi mashung ngasak khavai:* Bible hina mashungkhui khavai kãnnai da Paulna hanga. Khamashung ot chi sakhavai kannai. Chi takam eina Peter nala phongkhami Biblewui tui hi tangkhamangli horkhangasaka thaomei kathana da hanga. Ithumna kathada kashung khameiya rin ringphalungra khala kajiwui ponglila Biblena chitheimi da Peterna hanga. Khamashung kala khangwui acham hi khikhala kajila Biblena chitheimi. Chimang majila Varena ithumwui kahui samphangkhavai ngaran khami chila Biblena theingasakmi.

Kathada kahui samphang paira: Ithumna kahui kathada samphangpai khala kajiwui pongli kharinga Bible tuina hangmi. ( 2 Timothy 3:15) Jishuwui rin Biblena chitheimi kala Jishuna ithum morei wuivang thimida ngatangmi kajila chithei. Chiwui vang Bible na doctrine tamkachitheili, mashungmi khavai kala kahui samphang khavai apong theingasaka. Chiwui vang eina Bible hina tangkhamang shongfa horkhangasaka matakakha kahai tuina. Hi Ngathorshongwui zingthanwo Jishuna malatrarang lakha eina tangda leishonkikaje kahor china.

**Friday**

**June 2**

**Ngarum kasanga:** “Biblewui khamashung hi khikhala da phakakhui hi mashun makhui theithangkhameiya mi kachivana theikhui phalungkikaje otngarut akhana. Chithada kasa tharan athumna kahor chili mi katei bingli thanzangmi paira. Thangkachida ithumna kharinga Bible tui chi tamphalungra. Ithumwui khamajuk kachiva chi Biblewui athishurda leika mashurmakhala kaji Bibleli ngaheo phalungra. Biblewui Verse akhali verse khangatei akhana khalatkhami ngasaphalungra. Hiwui kakhalatta Bible na Bibleli khalat ngasak phalungra. Kala hiwui khamashung chi khikhala kaji theikhui khavai Varewui ngachon khami chi leingasaklu kaja ithum mi kachivawui Awui mangali kanganingserra.

“ Bible khamashung kapimikahai chi kathem thangkama bingna masho ngacheimiserhaida leili. Athumna kathemana da khuilala Biblewui kakhalat hiva ngathum kahaiya matheikhui kharara tuina da tamchitheida leili. Athum bing chi mikhanama oja bingna. Hikatha mibingli Jishuna hithada hanga: “ Kharinga tui chi khikhala da matheikhui kharara khayon kasabingna . Athumna Varewui sashap pangshap chi khikhala da matheimana. Biblena Biblewui tui khalatki kajina. Iwui tamkachithei hi Varewui eina kharaka, or I khalattawui eina khalat kakhui khala kaji theikhavai Christana chitheimihaira ( John 7:17) Mibingna Biblewui mashun tui chili khuisangda chiwui athishurda mashunglak eina tamkhami tharan kazingrao bingna ringphada sora. Kala mibingli mikhanama ojabing thada mathanngui akha ngaphayang eina leida khaleiya shiman kahaiya mi thing-thing Christa wuili athumna thanzangmira.” The Great Controversy, p. 598,599.

**Ngapheirum khavai:**

**1. Bible mathameida theikhui apong katei khi leikhala?**

**2. Martin Lutharna hithada hanga, “ Biblena Biblewui kahorna” hiwui kakhalatta Bibleli kapikahai saikora chi khangui makhaleiya kakhalat ngaraikacha khamashunga serra. Akai akha chi theikhui khavai khangatei akhali kapisangmihai. Hikathawui example nana Bible palaga samphang kahai khimamei khala?**

**3. Bible kapā eina nana Proholi kayākha thukda ngashik ngasak khala da kachikatha mina nali ngahānshije na khi ngahānkāra?**

## Lesson 11

June 3 – 9

### Makhamashunga tamkachitheiya bing

#### Sabbath Ngazin – June 3

**Haptali pakhavai:** 2 Peter 2: 1-22; John 8: 34 -36; Matthew 12: 43 – 45; Jude 4 – 19; Genesis 18: 16 -33.

**Ningphun:** “ Athumna ningkhan mirada ngashitmānlaga athum khalattana makaphā makhayā khamakhaowui rao sada leili. Kaja kachikathā ākhali mayuikharara mi chi ot chiwui raona.” 2 Peter 2:19.

Kakhanang kachot kaphung bingli Peterna awui khare letter chili katom khami tui eina hangmi. Athumna kachikatha kakhanang kachot samphang khala kaji matheimana, kha atam chitharanwui churchli mahang kharar kasak rashunga. Romewui khamunga bingna vareshi sashiman khavai panglak eina sai.

Churchli khalei memberswui alungli kala ayarshong einala ngara da Satanna apong khani hili churchli ngsungda ngarara. Romewui khathanna awunga bingna vareshi bingli rekkakharek mang majila kachikatha khangatei apong eina panglak eina shiman khavai sai. Chithada Jehudiwui alungli achalakra minama maran eina makhamashunga tamkachitheiya ojabingli ngasung papama. Chi takam eina Peterwui atam lila Jishuwui thikashura bing china mikhanama makhamashunga oja bingli ngasunga. Hikatha ngwuida tamkachitheiya ojabing chili ngashar khavai Peterna hangmathinmihai. ( 2 Peter 2:1) Athumna churchwui alunglila ngwuida tamkachithe wuivang ngapā- ngapā ngasaka. (2 Peter 2:2)

Peterna ngashar khavai hangmathin khami tamkachithe bing chi khimamei khala? Peterna athumli kathada ngahankami? Aruihon ithum churchwui alungli kaikhavai panglak eina sada leili. Peterna ngasharkhavai hangmathin khami tui china aja ithumli kathada tamkhui ngasakda leili?

#### Sunday

June 4

#### Mikhanama maran kala makhamashunga oja bing ( 2 Peter 2: 1 -3, 10 -22)

Haophok kharewui church mibing chi kakashunga vareshina da khuipailaka. Jishuli shitkasanga bing chi khokha sada chingri eina leisai da phananga. Kha chikatha ningphanin chi khangui ngasapai. Jishuwui atam lila khangang kachungkha samphanga. Matalak eina hithada khangang hi churchwui alungli rashoka. Makhamashunga mikhanama tamkachitheiya oja bing hi khangacha eina shitsang khangaruma bingwui ngachaili rashoka. New Testamentwui atamli haophok khare church mibingli ayarshongwui einala rekkharekta kachot khang phunga.

**Peterna awui chithi kakhane chili churchwui alungli shokda khalei chili khangasungwui pongli hangda khalei chi khimamei khala? 2 Peter 2: 1-3.**

---

Chitharan atamwui church chila chingri kahai khokha kasa maleimana kaji chitheida leili.

**2 Peter 2: 1-3, 10 -22 chila palu. Verse bing hili Peterna kathada hangmathinmida leili? Churchwui alungli makhamashunga mikhanam ot sada khalei chi khikhala?**

2 Peter 2: 1 chili kanthui kahaiya atamli minama maran lei da Peterna chitheida lei. Kala naoda mikhanama ojala rashokra da ana hangmathinmi. Athumna sada khalei otsak chila

Peterna hangtami. Shiman ngasaki kaji kala morei lungli okathui athum bing hi Peterna hangmida lei. Kala mikhanama maran bing china athum khalattawui khangwui mang majila katei bingli ngwui khangasakwui khayon athumwui tungli tara. Makhamashunga tamkachitheiya oja bing chi kalakashi ngasar da Peterna hangmaranmi. Hikatha mi khanama makhamashunga chili Peterna makhamaya ithumna theikhui haira.

**Mikhanama oja bing hili Peterna kathada hangmi khala kaji yanglu. Hina khamashungwui pongli kathada theingasak? Churchwui alungli makhamashunga mikhanamwui tamkachithe marashok khavai kathada sapaira?**

**Monday**

**June 5**

**Christali zangda ningkhan samkaphang ( 2 Peter 2: 18)**

**“ Akachanga tui makhaninga khamasai tui chi athumna thām-thām matui. Katei bingli thanngui khavai sai. Athumna shitsang dhadhara athumli moreiwui otsak eina suita konglui khavai sai.” 2 Peter 2:18. Peterna verse hili ning ngashar khavai hangkhami chi khikhala? 2 Peter 2:19 li hangda khalei china atungli ngahanda khalei chi kathada ngahanka khavai apong ngasali khala? Verse 19 li ningkhan kaji hiwui khamataiya chi khikhala?**

Peterna awui chithi pakakhui samkaphang bingli makhamashunga mikhanama oja bingli ning ngashar khavai hangmi. Mikhanama oja bing china mibingli ningkhan mira da ngashitda kha kachangkhat eina athumna mibingli rao sakhavai thankazatna.

Mikhanama oja bing hina huikhamiwui paokapha hi masho ngachei ngasakda leili. Christali zangda ningkhan samkaphang kaji hiya moreiwui raopam eina ningkhan khangasak kajina. ( Romans 6: 4-6) Khamashunga tamkachitheina da hanglaga shiman khavai khangwuiya shong zatakha chi makhamashunga tamkhame bingna. Peterna hangda khalei makhamashunga kaji hi khili kahang khala da Bible katheiya kaikhana ngahanna. Kha hangda khalei makhamashung kaji hi morei kasa chili kahangsera.

**John 8: 34 – 36 chi palu. 2 Peter 2: 18 -21 li Peterna hangda khalei chi theikhui khavai Christawui tui china kathada ngachonli?**

Mikhanama makhamashunga oja bing china churchwui lungli kachikatha atha yaosangli khala da ithumna ngarakzak eina matheirarmana. Kha athumna sada khalei saikora chi moreiwui apongli thankazatna. Athumna tharkhameiya mirin ringkhavai paokapha tamkachitheiya bingna da khuilapai. Kha Peterna chikatha mibingli ning ngashar khavai panglak eina hangmathinmi kahaina. Athumwui thi kashur tharan kachikatha athei hatkhaira khala kaji Peterna hangmi haira.

**Christali zangda ningkhan samkaphang hi khina da nan theikhala? Kachikathawui eina Christana ningkhan ngasakhaira khala?**

**Tuesday**

**June 6**

**Fana maloshoklaga zaluishit kaji thada ( 2 Peter 2: 17 -22)**

**2 Peter 2: 17 -22 eina Matthew 12 :43 -45 chi palu. Vareshi akhana awui khare mirinwui acham aram otsak chili hankhaungwui kalakashi khikhala?**

Mikhanama oja bing china ngwui ngasak kahaiya khamashungli ngalan kahaiya athum bingli Peterna ning zanglak eina hangmi. Makhamashunga tamkhamiya bing china ningkhan mira da ngashita. Kha athumna khangashit ningkhan chieina Jishuna Awui thi kashura bingli yarmikikaji ngashitmi kahai saman ningkhan chiya ngatei hang kahai otna.

Peterna hili panglak eina ning ngashar khavai hangmida khalei chi yanglu. Khamashung theikhuihailaga khamashung chiwui eina ngalanthui kahaiya athum bingwui vanga Kathara mashunzā chi mathei kasa china phamei. ( 2 Peter 2: 21)

Moreiwui mirin chili hanungluishit kahai athum bingwui kachihan kanchao haira kaji maningmana. Athumna Prohowui khamashung aza chili hanungluishit kaji khararchanla kathei samphanga. Hankhaung tharan atumli Varena makhalanhaimana. ( Luke 15: 11 -32) Kha mashunza chiwui eina mai ngareithui kahai kaji hi kalāshipailak kahai zakshi khameiya pheikār ngasahaowa. Kala hi khamatha otsak mangasamana. Hili fana zasanglaka malokashokwui otsakli chansam sada hanga. ( Proverbs 26:11) Hiwui otsak theikhui khavai Peterna hangkachitheina.

2 Peter 2:20 chi Matthew 12:45 eina Luke 11:26 chili ngaraikacha theikapai apong eina Peterna hanga. Makathara mangla li shokahaiya maramli Jishuna chanjam hi hanga. Kha mangla zakshikhamei chiwui pamkhavai maleimada ungzanglui khavai sai. Shim chili athumna ungpama. Shim chi mili kahangna. Kha hitharan kharewui mangla chili zakshi khameiya mangla hosangda zakshi khameiya ngasathuihaowa. (Matthew 12:45)

Jishu eina Peterna hangda khalei hi kachangkhatwui tuina. Vareli khuisang kahaiya athumna hi theiphalungra kaja kharewui mirin otsak kala acham chi kanthui ngasakhailaga churchwui otngarutli zangda shitkasangwui shakhi mikatheiya ngasa phalungra. Chi maning akha kharewui kachama mirin acham chili hanungluishit kida kasak khikha maleimana.

**Churchwui alungli shitsang khangaruma bingna shitkasangli nganuida khaleiya athumli mathameida khamashung aza chili zata chiwui eina phei masanathui khavai kathada ngachonpaira?**

**Wednesday**

**June 7**

**Peter kala Jude ( 2 Peter 2: 1 -3:7)**

Jude 4 -19 hi 2 Peter 2: 1-3:7 hiwui repeat kasana da mi kachungkhana hanga. Khanini hili makapha bingli anaolamshong shongran khami hi Varewui pangli lei kaji Peter eina Jude na hangda lei.

**2 Peter 2: 1-3:7 eina Jude 4-19 chi palu. Varena makapha bingli bichar sakahaiya chi khina da hang? Hi theida Varena moreili kayakha zakshida khuikhala kaji kathada theingasak?**

Peter eina Jude na makapha kasawui bichar kathum hanga. (1) tara kaphong (2) Sodom eina Gomorrah meina shiman khangasak (3) konglui kahaiya kazingrao bingli shiman khavai kazip kahai. ( 2 Peter 2: 4 -6; 2 Peter 3:7; Jude 6,7) Khanaowa atamli hi rashokra. Bibleli Varewui lukhamashan kala pheokhamiwui pongli kachungkha kapimihaira. Kha khanaowa zimiksholi Varena mashunwui bichar sathang makapha makhaya saikora shimanserhaora.

Morei kasa wuivang Varena chitharan atamli okthui kasa mibingli Sodom Gomorrah meina chuitup haowa kala tarana phongshirongda thiserhaowa. Kachikatha morei sahaoda hiyakha zakshida shiman ngasak khala? (1) athumna shiman khavai apong tamchithe (2) athumna Varewui kahang khalanhaowa kala khaya mashimana (3) athum moreiwui rao ngasahaowa. (4) Varewui pheomikathei hi theida morei salala pheomiluire da morei sashonhaowa. (5) Jishu Christana ithumwui Prohona kala ithumwui mangla singkhamena kaji makhuisangmana. (6) athumwui phasa makhao ngasakhaowa. (7) athumna khikha masakhavai



akachanga tui mamatuimana kala langkaso tui matui (8) athumna makapha tui matui. ( 2 Peter 1,10,19; Jude 4,8; 2Peter 2:12,18; Jude 10)

Atungli hangda khalei morei otsakbing chili shaokathat, ashee katawui morei mazangmana. Ya jikapaiya morei kachungkha Peter eina Jude na kapisanghaida leili. Hina ithumwui morei saikora chiwui vang ning ngateikhui khavai chithei khamina.

**2Peter 2: 12 eina Jude 10 chi palu. Kashiman samphangki kaji bingwui pongli Peter eina Jude na hangmihaira. Athum khalatta mashun makhui mathei thangkhomeiya sayar katha ngasai. Varena Eden Yamguili ithumli kachi katha mirin ringda okthui ngasakngai khala? Varewui khangan chi khi ngasasa khala? Peter eina Jude na hangda khaleiya mibing katha mangasa khavai nana kathada sapaira khala?**

**Thursday**

**June 8**

**Old Testamentwui eina chungmeida tamkakhui ( 2 Peter 2: 6 -16)**

**2 Peter 2: 6 -16 chi palu. Makapha masakhavai Peterna ngashar ngasakda khalei chi khikhala?**

Genesis 13: 12,13 li Lot eina Abraham ngapak kahaiwui khararchan kapihai. Lan wuinag eina anina pakhaowa. Lotna Jordanwui tampak ngahevivak kapangkhu da Sodomwui ngalemshong awui ransom sada pānhaowa. Sodomli khalei mibing chi zakshilak haowa da Biblena hanga. Prohowui tungli makhamaya morei kasa miyur ngasahaowa. Chiwui vang Sodom Gomorrah shiman haora da Varena Abrahamli hanga. Kha Abrahamna miyur chiwui vang mashiman khavai phayetmi. Kha ngalei chiwui mibing chi zakshinahaoda khangan mi 10 eina tangda masamphangrathuwa. Chiyakha zakkashiya mibing ngasasai kaji ithumna pakakhui samphanga. Chiwui vang eina keinung chi shimanhaowa. Lot kala awuinaongalava khani kankhui. ( Genesis 19: 12 -25)

Khararchan hieina Peterna lesson khani hanga. Khare, keinung khani shiman khangasak hi makapha bingli kashong khalangwui bicharna. Kakhane, Prohona khangan bingli kalakshiwui eina kankhuimishapa kajila chithei. ( 2Peter 2: 6 -9) Sodom eina Gomorrahli khalei mibingwui morei chi Peterna hangmi. (1) phasawui khamathang shuikhangashai otsak kasa (2) Proho Varelimatheikhami, khaya makashi (3) Varewui kahang makhuisangla athumwui ning kachang kasa (4) Lotli rasamkaphanga kazingrao bing chili makhaya tui khamatui. Hikatha ngamkachipā otsak athumna sai. Makhamashunga tamkachitheiya oja bing kala athumwui thi kashura bing china hithada sai. Balaamwui khararchan ithumna Number 22: 1-24:25 chili kathei samphanga. Moabwui awunga Balakna Israel miyurli khonshimi khavai Balaamli lokhui. Vareli mashitsang katheiya khangamara, kakharama mibingli Peterna Balaamli chansam sai. ( 2Peter 2: 14,15) Hikatha mina athumwui khamashung theikahai apongli mashurmana.

**Moreiwui shongran tashungkikaji mibingli hangmi khavai ithumli chisin khami otngarut kala kahor samphang kahai chi thuklak eina majuklu. Ithumli Bible kala EG Whitewui kapikahai chi mihaida lei. Chithakha ithumna Adventist akha sada ning ngasharkhavai hangmathinmi kahai chi mahangmara khala?**

**Friday**

**June 9**

Ngarum kasanga: Christali zangda ningkhan samkaphangwui maramli vareshi kayakhana matuida khalei ithumna kasha samphanhaira. Mah! Christana ithumli moreiwui eina ningkhan ngasakhaira. Martin Lutherwui khararchan eina ithumna ningkhan samkaphang hi khikhala kaji

theihaira. Varewui lukhamashan kaji matheishingkhui ranglakha ana kakhanang kachotna da phungda leisai.

“ Hili khamashung chi chithei mida leili. Kahui samphang khavai Christali horsangchao phalungra. Hiwui azali makhamashunga kakapika china ngwuingasak zārlaka. Kaja Christali zangda ningkhan samkaphang kaji hi ain athishurda mazatla morei sapaihaira kajili kahang maninglakmana. Mi kachungkhana hi theingwuida leili. Ain kakaiwui shongran samphangki kajiwui eina Christana ithumli chihomihaira. Chiwui vang hili pheisin salaga mi kachungkhana ara ain maleiluimana da hangda leili. Mangla Katharana mathanmi thurakha hikatha makhamashungawui khalen china thānngwuihaora. Chitharan Satanwui kakapik china athumli singyuihaora. Satan kaho china mibingli ngwuingasakshonda leili. Hithada okathuiwui vareshi bingli Satan na ali khorum khavai khalen sangda lei.” Christ Triumphant, page 324.

### **Ngapheirum khavai:**

**1. 2 Peter 2: 19 li makhamashunga tamkachitheiya bingli Peterna hangda khalei chi thuklak eina majuklu. Ithumna shitsangda khalei chi khikhala kaji theitit kakhui hi kathada leipaira khala? Ithumna shitsangda khalei chili ithum khalattana ningli khuisangchaoda khamaya hi kayakha matai khala? Shitkasanga katei bingwui eina ngateihang kahai hi kayakha kalākashikhala?**

**2. Makhamashunga bingli shongran katāwui pongli Peterna hangda khalei tui bing chi yanglu. “Makapha makhaya mibing chili Prohona thei. Kala athumli shongran tashungkikaji zimiksho chi rara. Makapha makhayawui shongran leiphalunga kaji ithumli verse hina kathada hangchitheimi? ( 2 Peter 2:9) Awui mibingli yongasak kahaiya bingli Proho Varena kayakha malung vātkhala?**

**3. Christali zangda ningkhan mihaira kaji hangda khaleiya bingna ningkhama thara hi khamayon madarkarmana da hanga. Chiwui vang Sabbath mamayonlala khikha mathamana da hanga. Hiwui tui hieina “ Christana khama ningkhan” hi kayakha mibingna ngwui ngasak paida leili kaji theikhuingasak khala?**

Lesson 12

June 10 – 16

**Prohowui zimiksho**

**Sabbath Ngazin – June 10**

**Haptali pakhavai:** 2 Peter 3: 1,2; John 21: 15 -17; 2 Peter 3: 3 -18; Psalms 90: 4; Matthew 24: 43 – 51.

**Ningphun: “ Kha Prohowui zimiksho chi ngayāshong khalena kharā thāda rāra. Chitharan kazingramla akhon panglak eina ngashumda shimānhaora kala chili khalei otbingla chiwui kasā china mengchup haora. Okathui kala chiwui lungli khalei saikorala chuitāserhaora. 2 Peter 3: 10,11.**

Kanthui kahaiya zingcum bingwui tamli Vareli makhuikasanga kala mashitkasanga athum bingli mibingna mashitsangrarsāmana. Kaja athum bing hiva naoda khi rashokrakhala kaji matheithuda khayon kala mili zakashi kasali mangacheelakmana. Athumwui makapha otsak kasa chiwui vang Varena shongran tashungra kajila athumna makhuisangmana. Chiwui vang makapha kasali athumna ningkakashak maleimana.

Hikatha ningphanin hi aruiwui thotli maleiluithura. Kapha kasali naoda khi rarakhala kaji mangacheemana. Sada khalei saikorali Varena bichar sara kaji hinala mibingli kapha rin ringngasakda leili.

Varewui mangāli makapha kasā bingli athumwui shongran tashungra da Peterna khangachee maleilakla hangmishapa kaji ithumna theihaira. Khanaowa zimiksho bing, makaphawui shongran bichar kala Jishuwui rakakhanewui pongli Peterna mathalak eina hangmihaira. Kala Kazingram ngashumda, mei eina ot saikora chuitup haora kajiwui pongli Peterna hanga. ( 2 Peter 3:10) Chiwui vang eina bichar zimiksho chiwui vang kala Awui latra kakhane thanghon cgili phaninglaga ithumna kachikatha mi ngasada ringphalungra khala kaji Peterna ngahanda leili. ( 2 Peter 3: 11)

**Sunday**

**June 11**

**Pangshapwui āngayung ( 2 Peter 3: 1,2)**

Churchwui alungli makhamashunga tamkachithei rashokki kajiwui pongli Peterna hangmathinmihai. Ningkhan mikhavai ngashitmida khalei bing chili ana ngashar khavai hangmi. Athumna mibingli morei sangasakra kala thannguirā. Athumwui tamkhami chiwui manga eina katei bingli moreiwui rao sangasakara. Kaja Moreiwui rao khangasa kaji hiya Christana ngashitmi kahai ningkhan yarkhami chi masamkaphang kajina.

Hikatha ngwuida tamkachithei himang majila khangatei khanguiya tamkachithei kateila churchwui alungli rashokra da Peterna hangmihai.

**Leikashiya ngasotnao bing nathumna khamalai masala phaning khavai hina iwui chithi kakhane kakapina. Kapha khangaronga apongli atam kachida majuk khavai ina nathumli katom khamina. Achalakra maran bingna phongmikahai tui bing chi khamalai masala phaningung chinglu. Kala ithumwui Huihame Proho na kaso kahai chi Paokazata bingli ithum wuivang mikahai tui bing saikora chila phaningung chinglu. ( 2Peter 3:1,2) Khiwui vang Peterwui tui chi nganalu da kahang khala? John 21: 15 -17 chila palu.**

Achalakra kathara Varewui maran bingna hanghaikasa chi Peter latluishita phaningung ngasakda leili da 2 Peter 3: 1,2 li hanga. Maran bing hi Vare pao hangmikhavai kapangkhui

kahaiya mibingna. Chiwui vang Bibleli kapikahai chi phaningung khavai Peterna hangkhami chithina. Maran bingna vaomaran khami chanpao saikora chi makhangapata shitsang kapai tui sera. ( 2 Peter 1:19) Peterwui chithi pakakhuiya mi kachivana maran bingna kapikahaiya Bible tui hi khamashungana kaji theikhui khavai Peterna hangmi. Old Testamentwui lairik hi Bible maningmana kaji New Testamentwui lairikli hangkhai khikha maleimana. Old Testament maleila New Testament kaji hi marapaimana. Khanini hi ngarumlaga Bible kahona. Peterli Varena hokakuina chiwui vang ana khamatui saikora chi shitsang khavai pangshap khaleiya tui ngasai.

**Khiwui vang ithumwui khamajuk kala theikakhui chili machihanla Biblewui tui chili mayada hamsang phalungra khala?**

**Monday**

**June 12**

**Khamashungli manakashi ( 2 Peter 3: 3,4)**

Achalakha kanthui kahaiya atamli kathara maran bingna hangkhai chi phaningunglu da Peterna hangmi. Paokazatta bingli Huikhame Prohona hangkhami tui chi phaning unglu da kasoi. Chimang majila khangatei makhamashunga tamkachitheiya bingli ning ngashar khavaila hangmi. Hi kayakha kalakashi tamkachithe ngasa khala kajila theingasaka. Varewui paokazatta akha ngasada chithi hi pakakhuiya bingna ana hangda khalei hi khikhala da ngararik eina theikhuida hangmathin khami chili ngasharlak eina sakhavai Peterna hangmaran khami tuina.

**2Peter 3:3,4 chi palu. Christawui latkhara mashit kasanga kala ning khamaonga athumna khamashung tui chili manashira. Athumna khamashung chi mashongachei khavai kathada hangkhala?**

Makhamashunga tamkachitheiya athum chi Christawui latkharali ning khamaonga kala khamashung tui chili manakashiya bingna. Athumna moreiwui ot khamathang khamarangli ningchanga. ( 2Peter 2:10) Kala Christawui latkharali ning khamaonga kala ngashimkashe athum chi phasawui ning zangda sopkhamasapa mibingna. ( 2 Peter 3:3)

Ana (Christana) rakikaji tuingashit chi kali lei da athum ning khamaonga bing china hangra. Jishu Christana thakalak eina latrara kaji athumna ning maongda ngashimshira. Vareshi kachungkha Christali ngaraida thiserhaira, kala kachungkhala chithada ngarai ngarailaga thiserhaora da athumna tamchitheira.

Athumna hangda khalei chila khamashung thai. Kathara bing kala makapha mibingla ngalei lungli ngarumda chizanser kahai chi Eochna kathei samphanga da EG. White na kapihai. Chiwui vang Eochna ningli ngapangapahaowa. A hi okathuili tarana maphongrang lakha okthu kasa mina. Ana chiyakha ningli ngahanda leiakha awui thili rāokkathuiya khanaowa mibinga kayakha ningli ngapa ngapāra khala? Chithakha arui ithumwui thotli okathuiya mibing kala Adventist bingva kathara? Adventist kajiwui aming hinala Jishu Christana latraluira kajili chizamiya. Arui eina tangda mararangli. Hiwui vang Peterna Christawui latkhara honda khaleiya bingli ngashimkashi bing rashokra da hangmaran khami tuina.

**Nawui shitkasang athishurda Christana malatrarangda khalei hi khiwui vangna da nana theikhui khala?**

**Tuesday**

**June 13**

**Zingkum thingkha hi thangkha kathana ( 2 Peter 3: 8 -10)**

**2Peter 3: 8 -10 chi palaga ningkhamaonga kala manashi katheiya athumli Peterna kathada ngahankami khala? Peterna hangda khalei hieina Christana malatrarang kajiwi maramli kathada ithumna theikhuipai khala?**

Mi kachungkhana Jishu Christawui latkhara apongli tamchitheida khalei bingli mashitsangla manashi. Okathui hi hithada vashumra da hangda leili. Kha Peterna chi mamayamana, kaja haokaphokali Varena okathui sakhuihailaga okathui hi ngacheishonda leili. Genesisli ithumna pakhui kahai chi ana latluishita phaningung ngasakda lei. Genesiswui lairikli hangkhai athishurda chitharan mibingwui zakashi chi hangkhavai maleisaman. Chiwui vang tarana phongda shimanser ngasakhaowa kaji hila Peterna Genesiswui lairik chi eina phaningung ngasakda leili. ( 2Peter 3:6) Hikatha am amawui khangachei khuikhara hiya leishonda leili. Okathui saikora hi naomeithuida mei eina shimanser haora da Peterna hangmihaida lei. ( 2Peter 3:10)

Prohowui vanga thangkha hi zingkum thingkha kathana kala zingkum thingkha hi thang zimikshokha kathana da Peterna hanga. ( 2 Peter 3: 8) Hi Peterna Psalm 90:4 chi phaningungda kahang ngasada leira. Zingkum thingkha hi kanthui kahaiya thang zimikshokha kathana. Kala ngaya kashakhawui thili kanthui kahai kathana da Psalm kakapiyana hanga. Chiwui vang eina ithumwui ning eina Varewui kaphaning mangaraichamana. Chithada sada ithumwui theikhava chili matanghaila kha Varena kaphaning ningyang khaung chili mayada horkasang hi leiphalungra.

Ithumwui theikakhui khamajuk lia Christawui latkhara hi huinaya da khuilapai, kha chiya theikhava khavata mikumowui khamajukna. Varewui vang chi maningmana,ngarakzak kahai atamli rarasara. Varewui lukhamashan ithumli kaseisang khami wuivangna da Peterna hanga. Kaja Varena akhalila mashiman ngasakngaimana. Mi kachivawui morei chi ning ngateikhuida kahui samphang khavai Varena at lukhamashan eina ngaraimida khaleina. Ana yansang kahai khikha maleimana. ( 2 Peter 3: 9)

Kha Varewui lumashan katheiwui ngarai khami chiwui vang ithumwui mirin Jishuli horkasang hi mayansangthui haipaimana. Kala morei sashon khavai am khami maningmana. Kashuirak eina ngayashong khaliyana khara thada rara. Khaliya china ngayashong mi khipakhana makachihanna atamli ngarikzanga. Chithada sada Prohona kashuirak eina rara. Kha Ana khara chi mi kachivana kathei samphangra. Chitharan kazingramla akhon panglak eina ngashumda shiman haora. Ot saikora meiwui kasa china mengtup haora. ( 2 Peter 3:10) Paulna kahang thada Peternala hangda leili. Arui am hi khuisang kapai ataman kala huimikapai atamna. ( 2 Corinthians 6:2)

**Wednesday**

**June 14**

**Da china khisahao? ( 2 Peter 3: 11 -13)**

Avavali anao mayara hina Jishuna thikhami kala Ana latraluishit kikajiwi pongli tamchithe. Naopa china Jishuwui maram eina Awui latkhara apongli shakhi mikahai chiwui vang otrei kahaka sahaira da phananga. Chiwui thili ava china, nana hangda khalei china iwui vang khisaura? da ngahankai.

**2Peter 3:11 -13 chi palu. China iwui vang khi sahao da khangahan hili Peterna kathada ngahankami khala?**

Adventist kaji aming hina Christana latraluishitra kaji chizami. Hina ithumwui shitkasangli chihan khavai ngasai. Hi maleisasije ithumwui shitkasang saikora hi aremana. Hieina ithumwui shitkasang chi mathukngasaka.

Matthew 24: 43 -51 chili hangkahi makapha bingwui khararchan chiwui mibing thada ithumna masalapai. Kha china khamataiya maningmana, kha ithumna kathada ringphalungra khala kaji hina khamataiya ngasai kaji theiphalungra. Chi maning akha Christana latra thanghon ithum shitkasang otsak chi ngazansangda shiman haipai.

Adventist ithumwui vanga zimiksho chiwui vang maningmana kha ithumna Adventist samamanda atam kanthuimaman shitkasangla ngazanmaman haowa. Hili khangacheena. Atamna kanthuimaman shitkasangwui otsak ngazanmamanda khalei hina ithumwui kalakashi ngasahaipai.

Thangthang zimiksho kanthui maman Awui latkhara atam nganaimamanda leili. Kha ithumna sangmeida okthuiva akha Christawui latkhara hila tameikhangai tamei kahai thada theihao. Hiwui vang ithumna yasang khangai yasanghaowa. Chithada masakhavai kala maphaning khavai kharinga Bible tuina ithumli hangmathinmi haida leili. Christana rathanghon ithumli bichar sara kaji Peterna hangkahi phaningungda ithumwui vareshi rin phakhameiya kala tharkhameiya rin ringphalungra. Ana katharan ithumli rahokhuini khala kaji atam pung chi matheimana. Kha ithumna ningkharikda tharkhameiya rin ringphalungra.

**Christana latraluira kaji shitkasang hina nawui vareshi rinwui shitkasangli kathada khangachei khaira khala? Nawui shitkasang athishurda ngahankaka chi khikhala?**

**Thursday**

**June 15**

**Khanaowa kapo ( 2 Peter 3: 14 -18)**

Peterwui khanaowa letter kakapi chi ana haokaphokali kapisangmi haikasa chieina kupsanga. Kathara miyur akha sada kathar mirin ringlu. Varewui ningkhami makhamayonna bing china mathanthui khavai ngasharlu da Peterna hanga. ( 2 Peter 3:17)

**2 Peter 3: 14 -18 chi palu. Khipa longli salu da Peterna hangda khalei khala?Ana hangmathin khami hi sakhavai kapo chi khikhala?**

Paulna hangkahi chila phaningunglu da Peterna kahang chila kayakha tamkhui kapaiya ngaraikachā tui ngasada leikhala. Paul nala chingri eina okthui rumlu kaji kasohai. Jishuwui khara Honda khaleiya saikorana hiwui acham otsak hi sada ngaraipam phalungra. Kaja kathara mirin mataisangda kharinga mi ngasalu kaji hili nateng kahai masapaiman. ( 2 Peter 3:15; Romans 2:4; Romans 12:18; Philippians 2:12)

Paulna kapikahai chi Peterna hangda khalei chi theilu. Paulwui kapikahai saikora chi vareshi bingwui vang khamataiya ngasai. Paulna kapikahai chi takam eina Peterna kapida khaleika akai akha shupkhuilaga kakapi khala da matheimana. Kha Paulna kakapi letter bing chi Peter wuivang khamataiyana da phaningkhui.

Naomeikapta Peterna hanga, Paulna kapikahai chithi bing chi theingwui kahai masa alu. Kaja hi kathara Tui kapikahaina. Hi Moses kala maran bingwui lairik kapikahaina. Hi kathara tui sera.

Ithumna minama oja bingwui tamkachithei tamkahi bing chi phaningungsa. Athumna Paulwui lairik bing chi palaga Varewui lumashan kathei kala pheomi kathei bing china athumwui vanga morei sakhavai ngasa ngasakhaowa. Kha Shitkasang manga eina kathara rin ringlu kaji Paulna kahangna. ( Romans 3: 21,22) Hi kahang eina athumli morei sapaihara kaji maningmana.

(Romans 6: 1-14) Shitkasang manga eina kathara mirin kharing kajiwui pongli Paulna kahang chi mibingna ngateihang eina khalatshoklaga khangwui sakhavai ngasai. Kha Paulna hangkahai tui bing chili masho ngachei khangasaka bingli shiman ngasakra da Peterna hangmi. ( 2Peter 3: 16)

**Kachikatha rin ringkhavai ithumli hoda leili khala? Nana mashunrin ringkhavai aja kathada kapangli khala?**

**Friday**

**June 16**

**Ngarum kasanga:** Awui latra kakhane hi katawali leifaya da mibingna khuida leili. Ithumna hiwui vang ning kharikda mangashār akha kalakashi ngasara da Jishuna hangmathinmihaira. Matthew 24: 45 -51 li Jishuna hangda khalei chi yanglu. Rao khani china aniwui akhava latraluishitra kaji thei. Rao akhapa china akhava kachikatha atamli hanungra da ngarok khavai ngaranhai. Kha arao akhapa chiva akhava aruirui mahanungthura da ningnganungkhung pamda awui sakhangai sapamda leisai.

“ Jishuwui zimiksho katharan khala kaji pung khipakhana matheimana, chiwui vang ning kharikda honpamsalu.” ( Luke 1237) Prohowui kharali ngaraida khaleiya athumna yansāngsa mapamhaimana. Christawui kharali shitkasang hina ithumli Proholi khorumda Awui kahang khangana nao akha ngasā ngasakmi. Moreiwui bichar shongran chili ngacheengasakda mathuk khamei rin ringngasaka. Prohowui latkhara ning kharikda khangaraiya athum bing china kathara mirin ringda kahāng khangana eina khamashunga rin ringa.” The Desire of Ages. Page 634.

**Ngapheirum khavai:**

- 1. Christana latrarada leili kajiwui pongli theikakhui hina ithum akha eina akhawui shitkasang theikakhuili kathada ngachonmili?**
- 2. Adventist akha sada tamkachitheili, otsakli kala shitkasangli Bibleli hangkahai athishurda kayakha kashungda sada leili?**
- 3. Peterwui kahang athishurda ithumwui ningkachang kala phasawui khamathang kaji khani hi kayakha nganai?**
- 4. Atam kachi hi mi kachiva wuivang mangaraichamana, ngateiteisera. Atamwui tungli nana kayakha thakda zatlikhala kajiwui athishurda lei. Chiwui vang eina atam kachi hi mi akhana apam ngatei ngateida kayakha kathakwui mirin okthuili khala kajiwui tungli lei. Atam kaji hila ithum matheishingkhui kharara matakakha kahai ot akhana. Chiwui vang eina Varewui atam eina ithumwui atam kachi hila ngatei. Hiwui eina Christana arui eina tangda malatrala leida khalei khala kaji ithumli kathada mathameida theikhui ngasakli?**

**Lesson 13**

**June 17 – 23**

**1& 2Peterwui khamataiya tuipong**

**Sabbath ngazin – June 17**

**Haptali pakhavai:** Isaiah 53: 5,6,9; Leviticus 16: 16 – 19; Leviticus 11: 44; Romans 13: 1-7; 1 Corinthians 14: 40; 2 Timothy 3: 16.

**Ningphun: “ Christa A khalattana Awui phasa krush tungli hammida ithumwui morei kashong runmihaira, chieina ara ithumna khamashung khangaronga rin ringpaihaowa.” 1 Peter 2: 24.**

Mirinli shitkasanga bingna kasak samphangda khalei chili ngasungshap khavai Peterna awui chithi khani hi kakapina. 1 Peter chili, vareshi bingna kasaka rekkakharek samphangda khaleiwui pongli kapi. 2 Peter li mikhanama makhamashunga tamkachitheiya bingwui maramli kapihai.

Awui chithi khanini hili Peterna Biblewui khamashung chili pheisin salaga hangchithe. Shitkasanga bingli rekkakharekwui chotchan samkaphang chi Jishuna morei kaphunga bingwui vang kahui samphang khavai thikhamiwui kachot chi phaningung ngasaka. Makhamashunga tamkachitheiya bingli bichar sara kaji Peterna hanglui. Kha makapha saikorawui bichar zimiksho chi Jishuna kathara bingli rāhokhuihailaga kazingramli zingcum thingkha ngachangsang kahaiwui thili rara.

Ajawui khanaowa haptawui lesson hili Peterwui chithili khamataiya ngapheirum khavai tuipam bing chi tamra.(1) ithumna kahui samphang khavai Jishuna chotchan phungmi kahai (2) ithumna kasa saikoral khamashung chili kahang khangana kala makhamashung bingwui bichar (3) Jishuna ithumli hokhui khavai thakda latraluishitra kajiwui kachihan (4) Churchwui lungli kala societywui lungli kateo kahak mangapaila ngachamtham kahai acham otsak eina kharing (5) Biblena khamashunga rin ringkhavai khamataiya thānkhamena da theikakhui.

**Sunday**

**June 18**

**Chotchān, Jishu kala huikhami ( 1 Peter 2: 22 -25)**

**Azingli mihaida khalei verse bing hina huikhami pongli kathada tamchitheimili khala kaji theilu:**

- 1 Peter 1: 2 \_\_\_\_\_
- 1 Peter 1 :8,9 \_\_\_\_\_
- 1 Peter 1: 18,19 \_\_\_\_\_
- 1 Peter 2: 22 -25 \_\_\_\_\_
- 1 Peter 3: 18 \_\_\_\_\_

Jishuna mikumowui morei vang chotchan phungda thikhami pongli Peterna kahang tharan ana huikhami apongli hangshonna. 1 Peter 2: 22 -24 li Jishuna chotchan sipsat samkaphangwui pongli Peterna kapimihai. Ana Isaiah 53: 5,6,9 hiwui tui hi ngaraichada kapimi.

Old Testamentwui atamli morei kaphunga bingna khorum khavai shimli sayur kachigatwui pongli kachungkha kapihai. Athumna sa chiwui tungli pang parra, hiwui kakhalatta athumwui morei chi sa china phungthui kahiwui amaha kasana. Sa chili athumwui mahut sada shaothata. ( Leviticus 4: 29,30,33,34; Leviticus 14: 10 -13) hanphut pamli ashee teikharor china moreiwui amahana. Pheokhami zimiksho (Day of Atonement) li athumwui morei saikora chi tharkhui.



Morei pheomi khavai ashee eina kachigatwui otsak kasa hi khamataiya akha ngasasai. Chithada ithum morei kaphunga bingli Jishuwui ashee eina lokhui kahaina da Peterna hangmida lei. ( 1Peter 1:18,19) Paul nala chithada hanga. Morei makhavaiya china ithum wuivang morei kaphunga sangasaka. ( 2 Corinth 5:21) Christana ithum morei wuivang chotchan phungmi Kala kathra Varena makathara morei kaphunga ithum wuivang chotchan sipsat phungmi. (1 Peter 3:18)

Paulna kahang thada Pater nala shitkasang hi khamataiyana da hagnmi ( 1Peter 1: 8,9) Huikhami kaho hi nawui kapha eina samphang kapai maningmana da Peterna theingasaka. Kha Jishu hi ithumwui huikhamera da shitsangda khuikasang manga eina Varena ithumli khuisangmida kahui samphang khavai apong sami. Huikhami hi Jishu wuili maningla ithum khalattana sakhui kapai maleimana.

**Jishuna ithumwui vang thikhami hina khiwui vang ithumwui kachihan ngasapaihao? Hina ithumwui shitkasangli kathada ringphami?**

**Monday**

**June 19**

**Ithumna kathada ringpaira? ( 2 Peter 3: 10,11)**

Peterna theingasak khangai hangda khalei chi 2 Peter 3: 10,11 li pakhuilu. Prohowui zimiksho chi khalena khara thda rara..... Kala nathumna kachikatha miyur ngasada leiphalongra khala? Da ngahanda khalei hi khamataiya ngasai.

**1 Peter 1: 15 -17,22; 1 Peter 2: 1; 1 Peter 3: 8,9; 1 Peter 4: 7 -11; 2 Peter 3:11 hibing hi palu. Vareshiwui acham aram pongli Peterna verse bing hili kathada hangmili?**

Peterwui chithi khaninili vareshi bingwui acham aram otsak rinli saklak eina kapisangmi. Khare sada, Varewui bicharsak eina vareshi bingwui kharing acham aram khani hiwui pongli Peterna chizamida hanga. ( 1Peter 1:17 eina 2 Peter 3:11) apong kateili hangsa chiyakha ithumwui kasa khava athishurda Varena bichar sara. Chiwui vang vareshi bingna kathara rin ringphalongra.

Kakhane sada, vareshi naobingna kathara mirin kala khamashunga mirin ringphalongra kaji Peterna hanga. Hebrew Biblewui athishurda khorumkhavai shimli shichin khavai kathara ot chi kapangshokhai. ( Exodus 26:34; Exodus 28:36; Exodus 29:6,37) Vare wuivang savaira da athumli ngakheikhang eina kapangshokhai. Varena kathar thada Awui miyur bingli kathara yur sangasakngai. ( Leviticus 11:44; Leviticus 19:2) Hlwui maramlila Peterna hangmi. ( 1Peter 1:15,16) Tharkhameiya rin ringkhavai kasa kaji hili “ sanctification” da hoi. Hiwui kakhalata mashung khameiya kala tharkhameiya rin kharing kajina. Chiwui vang mibingna kathara yur khangasa hi Peterwui ning kachang sangasak khangai china. Mangla Kathara china ithumli ot samida kala ithumna chili mayada kasa tharan ithumna Jishuwui kahang khangana kathara yur ngasapai. ( 1Peter 1:2)

Kakathuma, Kapangshok kahaiya kathara bingwui acham aramwui ponglila Peterna hangchithe. ( 1 Peter 2:1) Athumna khokha –ningkha saphalongra. Akha eina akha leishi ngarok phalongra. Langkaso mi mangasa phalongmara. Kha khanim khangahuiya mi ngasa phalongra kaji hi Peterwui ningkachangna. ( 1 Peter 3: 8) Athumna kapha mi ngasaphalongra, Varewui rin kazata ngasa phalongra, kala leishi katheiya ngasa phalongra. Atam kachida leishikathei hi leiphalongra. Naomeikapta vareshi bingna kakhanang chotchan saikora Jishuwuili khuiralu da hangmi. ( 1Peter 1: 5-7; 1 Peter 4: 7-11) 1 Peter 5:7)

Ithum akha eina akha mangashimshi ngarok hailsa kathada katommi ngarokda okthui paira? Peterna ringngasak khangaiya acham chi kathada ithumna ringpaira khala?

**Tuesday**

**June 20**

**Latrā kakhaneli kachihan ( 2 Peter 3: 1-10)**

**Azingli mikahai verse bing hina khanaowa atamwui otshot pongli kathada hangda leili khala kaji theilu.**

1 Peter 1: 4 \_\_\_\_\_

1 Peter 1:17 \_\_\_\_\_

1 Peter 4: 5,6 \_\_\_\_\_

1 Peter 4:17 \_\_\_\_\_

2 Peter 3: 1 -10 \_\_\_\_\_

Kachot kachang kaphung kala rekakharek kaphung hina 1 Peterwui chithi chili khamataiya ngasada lei. Kachot kachang kaphunga athumli Varena saman ngaranmihaida leili da Peterna katommi. Ngaranmikahaiya saman chi khipakhana makhuihui kapaiya kala mashiman kapaiya na da shitkasanga bingli ning lumngasakmi.

Khanao zimiksho atam chili rashokki kaji otshot khani Peterna hangmihaida leili. (1) khanaowa bichar (2) makapha bingli mei eina shiman khangasak. Arui kachot kachang sipsat phunglala mashun bichar same china ichachawui ot kasa athishurda saman khuirara.

Peterna bichar kasawui pongli hanga. ( 1Peter 1:17; 1 Peter 4: 5,6; 1 Peter 4:17) Vareva mimai khayanga Vare maningmana. Kala ana michang mikhai masalakmana. Jishuna kathe binglila kala kharinga bing lila bichar sara. Kala bichar kasa hi Varewui mibing eina haophokra. Kala makapha makhaya mibingli mei eina shimanser ngasak haora. ( 2 Peter 3:7)

Jishuna latraluishitlakralla kajiwui pongli Peterna hangchitheimi. ( 2Peter 3: 1-10) Khiwui vang Jishuna arui eina tangda makharawui maram Peterna hangmi. Khiwui vang khala kaje mi kachungkhana kahui samphangpai khavai vangna. Khanaowa zimiksho chiwui bichar chili mazang khavai phenkhavai makhaleiya kapeichao kahaiya kathara miyur ngasala da Peterna katommi. Chiwui vang ithumna arui khanangda chotsalala shitkasang chi mangacheilakla kahang khangana eina muiva khavai hangchitheimi kahaina.

**Kahang nganada shitkasang eina khiwui vang ithumna muiva phalungra? Khangatei kapangkapai apong leila?**

**Wednesday**

**June 21**

**Societyli kala churchwui lungli tācham tāram kahai khamashit ( 1 Peter 2: 11 -21)**

**Church eina governmentwui kathanna pongli khamataiya sada azingwui verse hina kathada hangli? Karankha eina tangda vareshi bingna hili maya phalungra khala? Peterwui tui hi ithumna kathada khuisang phalungra?**

1 Peter 2: 11 -21 \_\_\_\_\_

1 Peter 5: 1-5 \_\_\_\_\_

Paul eina Peterna khamunga kala kathanna bingwui maramli hangmihai. Governmentwui khamunga kala churchwui kathanna bing china vareshi bingli rekkakharek atamli Peterla okthuisai. Hina shokkahaiya khararchan hi mashung phalunga kaji chithe. Kaja Paul eina Peterwui atamli vareshi bingli panglak eina rekkhareka. ( 1Peter 2: 13 -17; Romans 13:

1-7) Governmentwui kala churchwui kathanna kaji hi Varena kapangka kahaina. Makhamashunga mibingli athumna tandi mi. Kha athum nala mibingli rekkhareka.

Kha government hina mibingwui shimpan rampanli mathakhamei khuira khavai ain khamiya kala ngalei ngakkhamiya ngasai. Chiwui vang kapha government hi Varewui sokhami akhana.

Chimang majila churchwui alung lila kahak kateo kala khamunga akui khangava hi Paulna kahang thada Peter nala hanga. (1 Corinthians 14:40) Peterna churchwui kathanna bingli Varewui yao kahoma bing ngasalu da hanga. Yao kahoma bingna yaobingli yangkhame ngasai. shitkasanga bingli athumna yangsangmi. (1 Peter 5:2) Churchwui alungli mathalak eina thankhamiya hi darkar sai. Kapha kathanna china churchwui manga kapeida ot sai. Athumna church member khokha sakhavai kala khokha ningkha eina ot sakhavai thanmakhok khame ngasai. Kala shitkasanga bingli katommida Varewui ming tekmatei khavai sami.

**1 Peter 5:5 li hangda khalei khangahui acham eina nathum akha eina akha hamsang katheiya ngasalu kaji hi nana kathada sakhavai sara?**

**Thursday**

**June 22**

**Kharinga Biblewui khamataiya. ( 2 Peter 1: 16 -20)**

**Azingwui verse bing hina kathada Biblewui pongli hangli? Kala hina Biblewui khamataiya kathada theikhui ngasak?**

1 Peter 1: 10 -12 \_\_\_\_\_

2 Peter 1: 16 -20 \_\_\_\_\_

2 Peter 3:2 \_\_\_\_\_

2 Peter 3: 16 \_\_\_\_\_

Peterna pangshap apong khanili hangmida leili Achalakra maran bingna hangmikahai tui chi phaningunglu. Maran bingli Prohona kaso kahai saikora chi phaning unglu da kahang chi mamalai alu. Kathara maran bingwui tui chi theikhui khavai khamahai ithumli mihaida lei. Chiya Old Testamentwui lairikli kapi kahai bing china. Paokazata bing chi ara ithumwui ngalemli maleimana. Kha ithumna phakhameiya leili kaja Ithumna ngashitmi kahai tuibing chi leida leili.

2Peter 3:16 chili paakha Bible hi khamashungana kaji kapisang kahai chi thei. Kha Bible tuili mibingna theingui haipai shina da ngashar khavai hangmi.

Bible tamkhui khavai ana rule 9 mihaida leili. (1) seiha kasa eina ngasoda Bible paphalungra (2) verse akhamang mapakhuila kha chiwui pongli hangda khalei verse saikora chi pava phalungra. (3) kala chili ngaraikacha khangatei Bibleli kapikahai chi peida paphalungra. (4) kala kapikahaiya hina khangatei Bibleli kapihaida khalei chili kathada khangashik leikhala kaji theikhui phalungra. (5) kapida khaleiya mipa hina khiwui pongli hangda khalei kala kachikatha atamli hangda khalei khala kaji theiphalungra (6) kapida khalei chiwui background kathada leisa khala kajila theikhui phalungra.(7) Bible kappa hina ithumli manglawui thangmet sangmi kalam hina manglawui khamashung chitheimi. Kala kahui samphang khavai jishuna thimihaira kaji Biblena theingasaka. (8) Varena ithumli theikhui ngasak khangai chi khikhala kaji theishap khavai ithum khalatta ngahanphalungra(9) kala Biblena hangkahi hi ithumwui mirinli kathada tamkhuida otsak eina ringpaira kaji phaningkhui phalungra.

**Friday**

**June 23**

**Ngarum kasanga:** Vareshi bing akha eina akha vaikashi otsak eina ngasoda kathada kapha samingarokda okthuipai khala kajiwi maramli Peterna matailak eina matui. “ Mashun chili kahang khangana wuivang nana kathara rin ringpai. Chiwiu vang nathumwui uklung tongtingda akha eina akha phaningmida ning kathar eina leishi ngaroklu.” 1 Peter 1: 22. Khamashung chili kahang khangana hina kathada kathara rin ringpaikhala peterna chitheimida lei. Khamashungli khuikasang hina ning kathar eina akha eina akha leishi khangarok hi khuirai. Ithumwui kharingli kala church alungli hikatha kapha acham otsak hi leishikaje kayakha sokapaiya ngasara? Shitkasanga bingna Churchwui lungli kathada khokha sada leipaira kaji majuklu. “ Leikashiya izarva-avanao bing, nathumwui shimli kala churchli Christawui mangla zangda hanungda leila? Mashitsang katheiwui otsak eina akha eina akhawui khayon phakashok chi horhaishapda leila? Ithum akha eina akha khokha ningkha kasawui atam rahaira. Khokha kasa hi pangshapna. Kha ngakai khangarok hi ithumwui khangazan ngasahaowa.” Selected Messages, bk 2, page 373,374.

**Ngapheirum khavai:**

- 1. Prohowui zimiksho chili ngashanvada ringlu kaji hi Peterna hanga. Jishuna thaklak eina latrakikaji chili yanglu da Bible version kaikhali hanga. Englishwui tui “ hasten” kajiwi kakhalatva thaklak eina unghung khangasak kajili kahangna. Chitha akha ithumna kathada salaga Jishuna thaklak eina latrapaira?**
- 2. Biblena ithumwui “ khare lairik”na kala semkahaiya otbing china “varewui kakhane lairik”na. Kha hi mibingna theingwuida leili. Okathui eina kazingram hi Varena kasemna kaji hi mi kachungkhana mashitsangmana. Ot saikora hi atam kasangkhawui lungli maron maran eina ngayei kakhuiya ot eina rakashoksera da mi kachungkhana khuihaowa. “*evolution*” kajiwi kakhalatta ( ot akhawui eina ot akha) ‘*mathang mathang eina ngayeikakhui*’ kajiwi tamkachitheili shitkasang athumna Varena sakakhui maningmana da tamchithe. Chithakha ithumna ot saikora hi Varewui themsakna da kathada mashunglak eina shitsangpaira? Hi theishingkhui khavai Biblena ithumli kathada ngachonmida leili?**